


CIDIKÀ

 Myoyi yenu ayi mu dinda emu, balunda baanyi. Ndyèsè dya kwikala cyakabidi kaaba aka mu dinda emu. Nenku mvwa. . . mbangambile ne bàvwa benze cisangilu cya pabwaci, ne benze ndambu wa milubu mifunda. Nenku bavwa bajinga bwa mêmè kulwa kuteeleja miine milubu ayi, ya cìvwa. . . bwa ne ní mvwaku ne cintu kampanda cya kwamba anyi cya kubengangana naayi, pa bwalu abu, bàmba ne kùvwa cintu kampanda pa bivwà bitàngilà miyiiki ya babidi, bàvwa bapete lutatu kampanda. Ngeela meeji ne aci ncilenga cya dikema, mushindu awu. Mêmè ndi ngiitaba aci's. Aci cìdi cimpeeshaku mpùngà dîbà adi, bwa ngâpetakù mushindu. . .

² Bàdikù bùngì cyanaana, ngeela meeji bàdikù biipacila nkama yisambombo pa dibeji dya mènà a bàdì ne cya kwindila, mpindyewu mene, nwamonu's, ya miyiiki ya babidi ya pabwayi. Ne mêmè bwa pa bìdì bitàngilà nsòmbelu mulenga ntu muswikiibwe ku díyì dyanyi, bwa kushaala ne muntu yònsò too ne patùdì tuumvwa díyì dya kùdì Nzambi, bwa mwine muntu awu, nwamonu's. Ne dîbà adi wèwè wenza nanku, udi mufwanyine kwikala ne muntu umwepele anu piine pa dibeji dya mènà a bàdì ne cya kwindila apu, anyi pàmwàpa ne mwine muntu umwepele awu, twindile mbingu yibidi anyi yisatu bwa mwine muntu umwepele awu, nwamonu's, too ne patùdì cya bushuwa tuumvwa díyì dya kùdì Nzambi; tutwilangana, tusambila pamwe; twalukila, tushiyangana; twalukila pamwe, tusambila pamwe, too ne patùdì tupeta EMU MMUDI MUKALENGE WAMBA bwa mwine muntu awu. Ee, mu ciine cikondo aci, nwamonu's, bikwabo bintu ebi.

³ Mpindyewu mushindu ewu, mushindu wùndì ncyumvwa mêmè, bìmpè, ngwà muntu ne muntu ufunda malomba ende, nansha miikàle a bishi, nenku ùdimpeesha. Nenku nganji mêmè anu kudyangata, ne pashiishe yèyè wanji kundekela nsambila pa dilomba adi, pashiishe ndi mwa kubiikidila bantu abu mu mwaba wa. . . Awu ki wùvwà—awu ki mushindu wùvwàbi anyi? [Mwaneetu Neville udi wamba ne: "Amen."—Muf.] Mpindyewu, aci, aci ncîmpè. Nwamonu's, nenku pashiishe pàmwàpa pàncidì mwindile ne mwine muntu umwepele awu apa, ndi mufwanyine kupeta bantu lukama, nkama yibidi, anu mu kasumbu aka, kamwepele aka, mûncidì mwindile bwa umwepele emu. Bwalu mushindu awu, nebimpeesheku dîbà adi mpùngà wa kufika ku kumona bantu bapite apu. Ndi—ndi cya bushuwa munange aci. Yònsò udi mukapetè pende mmwenenu awu awu, ee, mêmè ndi ngiitabuuja ne bivwa bìmpè menemene. Abi mbîmpè.

4 Ne pa nanku, mpindyewu, elu lumingu lùvwa mu mushindu kampana lumingu lulenga lwa dikema bwanyi mêmè, ndambu wa mbingu mishaaale eyi. Mvwa—mvwa mupatuke muye kumpala kwa Mukalenge wetu, bu munùdi nuumvwa amu.

5 Kadi, ndi ngeela meeji ne, kumpala kwa twètù kubanga disangisha, ndi ngeela meeji ne ndi . . . Ne muntu ùndi mumanye, ndi ne mwikulwanyani wa balume mwaba kampana mu citanda emu, ne pàmwápa . . . Pìikalàye Branham kampana, ngwa cimvundu, ùdi wènda ùnyeemakanangana eku ne eku mwaba kampana, pàmwápa, pa nanku yèyè ki—yèyè ki udi ukengela kwangata dileeja dya njila edi, pa nanku ùdi ùsanganyibwa mwaba kampana kaaba aka. Ngeela meeji ne kùdi mudimu wa dilambula dya bânà, ne bwa baamamù bakwabo bàdi ne bânà baabo bakese. Mona's, Mwaneetu Teddy, ngeela meeji ne nyèyè, bu yèyè mwa kulwaku ku piano eku, nenku netwikalè mwa kwimba musambu wetu wa ciibidilu wa dilambula, dya bânà, wa *Bwelàayi Naabò* awu.

6 Mpindyewu, bantu bààbùngì, mu ekeleeziya yàbùngì, bàtu bamyamina bânà baa mu maboko màyi. Kadi twètù tutu tuteeta anu kulonda mmwenenu wa Bible, twendela anu pabwìpi menemene mùndiku mumanye mwa kuMulonda amu. Mpindyewu, kakwenaku kaaba nansha kamwe mu Bible kakaadibo bamyamine muntu mukulumpe màyi to, nansha tukàadi twamba bwa mwânà wa mu diboko. Ne mwaba nansha wumwe kacya Nzambi kàtu mutumeku dîyi bwa kumyaminangana màyi nansha, nî mbwà mwânà wa mu diboko nî mbwà muntu mukulumpe.

7 Kadi kùdikù, mu Bible, mwaba wakalwabo ne bânà bakese kùdi Yesu, ki kwelaYe byanza Byende muulu ne kubitentekela bânà bakese abu, ne kubaneshu, kwamba ne: “Lekelaayi bânà bakese balwe kùNdì.” Mpindyewu ki wetu—wetu mushindu wa dicyenza mwaba ewu ngwòwò awu. Nenku mpindyewu, twètù bu basadidi Bende, tudi anu tuya naabo kumpala—kumpala kwa Nzambi, mu disambila; nenku kwòkò kwikalè nî nganyi nî nganyi mwab'ewu udi ne mwanende wa mu diboko udi kayi mwanji kulambudiibwa . . .

8 Twètù katùtu twitabuuja dibatiiza, nî ndya mushindu kaayi wònsò, dya bânà bakese baa mu maboko abu to. Bwalu, bòbò kabeena ne mpekaatu nansha umwe to. “Mbalela mu mpekaatu, bafwimba mu bubi, balwe pa buloba bamba mashimi,” kadi kabeena ne kantu nansha kamwe kaa kunyingaleelabo to. Ne dibatiiza diine ditu mbwà kanyinganyinga ne dilekelediibwa dya mpekaatu. Pa nanku, mwanaabo mulela wa mu diboko awu kèna ne kantu nansha kamwe kaa kunyingaleelaye to; nenku pààkafwà Yesu pa nkuruse, Yèyè wakakezula mpekaatu yònsò. Nenku mpindyewu patùdi tukola tufika mu cipimu cikumbane cya tumanya ne bìdi bikengela bwa twètù kunyingalala bwa bitùdi benze, dibà adi, mpatùdi tujungulula ne Kilisto, Yèyè

wâkatûfwila awu. . . Mwânà mutekete wa mu diboko awu kâna yêyè mwa kujingulula aci to, cya ne Kiliso wakamufwila aci. Kadi patukaadi bakole bafike mu cipimu cikumbane cya tujingulula ne Kilisto wakatufwila, nenku dîbà adi tudi—tudi tubatiijibwa mu lufu Lwende ne bajuudiibwe mu dibiishiibwa Dyende dya ku lufu. Bu Mukalenge mwa kwanyisha, mu dyalumingu dilwalwà nêmfikè ku cyôci aci, bu Mukalenge. . . bu Nzambi mwa kwanyisha.

⁹ Mpindyewu, ki bwa cinyi, tudi tulwa naabo ne tubalambula. Baamamù kanà bônso, ekeleeziya kanà yônso, twitabaayi kanà yônso, diikala kanà dyônso, cintu cikwabo kanà cyônso, twètù tudi tulambula bânà bakese bônso kùdi Mukalenge Yesu Kilisto.

¹⁰ Mpindyewu, Mwaneetu Teddy, bu wêwè mwa kutwimbisha kwôkò eci ne: *Bwelàayi Naabò*, bu wêwè mwa kwanyisha. Eyo, tuyaayaaku twètù bônso mpindyewu tûng.

Bwelaayi naabo, bwelaayi. . .

Bwelaayi naabo. . .

Bwelaayi naabo, bwelaayi naabo. . .

¹¹ Mu cikeena-kumona cîmvwà mumone, anu paanyima menemene paa lufu lwa maamù wanyi apu, ki wôwò awu wûmvwà ntuma, musambu awu, ngwà ne *Bwelàayi Naabò*, pàvwà bânà bakese, pàvwàbo balwa naabo.

Udiku mwa kulwa anyi, Mwaneetu Neville?

¹² Ndi mumanye mwânà wa balume ewu. Billy udi wamba ne: “Kùlu kumumacisha’s.” Yêyè. . . Ewu’s ng’William Branham, s’tudi basatu biimane pamwe kaaba aka, ba-William Branham, nkongo yisatu, mènà asatu. Nyewu ùmbandila’s, mu dinda emu. Kùdi cintu kampanda cidieye naaci, ndutangilu lwa mushindu kampanda lwa mwânà wa balume udi kayi mwenze bwalu. Kadi, yêyè ng’William Paul Mwânà. Ne pa nanku tudi ne kusakidila, mêmè ngudi naaku mu dinda emu, bwa kupeesha Mukalenge Yesu, ngumusha mu maboko a tatwëndè (mwanaayi wa balume), mwikulwanyi wa balume ewu, bwa nsòmbelu wa mudimu; mabenesha pambidi paa taatù ne maamù.

Twinyikaayi mitu yetu.

¹³ Taatù wetu wa Ngàsà wa mu Dyulu, ndi mumanye ne nkaadi muye kule be mu njila, pândi mwambule mwikulwanyi wa balume ewu mu cyanza cyanyi apa.

¹⁴ Kadi ndi mvuluka Yakobo, paakatwalaye biikùlù bende mu mantàntà a binù byende, pakaavwaye muntu mununu, Efàlàyimà ne Maanàsè; kubeneshayè bânà abu, ne kubaabanyinaye mabenesha a nyuma àdì mashaale too ne ku dituku edi. Mushindu wakacyamakajaye byanza byende kuumusha kùdi ewu, kutuma kùdi mukwabo, mwikàle umusha mabenesha kùdi beena Yuda uàtùma kùdi baa Bisamba bya

bende, mu nkuruse awu. Nzambi wa mu Dyulu asemeneku pabwipi apa mpindyewu.

¹⁵ Mwikulwanyani wa balume ûdì Wêwè mumpeeshe ewu, Mukalenge, mumumpeeshile ku mwanaanyi wa balume ne mukaj'a mwanaanyi. Ndi mvuluka mùvwàye nkumba, kayiku ne mushindu wa kukolesha bânà to, kadi upweka ufumina dituku adi ku Yakima, Washington, pàvwàye udila mwadi, wàmba ne: "Ndi njinga bwa ngâpetakù mwânà."

¹⁶ Nyuma Webe e kubwelaye mu kashinyi amu, ne mwômò amu mêmè kwamba ne: "Neumupete." Nénku leelu ewu nyewu ndi mwambule mwânà mukese wa balume mulenga ewu mu cyanza cyanyi: Dìyì Dyebe dyakula, mulayi Webe.

¹⁷ Mpindyewu, Mukalenge, mu bupwekele bwa byenzi byetu, nyewu tuteeka mwânà wa mu diboko ewu, ku diitabuujja, mu byanza bya Mukalenge Yesu; bwa ne Yêyè, mwikàle kaaba aka mu mmwenekelu wa Nyuma Mwîmpè, angate mwânà wa mu diboko ewu mu byanza Byende ne mu bukubi Bwende, ne amulombole mu nsòmbelu wende mujima. Mupèshèku bukole bwa mubidi ne dikanda, mwoyi wa matuku àbûngì, bu Wêwè mwa kunenga. Ne swaku bwa mwânà ewu angaciibwe ku mudimu bwa butumbi Bwebe. Swaku bwa Bukole bwa Nzambi udi ne mwoyi bwikàle pambidi paa mwânà ewu. Bu yêyè mwa kushaala ne mwoyi too ne ku muntu mukole, ne bu Yesu mwa kunenga, swaku bwa ayiishe Evanjeeliyo. Bukole bwa Nzambi bùdi bumufile kùdi mamwëndè ne tatwëndè abu, swaku bwa kaBumuumukuku to.

¹⁸ Beneshaku papa wende ne maman wende. Swaku bwa bôbò kukoleshiibwa, ewu. . . Swaku bwa yêyè akoleshe mwânà ewu mu cyuyÿya cya bwena Kilisto. Bwa ne, dilongesha dyônso dya buntu didìbo paabo mwa kufila adi, mwânà ewu adipete.

¹⁹ Mpindyewu, wêwè Billy Paul Branham Mwânà, nyewu nkufila kùdi Nzambi wa Bukole bwônso, mu dikulambula, mu Dîna dya Yesu Kilisto. Amen.

²⁰ Kùdi cintu kampana cìdì naaci bânà bakese baa mu maboko, cìdì, ngeela meeji, ciikàle kalolo kaa dikema!

²¹ Ndi mvuluka Loyce, wakadila mwadi ne kudikama byanza bikole. Yêyè ùtu ubinduluka be. Loyce mmupicile mu makenga a makole, mucikàle anu mwânà mukese wa bakaji wa cyena Kentucky uvwa ne lutatu lukole mu nsòmbelu wende. Kadi yêyè. . . Bufuku kampana, Yesu e kumumwenekela, mwimane mu mashika. Ki kulwaye, wenda unyeema lubilu mutangile kwanyi ku nzubu, pabwipi ne dibà mundankulu, yêyè ne Billy, paanyima paa bamane kuselangana. Ki bôbò. . . Iwà ku luseke lwa nkwaswa wa muleepa wa mu cisòmbedi aku, mêmè kumwela diboko kunshingu ne kumulombola kùdi Mukalenge Yesu.

22 Yèyè uvwa ujinga bânà wàmba kufwa. Bàvwa baselangane kùkaavwa bidimu byàbúngì. Kadi pàvwàye ùfùmina ku Yakima dîngà dituku, ùvwa bu uvwa udîla mwadi. Cìvwa...Nyuma Mwîmpè kubwela e kumwambila bwa dîsaamà dya bânà bakaji divwàye mupete, divwà ditwàl-...cìvwa cyenze ne yèyè kapeciku mushindu wa kupetaye bânà to. Pashiishe Nyuma Mwîmpè kulwaYe cyakabidi, ne kwelaYe disaamà dya bânà bakaji adi mulawu ne kumupeeshaYe dibenesha adi. Nyewu mfuma ku dimulambula mpindyewu. Kùvwa . . .

23 Ndi ne ndambu wa tuntu tukese tufunda mwab'ewu, tûndi muswe kwanji kwamba dyambedi, kumpala kwa twètù kubala bìdì bifùnda. Dyambedi, masangisha àcìlwalwà, ngàndì mufunde aa. Aci mmu dyalumingu dilwalwà edi, bu Mukalenge mwa kwanyisha. Ndi mumanye ne nkubange kwikala mabwe a mashika ne kubi mu njila.

24 Kadi tudi ne bantu mwab'ewu bàdì bafumine ku Géorgie, ne ku Alabama, ne ku Floride, ne ku Ohio, ne ku Illinois. Ne—ne kasumbu kakese kaa bantu aka nkenza ne baa ku myaba yònsò.

25 Bamwe bantu bàtu bàngambila, bàmba ne: “Ntu nkaadi mupicilepicile lwà ku ekeleeziya webe aku, Billy, mu maadinda kampanda kuntwaku. Kùtu bitaata bya mashinyi mwab'ewu a mafumine ku nseka yònsò ya ditunga.”

Mêmè ngamba ne: “Eyowa's.”

26 Umwe *apa* ne umwe *pààpa*, ki mùndì ngeela meeji ne ki mwikalà Mukaji-musela nanku. “Babidi mu budimi; nêngàngatè umwe, nshiye umwe,” ne bikwabo.

Nenku mêmè—mêmè ncìtu munange bwa bantu kwikalabo bendesha mashinyi mu njila ya mabwe a mashika ayi to.

27 Ne ndi mumanye ne, nansha mêmè paanyi, ne anu paanyima paa Noël apu mpindyewu, nêngìikalè—nêngìikalè ne cya kuumuka, kuya mu budimi bwa bwambi, bu Mukalenge mwa kwanyisha. Ndi ne masangisha matwe ku dikumi ne ataanu àdì malongolola patùdì twakulangana apa.

28 Nenku ndi njinga kumanyisha bwa ne, mu dyalumingu dilwalwà edi, bu Mukalenge mwa kwanyisha, ndi muswe kulongesha pa Diyishi didi ditambe kwikala dya pabwadi, bwanyi mêmè. Ndi munkaci mwa kulonga, lumingu elu ne lumingu lùvwà ludyànjlè alu, pa maalù malonda a Bible. Nenku ndi njinga kwakula pa cyena-bwalu cya *Bwena Kilistò Bùbèngàngana Nè Bumpàngaanù*, pa nanku, anyi, *Dikuukwila Dyà Mpìngù*; mu dyalumingu dilwalwà edi.

29 Ne pashiishe dyalumingu dîdì dilondà edi ndya Mulaadilu wa Noël, dyalumingu didi dilondà edi; nenku mu dyalumingu, lumingu lukwabo lwàlwa, ki dîndì njinga kwamba, numfwileku luse. Dyalumingu, lumingu lukwabo lwàlwa, ndya Mulaadilu wa Noël. Mpindyewu mêmè mulaye Diyishi kampanda, kadi

bòbò, bamwe baa ku balunda baanyi bàdi bàfùminà ku Alabama ne ku Mississippi ne ku Géorgie, ne ku nseke aku mushindu awu abu, bânà batekete's n'cya bushuwa ne nebatekeshiibwe mu maboko bufuku bwa Noël abu. Kadi bu Mukalenge mwa kuteeka pa mwoyi wanyi bwa kutwadila ekeleeziya Diyiiisha dya Noël, nênditwâlè dibà adi, bu Nzambi mwa kwanyisha, ndi ndaya ewu yònsò udi pambelu paa cimenga awu, nwamonu's, nênnütùminè mêmè mwine mukaba wa mèyi, nwamonu's. Pa nanku kabyakukengela bwa nwênù kushiya bânà beenu balela nkayabo kumbelu bufuku bwa Noël abu to, bufuku bwa Mulaadilu wa Noël abu. Nenku dibà adi mêmè—mêmè nênnütùminè mukaba wa mèyi awu, ku mfranga yànyi mêmè, nwamonu's, bwa disangisha. Nenku ikalaayi anu bavuluke bwalu abu.

³⁰ Cikwabo cintu, nudi bamanye's, kwêna—kwêna mwa kutekemena ne bantu bònsò nebiitabuuje byònsò byùdì wamba to. Kabyena anu—kabyena anu bikumbana mushindu awu to.

³¹ Ndi mupwe mwoyi mu dinda emu, mujuuke lukasalukasa ngenda ndiipata, bwa kufika kaaba aka. Mbyenzeke ne ngambule mèsù. . . Mwaneetu Wood ngudi mulwe ne mukajaanyi ne bònsò abu. Mêmè—mêmè kutangila, nenku dibà dikaavwa anu pabwîpi ne kukumbana dya kubanga disangisha kaaba aka, bwa mêmè kubwela. Ki kungambilabo, Billy uvwa mumbiikile makeelela diloolo awu, wamba ne bàvwa bàjinga bwa ngiikalè kaaba aka mu dinda emu, bwa kuteeleja kubala kwa mulubu mufunda wa disangisha dishààle ewu.

³² Mvwa ne cya kulwa ne bwalu bulonda kampana, anu bwa kuteetaku kulongolola cintu kampana cîndì mwambe. Nansha wêwè muteete kucitookesha mushindu kaayi, kùdì anu muntu kampana udi yêyè kayi ucyumvwa to. Mbwa byoshelu mu ekeleeziya. Nwamonu anyi? Muntu kampana uvwa wamba ne: “Mwaneetu Branham kàtu yêyè witabuujà cyoshelu mu ekeleeziya to.” S'ncya bushuwa ne mêmè ntu ngiitabuujà cyoshelu mu ekeleeziya. Nwamonu anyi? Kadi byoshelu kabivwa mwaba wivwà bantu bàlwa bwa kusambidilaku to. Kacya kakùvwakù dibiikilangana dya ku cyoshelu nansha dimwe dyanzeka to, mu kicondo nansha cimwe, mu Bible. Cintu bu nanku kacitukù to.

³³ Nenku ndi muswe kunutwadila, mu dyalumingu dilwalwà mmungàànütwàdilà, mu bwalu bulonda bwa ekeleeziya wa ku cibangidilu, cìvwà cyenze ne kakwikadi byoshelu mu ekeleeziya. Mbwalu, kupona mikookwela ku cyoshelu mmushindu wa dikuukwila wa bampangaanu, ne kî mmwenenu wa bwena Kilisto to nansha kakese. Mpindyewu, nêngàakulè kabidi, pa bwalu abu, mu dyalumingu dilwalwà edi. Kadi kakùvwakù byoshelu mu ekeleeziya wa ku cibangidilu to, bwa kwenza mabiikila a ku cyoshelu miine awu. Kakùvwa cintu nansha cimwe to anu cibambalu munda mutupu. Kwajiki. Kakùvwa

nî nnkuruse, nî ncinyi, kakùvwa cintu nansha cimwe to anu panshi palàndàkàne. Bantu bàvwa ng'Ekeleeziya wa—wa mpenta mu matuku a ku cibangidilu awu, mûngàànùtwàdilà maalu a bafundi baa maalu malonda bashiileshiilangane, mu dyalumingu dilwalwà edi, bu Mukalenge nwa kwanyisha. Ne ndi muswe kunutwadilaci cyangata mu mukanda wa *Èkèleeziyà Wa Beena Lwendu Bàà Ku Cibangidilu* wà Ironside, ne mu mukanda wa *Baabùlònà Yìbìdì* wà Hislop, mu *Baataatù Bàà Kumpàlà Kwà Nicée*, *Nsangilu wa Nicée*, kaa, bidi bûngì cyanaana, mifundu ya Hazelttime ya ekeleeziya wa ku cibangidilu, ne ya bakwabo bashiileshiilangane, nudi numona's. Bwa kunuleeja ne mwaba nansha wùmwe. . .

³⁴ Nansha mene mu Irlande, mûndì muye kamona amu, mu ekeleeziya udi beena Katolike bàmbùikila ne mmusantu wa Katolike amu, Patrick Munsantu, kadi kakwenaku nansha kasunsukila kamwe kaa bwalu bulonda kaaba nansha kamwe kàdì kàmba aci to. Mwine Patrick Munsantu awu uvwa anu mutontolodi cyanaana wa ekeleeziya wa cyena Loomo. Kacyènakù kaaba nansha kamwe to. Muntu nansha umwe kèna mwa kutwalaku bwalu bulonda nansha bumwe bùdì bùleejà ne—ne yèyè uvwa mwena Katolike to. Yèyè, byende yèyè, bilongelu byende byònsò bìvwa bisanganyiibwa mu Irlande wa ku Nord. Pashiishe pàakalwà mukalenge wa bumfumu bwalabale wa cyena Katolike ewu kubwela mu Angleterre, ki kushipaye beena ku cya Patrick Munsantu binunu dikumi. Ne ekeleeziya awu ùcìdì anu usanganyiibwa mwaba awu leelu ewu, bilongelu byende abi, byònsò mu Iralande wa ku Nord.

³⁵ Ne myaba yinùdì nuumvwa bamba ne: “Patrick Munsantu wakiipata nyoka yònsò mu Irlande” ayi, nudi bamanye ne civwa ncinyi anyi, bulelela bwa mu maalu malonda abi pa bwine bwalu abu? Yèyè uvwa mwitabuuje Mpenta, uvwa ne bukole bwa kukwata nyoka ne byanza awu, kukwata nyoka ne byanza. Nenku ki bwa cinyi mbambe nanku, bwalu paabu kubangila anu apu.

³⁶ Ne cya ne Peetelo wakapoopediibwa pa nkuruse, mutu mutuma panshi, mu Loomo, aci kacyènakù mu maalu a dishipa dya bàakafwilà diitabuuja to. Nenku ndi mukenkete muntu ne muntu, myaba yònsò, ne mubale bafundi baa maalu malonda, byònsò bìndìku paanyi mèmè ewu mumanye abi, kadi kakwenaku Mufundu nansha wùmwe mwambe ne nî m'Pòlò nî m'Peetelo wakashipiibwa mu Loomo to. Awu mmèyì maswika. Byakabangiibwa anu kùdì ekeleeziya wa mbangilu wa cyena Loomo awu, kadi kî m'Bulelela to. Nwamonu anyi? Bidìkù ntùnda ne ngenene. Nèmbwelè mu cyòci aci mu dyalumingu dilwalwà edi.

³⁷ Pashiishe cikwabo cintu cínkaadì muumvumvwe bikole, batamba kucyamba, muntu kampanda mmungambile, muyiishi munene wa mutambe kumanyika, kwambaye ne: “Mwaneetu

Branham, bwa cinyi kwêna ulekelaku bakaji abu mu ditalala?" Yêyè ne: "Udi mumanye's, bantu's bàtu bakwangata wêwè ewu bu muprofeta. Bwa cinyi kuyiku ubalongesha bintu bitumbuke bya Nyuma?" Muntu awu udi mwa kwikala musòmbe kaaba aka. Yêyepù, ndi muswe bwa wêwè kuumvwa eci nunku, mwaneetu. "Bwa cinyi kuyiku ubalongesha bintu bitumbuke bya Nyuma, mûtù wêwè ubànda amu, kadi kubafikisha paabo, ku dibàndamù, pamutu paa kwikala kubambila bya dibenga kukosa nsuki yabo, ne bya mishindu ya nkanzu ya divwala abi?"

³⁸ Wêwè kaaba aka, anyi uteeleja mukaba wa mèyi ewu, mwaneetu, piikalàbi ne ncyèna mpeta mushindu wa kubapatula mu kalaasa kaa bânà banjelo, nêmbàlongeshè makumi makole mushindu kaayi? Bôbò nyawu kabayi banji kupeta nsòmbelu wetu wa kaneemu ewu ne maalu mîmpè a mu nsòmbelu wabo bôbò, bwa kulekelaku nanshà nsuki yabo bwa kuleepayi, ne kuvwalaku nkanzu bu bainàbànà, neubalongeshe maalu a Nyuma mushindu kaayi? Nwamonu anyi? Cya bushuwa. Kabayi bamanye bya ntwadijilu, kabayi bamanye ABC miine. Kadi kuteeta bwa kubalongesha cintu kampanda cya citumbuke, kubapeesha dilongesha dya cilongelu citumbuke, pàdibo kabayi bamanye ABC? Dyambedi bânji bàyiilè ABC, nenku pashiishe netu—netutungunuke tuye too ne ku biine abi.

³⁹ Mpindyewu, lumingu lushaale nuvwa bapete muntu mu—munene mu cyambilu emu, bwa kwangataye kaaba kaanyi. Ûvwa m'Mwaneetu William Booth-Clibborn, udi mumanyike, munkaci mwa bayiishi bônso ne, yêyè ki mfumu wa bayiishi; muntu munene, muiishi munene, munene. Bwa kwamba menemene, yêyè ng'umwe wa ku baa batambe bwîmpè bàdiku mu matunga, nî mpenyi nî mpenyi. Mulumyana awu udi mwa kuyiisha Evanjeeliyo mu myakulu mishiilangane kî mmîngì kî mmîngì mwandamutekete, pa nanku nudi mwa kudifwanyikijila anu cidîye ciine. Ne yêyè mmuyiishi wa Evanjeeliyo mu kaabujima.

⁴⁰ Yêyè ki wâkashààla naanyi mu muiiki wa dikokangana awu, wa ne bayiishi mwandamutekete baa Église de Christ abu musangu awu. Kadi ní kùvwakù bantu bângàakumvwilà luse, bàvwa mbantu abu paanyima paa yêyè mumane kujikijangana naabo. Kacyakacya ncitukù—ncitukù mwanji kuumvwa bya naka to kacya bandela. Kujuukabo ne dijuuka kadi kubangabo dyasa lwendu bwa kuumuka's. Yêyè kuya katwilangana naabo ku mushiku wa mbelu, kwambaye ne: "Paanyi's mvwa ngeela meeji ne nuvwa baswe kwakula pa dyondopa dya kùdi Nzambi."

⁴¹ Kadi yêyè ùtu ne mèyi mashile be, nansha nanku, anu ne mèyi mashile a dikema. Ki kubatwaye anu mènà ònsò àvwàye mumone mwa kubatwa awu, too ne ku "binyonga" ne bikwabo byònsò, nudi bamanye's. Pa nanku, yêyè, yêyè ùtu ne mèyi mashile a dikema, nenku aci ki cintu cimwepele cidì kùdiye. Bu ne ùvwaku mwa kutwisha diine dimanya adi mukele ne ndambu

wa dinanga, nunku's mbishiilanganeku, nudi numona's. Nenku yêyè—yêyè udi mwa kwikala kaaba aka. Eyowa's, kadi cîndî—cîndî muswe kwamba ncyôcî aci, nudi bamanye's, mushindu awu, bu yêyè mwa kwikalaku anu ne kalolo kâàbûngî pa bwalu abu. Kadi, kaa, ekelekele, yêyè's ng'Anglais, ne yêyè mwine's udi mwa kwanji anu kubinduluka eyo.

42 Kadi kuya katwilanganaye naabo mu mushiku wa mbelu, kadi kubafunkunaye munu mumpala, wàmba ne: “Nwênù badidinge anu bamuyòbòle kabidi,” uvwa mmémè awu, yêyè ne, “nènnwèlè patooke kumpala kwa bantu, kadi nnuvwije cya bushuwa kasumbu kaa mpunda ya menemene,” mwakambaye. Uh-huh. Kacya kubangila anu piine apu ncitu muumvwe bateediibwakweee, nwamonu's. Eyowa's, ncyèna mbadyula bôbô to. Nansha mèmè paanyi, mvwa mufwanyine anu kwikala muditole. Uh-huh. Eyowa's, bwalu kwadyakupeta mushindu wa kwambaku dyebe peebe dîyî to, mwaba wùdî Mwaneetu Booth awu.

43 Muiishi wa nkemenu's, muntu wa maalu malenga, mwena Kilisto mwîmpè, mukezuke, muntu wa nsòmbelu mulenga, bwa cyònsò cîntùku paanyi mumumanyine, ne ndi mumumanye kukaadi bidimu. Ndi mufike ku diteelejaku mukaba wende wa mèyî, bìdiye munuyiishe abi, pa bìdî bìtàngilâ mushindu wùvwâ Nzambi wa cijila ne mutumbuke, ne mutùvwâ twètù balediibwe mu mpekaatu; ne civwâ muntu mufwanyineku kwenza civwâ cifwanyine kutwala, civwâ cifwanyine kwambila Nzambi cya dyanza. Nwamonu anyi? Nenku aci's civwa cilenga cya bushuwa.

44 Mpindyewu, civwâ cyenze ne ngùikalè muye pa dîbâ edi, mvwa mupete lumingu lwa kujilaku byakudya ne kusambila, civwâ cinsakeku ku dyangata dipangadika kampanda.

45 Nenku ndi ne mbota mukese kaaba aka, udi ne cya kwikala kaaba kampanda, udi ukòsa—udi ùkòsa bîmvwâ nciyi muswe. Kaa, s'nyêyè ewu. Ki yêyè ewu. Bîndî muswe pa mukaba wa mèyî, ne binùdî kanuyi baswe pa mukaba wa mèyî. Pa nanku, nwênù bânâ beetu, piikalâ mukaba webe wa mèyî munyanguke ndambu, ee, kwikadi... Udi mwa kukosa kuumusha citupa aci. Mpindyewu, kadi mwômò amu, mushindu awu, bààbûngî biikâle munkaci mwa kukwata, pàvwâbi ne Mwaneetu Mercier ne bakwabo nkaayaabu ki bàvwâ mwa, bafwanyine kukwata mikaba ya mèyî, mona's, nunku's mvwa mbàmâbîla bwa kukosapu bitupa bìvwâ kabiyi bikengediibwa kumpala kwa mèmè kuyilekela yipatuka yiya's. Kadi mu eci, muntu kanâ yònsò udi mwa kuyikwata mpindyewu, nudi numona's, muntu kanâ yònsò udi muswe kuyikwata awu udi mwa kuyikwata. Pa nanku bidi bikengela mèmè—mèmè ndikoselebi mèmè mwine, ngenzela ku mbota ewu apa mene, bîndî nciyi muswe kwamba abi, anyi, kubilekela biya pa mikaba ya mèyî ayi.

46 Bwalu, kùdì bimwe bintu bìndì mêmè mwa kunwambila nwênù bônso kaaba aka, bìndì mu bushuwa bwa bwalu nciyiku muswe kupatuka naabi kùdì bantu to. Bwalu, balekelaayi. Mpofo yèyè ulombola mpofo nende, nansha bya munyi, bônso nebakapone mu mùkìdì, nudi numona's. Pa nanku, kanwikadiku nwabalendwisha to. Bu mwàkambà Yesu ne: “Kanulendwishi Bafaalesa abu to.” Yèyè ne: “Bôbò bakeba—bôbò bakeba mfranga ya citadi, pweka nda ukeele ndobo mu mbù, nenku ukwate mushipa wa kumpala awu, nenku upatule cinjanja cya mfranga cìdì mukana mwawu aci, uye ubafute.” Yèyè ne: “Kanwikadi—kanwikadi nwabalendwisha to, nubalekele anu cyanaana.”

47 Kadi mu nsòmbelu wanyì mujima, kacya anu pàncìvwà mwànà mutekete, ntu . . . Mukalenge ukaadi mumpeshepeeshe bikeena-kumona misangu yônso, bitùdì bamanye mwab'ewu mu ekeleeziya emu ne, ndi mutwishiiibwe, mu ditunga mwikalà kabidi mikaba ya mèyì eyi ne cya kuya, bwa bikeena-kumona. Kabidi mwikalè ne Bible ewu mubuulula kumpala kwanyi, ne kumpala kwa Nzambi Mwena kumpala kùndì mwimane, kacya ncitukù mumanye nansha cimwe cya ku byôbì cikaadiku cipangile to. Bitu misangu yônso anu bipwangane.

48 Nenku ndi mupete cikeena-kumona kukaadi ndambu wa mbingu, nebyenze bu mbingu mitwe ku yisatu nanku awu, mpindyewu, mu diibìdì dishaal-. . . dilwalwà edi; cyôci aci kuntuma ku binù, ne ku dipatuka kuya mu mwaba wa cipeela, bwa kujila byakudya ne kusambila. Ki mêmè kuvwala (bu mùvwàku mashika) bilàmbà bya mwinshi bya bujitu bya kabiyi bipicisha mashika to, bwa ngaamona mwa . . . bya kuvwala mu ngendu ya buluwà, bwa ncìikadi ngâlwa kufwa ne mashika, lwà mu nyongolo wanyì amu ne mu meetu. Nenku mêmè kuyaku, kabiyi . . .

49 Muntu kampana kwambaye ne: “Ee, Mwaneetu Branham, uvwa muyeku bwa kakeba anyi? Bivwa bikengela bwa wèwè kwikala muye kakeba cikeena-kumona cya kùdì Mukalenge's.”

50 Mêmè ne: “To, kwèna uya . . . Kwèna ucyenza mushindu awu to. Kwèna mwa kukoka cintu kùdì Nzambi ku bukole to.”

51 Nwamonu's, ki bwa cinyi bantu bàtu anu batungunuke ne kwamba, dîbà dya miyiiki ya babidi, bàmba ne: “Konkaku Mukalenge. Shaalaku wèwè anu ne bwalu abu! Shaalaku wèwè anu ne bwalu abu!”

52 Ngâkapeta Dìyì dya kùdì Mukalenge bwa kutwadila Mwaneetu Neville, pa bidì bitàngilà biprofeta bitùye wenzela bantu bônso bàtù balwa ku cyoshelu eku. Nzambi kumwambila, kumutandisha bikole bwa bwalu abu, nwamonu's. Kanwikadi nwenza nanku to, nenumusake ku dibyenza mu musunya ne dîbà adi nenwikalè ne muprofeta wa mashimi. Nwamonu

anyi? Nwamonu's, numulekelaayi ikalè wènza anu mùdì Nyuma umulombola mwa kwenza amu. Nwamonu anyi?

⁵³ Kanwikadi—kanwikadi nuteeta kukoka cintu nansha cimwe kùdì Nzambi ku bukole to, bwalu kanwenaku mwa kucyenza to. Yèyè neakule anu. . . Bu Baalàmà, muprofeta wa difutu awu, wākamba ne: “Ndi mwa kwamba anu cìdì Nzambi uteeka mukana mwanyi aci. Bwa cyanaana, ncyèna mwa kucyambaku to.”

⁵⁴ Nenku ncintu cyòci cimwecimwe aci, mèmè ndi munange ndongolwelu udibo nende mpindyewu ewu, bwa ngaamona mwa kujandula ne bwalu bùdì cinyi, anu cìdì Mukalenge mufwanyine kwamba bwa kwenza aci. Aci's ncìmpè be.

⁵⁵ Kadi Yesu wakaya mu cipeela, bwa kujila byakudya, paanyima paa Nyuma Mwímpè mumane kulwa pambidi Pende. “Yone wakafila bujaadiki, paakamonaye Nyuma wa Nzambi ulwa pambidi Pende.” Nenku Yèyè wakuujiibwa tente ne Bukole bwa Nzambi, Nzambi munda Mwende, ne pashiishe Yèyè kuya mu cipeela bwa kujila byakudya, paanyima. Kî nkumpala to, bwa ne Nyuma Mwímpè alwe pambidi Pende, kadi Yèyè wakayamu ne wakajila byakudya *paanyima* paa Nyuma Mwímpè mumane kulwa pambidi Pende. Nwamonu anyi?

⁵⁶ Nenku mpindyewu, mu cikeena-kumona aci, ndi mufwanyine kwamba nunku. Nkaadiku muciteele musangu umwe. Nkaavwa muswe kucikosa pa mukaba wa mēyì, kadi ngeela meeji ne nēncilekèlè anupu. Ndi. . .

⁵⁷ Tuvwa bu pa dībà isatu nanku awu wa bufuku, ngeela meeji. Mvwa mujuuke, ne mèmè kutangila mwab'awu, kumpala kwanyi aku, nenku mvwa ngenda mpweka mutangile ku Yadènè. Bivwa bimweka anu bu ne mvwa mwimane pa karta kaa Palestine, ne mwikàle ngenda mpweka mutangile ku Yadènè. Nenku kumwekabi anu bu ne mvwa ngumvwa musambu wa ne, *Ndi Mpweka Mutàngile Ku Yadènè* awu, muntu kampanda mwikàle uwimba. Kadi pângààkaseemenà pabwìpì ne musulu awu, dya ntangila paanyima e kumona njila wúmvwà muvwile, kadi nkaavwa mwenze byabisatu bibidi bya njila bwa kafikaku, ku Yadènè aku. Nenku ntupula mèsù ntangila dyamwamwa dya Yadènè, ki mèmè kwamba ne: “Kaa, Nzambi atumbe, anu dyamwamwa menemene's ki mùdì milayi yònsò yisanganyiibwa! Mulayi ne mulayi wònsò wudi wusanganyiibwa mu Buloba bulaya abu.”

⁵⁸ Ki dībà adi mèmè kwalukila mu mèmè. Ki mèmè kudyambidila mundamunda ne: “Bìdikù mwa kwikala byenzèke bwa mèmè kwikala. . . bìdikù mwa kwikala byenzeke ne mèmè ngìikalè ndoota anyi, bu mùdìbi ne tudì mēbà a bufuku?” Nwamonu's, cikeena-kumona ncintu cyùdì umona ne mèsù ebe awu matabale, anu mùdì ciloota amu, wèwè mwikàle ucitangila buludi, ne wèwè mwikàle—wèwè mwikàle mumanye

ne udi mwimane bu mùdì pa cibumba cya ku cyambilu apa, ne mwikàle—mwikàle mwimane kaaba aka, kadi nansha nanku mwikàle umweka bu udi mu ciloota. Kùdi. . . Kwèna mwa kucyumvwija to, kakwena mushindu wa kucyumvwija to. Nwamonu's, mbyenzi bya Nzambi. Ne njila ya Nzambi kayitu mwa kuumvwijiibwa to. Bìdi bikengela anu kuyitaba ku diitabuuj.

⁵⁹ Pashiishe pâmvwà mwanji kusòmba mwaba awu ndambu, ku luseke lwa nkwasu ewu, pashiishe, dyakamwe, ki cyôci cidi cyalukila cyakabidi eci. Nenku ki mêmè kumanya dîbà adi ne civwa ncikeena-kumona. Nenku dîbà adi pângàabwedi cyakabidi mu cikeena-kumona, kumwekabi bu ne mvwa mutuntumunyiibwe kuulu ne musòmba mu—mu cibeeba kampanda, cibeeba cibumbakane, ne mwaneetu wa balume kampanda. Ncivwàku mumanye ne mwine mwaneetu wa balume awu uvwa nganyi to. Mêmè kukenzakana. Mêmè kwamba ne: “Mpindyewu ngätwishiiibu ne ngaamanyi ne eci ncikeena-kumona, Mukalenge Nzambi udi kaaba aka.” Ki kumwekabi anu bu ne bantu bônso bävwa ne bwôwà's. Mêmè ne: “Bantu bônso badi ne bwôwà nunku bwa cinyi?”

⁶⁰ Ki dîyi kampanda kulwadi ne kwambadi ne: “Kùdi njuwu ya dikema mu matuku aa. Kùdi cintu kampanda cya cibi be cidi ciikàle lufu pàakutuutàci.”

⁶¹ Ki mêmè kuumvwa mikèlè yinyunga bu midyatakaja, ne dya ntangila nunku, kadi ki kamàngalà wa nyoka munenaanaale ewu wènda ùdikòka mu bisoosa amu. Mêmè kwamba mundamunda ne: “Mpindyewu, bu mùdibi ne eci ncikeena-kumona, nenku nêmmônèbi ne eci—eci nnyama anyi nnyama wa lwonji kaayi.” Ki yêyè kudikoka too ne mu cibeeba amu. Nenku ndi mwene anu mmutwishila mèsù, mêmè kumanya ne ùvwa nyoka wa mambà. Mpindyewu, nyoka wa mambà ùtu nnyoka wa mu Afrike, ùtu yêyè mukusume mwikàle ne mênù a lulengu lwa lufu kutamba bintu byônso bitùku ebi. Kakütukù cintu nansha cimwe cya lulengu bu mùdì nyoka wa mambà to. Nenku nyoka, mu bushuwa bwa bwalu, ùdi cimfwanyi cya mpekaatu, lufu. Nwamonu anyi? Nenku kùdi. . . Tutu mu ditunga edi, ne nyoka wa nkànga, ne wa ntòokà, ne wa lwàsà, yàbúngi ya ku nyoka ayi, yitù ne, wêwè kuyi ne bukole bwa mubidi to ne umwe wayi mukusume, ncifwanyine pâmwäpa kukushebeya, kadi ngwêwè kuyi mupete dyakamwe bwanga bwa mushindu kampanda to.

⁶² Ne pashiishe—pashiishe patùdi tubwela mu Afrike ne mu Inde, tudi tusangana nyoka wa mpyapija. Kùtu mpyapija mufiike, awu ùtu nyoka mubi, ùtu pende yêyè awu ne mênù a lufu. Nenku kùtu mpyapija wa kalaabi, udi mumutambidile yêyè awu kule ne kule. Nenku mpyapija wa kàlaabi yêyè, muntu udiye musume awu udi ufwa lufu lwa lwenza bwôwà, ùdi ùfwa bwa dipanga mwa kweyela. Ùdi—ùdi upacisha njila wa mweyelu.

Nenku yêyè—yêyè kèna mwa kweyela to, ùdi ushaala anu mutubule mukana ne ùkòka lupeepe ne ùteeta bwa kweyela, kadi ùfwa mushindu awu. Ne nyoka wa mushindu awu ngukààvwa anu mwambe kusuma Billy Paul, patwakasangana nyoka awu, mu Afrike.

⁶³ Ne pashiishe—pashiishe kùdi kùlwa mambà, yêyè ndufu. Anu pàdiye. . . Yêyè udi lukasa lwa dikema mu mushindu wa kuyiku mwa kumumona to. Ùdi ùlambila kumutu kwa mikèlè aku ne udikupa ne lusongo lwa mukila wende awu. Anu ne, “huush,” mumbè muye! Yêyè udi ùkutuucila mu mpala, pa ciibidilu. Ùdi wimana kuulu menemene kadi ùtuuta bikole. Nenku, pàdiye ùkusùma apu, wêwè udi weyela anu misangu mikese too ne pàdi bwebe bwalu butuuka. Wêwè udi ukùdimuka bikole. . . Kènà anu ukutengununa cyanaana, ne lulengu lubwela mu musulu wa mashi kwajiki to, lùdi lubwela mu tujilujilu, mu byònsò, wêwè umba ufwa anu mu tusunsukila tukese twa kasunsa cyanaana. Nsongaalume ya kuntwaku, nsongaalume milombodi ayi, wêwè udi mwa kwamba anu ne: “Mambà,” bôbò badi mwa kukumakanangana mitu, kwela mikunda, bwalu cidi—cidi ndufu anu mu tusunsukila twa kasunsa tukese cyanaana, nwamonu’s, pàdiye ùkusùma apu.

⁶⁴ Kadi ki yêyè uvwa mu cibeeba ewu. Mundamunda mêmè kwamba ne: “Ee, ki lwànyì lwàkùmbanyi elu.” Pa nanku mêmè kumutangila. Ki kutangilaye ne mèsù a lwonji, ne kudilakaye ne kaaludimi kende aku, nenku ki yêyè ulwàlwa ewu. Kadi mmwenze anu ufika pabwipi naanyi menemene. . . Ùvwa ulwa lubilu, kadi pashiishe kubangaye kulwa bitekete bitekete, ne kuzakalala anu naka kadi kwimana, ne dîbà adi cintu kampanda cívwa cimwimanyikile mu ntanta. Kàvwa ne mushindu wa kunsuma to. Nenku ki kunyungulukilaye lwà ku luseke lukwabo, kuteetaye bwa kuseemenena lwà ku elu luseke. Ki kwasaye dyalukila cyanyima bwa kubangululaye, ne bwa kuvumaye ne kudiyela mûndì, kubangaye kulwa bitekete bitekete bitekete, ne pashiishe kwimanaye, ne pashiishe kudinyukululaye mushindu ewu kadi kwalukilaye cyanyima. Kaakapeta mushindu wa kunsuma to.

⁶⁵ Pashiishe kukudimukaye e kutangilaye mulunda wanyi, nenku ki kudiyelaye mu dilumbatangana ne mulunda wanyi awu. Ki mêmè kumona mulunda wanyi awu utupika udyela muulu mu lupeepele, kumutu kwende ne kumutu kwende ne kumutu kwende, ùteeta, kadi cintu aci ciikàle cimutuuta. Mêmè kwamba mundamunda ne: “Kaa, cyôdi cididìnge anu cimusùme, s’neciikalè lufu lwa cikoso. Kabyena bikemesha to mùdi bantu bònsò biikàle ne bwòwà bukole, bwalu eci cintu cyôci cididìnge cikusùme ndufu lwa cikoso.” Kadi—kadi cívwa anu cimutuuta mushindu ewu, ki mêmè kwela byanza muulu, kwamba ne: “Éyì Nzambi, ikàlàku ne luse kùdi mwaneetu wa balume!” Mêmè ne: “Wawa nyoka yêyè anu mudidinge mumusùme, s’neamushipe.”

66 Nénku anu pa díbà adi ki nyoka awu kukudimukila kúndi pângààkambà nanku awu apu, ne kuntangilaye cyakabidi. Ki Dìyì kufuminadi kuulu kwanyi aku ne kwambadi ne: “Udi mupeeshiibwe bukookeshi bwa kumuswika, yêyè udi mutambe bubi awu, anyi wa mushindu kanà wònsò.”

Ki mêmè kwamba ne: “Ee, Nzambi, cîndi ne cya kwenza ncinyi?”

67 Yêyè ne: “Kùdi cintu cimwepele cyûdi ne cya kwenza: Udi ne cya kutamba kwikala ne meeji matooke.” Nwamonu anyi? “Udi ne cya kutamba kwikala ne meeji matooke.”

68 Mêmè ne: “Ee, Nzambi, mfwilèku luse bwa dipanga dyanyi dya kwikala ne meeji matooke, kadi enzaku bwa ngiikalè ne meeji matooke.” Nénku pângààkeelà cyakabidi byanza byanyi muulu kùdiYe, kulwaku Cintu kampanda cya cinene kumutu kwanyi aku, kuntuntumunaci, kumwekabi anu bu ne mubidi wanyi mujima wùvwa muuja ne Cintu kampanda.

69 Ki mêmè kutangila nyoka awu. Ki díbà adi yêyè kwasa lwendu mutangile kúndi, kadi kayi anu mwa kucyenza to, nansha nanku. Ki mêmè kwamba ne: “Sataana, mu Dîná dya Mukalenge Yesu Kilisto, ndi nkuswika.” Ki nyoka awu, mwîshì wa bleu kubangawu kubuuka wupatuka munda mwende, nénku yêyè kudyenza cikata mwenze cimanyinu aci cyenze bu S, dileeta dinene dya S mukudimane, cimanyinu cya *ne*. [&—Muf.] *Ne* mbwena kwamba ne “swika ewu nunku anyi cyònsò cidi cishààdile kùdiye aci,” bwalu yêyè nguwva mutambe bubi. Mwîshì wa bleu kumatawu wupatukila munda mwende, ne mukila wende ki kumwowawu anu yêyè mwine too ne ku lufu mumujìngile ku mutu, pààkenzàye S wende mukudimane awu apu, cimanyinu cya *ne* aci (cyenze bu mutwangaji, nudi numona’s) kumwowawu too ne ku lufu. Ki mwaneetu wa balume awu kupàndukayè.

70 Ki mêmè kuya kadi kumuboza’s. Mêmè kwamba ne: “Mpindyewu bikengela njandule bwalu ebu, bwalu ncikeena-kumona.” Kadi ki mêmè kukuma bintu pa—pa cintu aci, ki kukudimukaci mushindu *ewu*, kumwekaci bu cikwacilu, pa cikwacilu cya lumwenu pa mbidika, ne kucivwija cishile mùdi ntàlatalà. Ki mêmè kwamba ne: “Anji elabi meeji ku cyòci aci, mùdici cyenzeke lukasa lwa dikema! Mwîshì wa bleu awu wùvwa mmwoyi, ne bikwabo byònsò, wàkamuumuka, bimwenji byònsò, ne bilwe kwandamuka bya mmwenu.”

71 Ki anu pa diine díbà adi, Dìyì kulwa cyakabidi dyamba ne: “Wêwè’s udi mwa kumusuulula kabidi.”

72 Pa nanku mêmè kwamba ne: “Nanku, Sataana, bwa mêmè kumanya, ndi nkusuulula.” Nénku paakenzaye aci, kubangaye kwalukila cyakabidi ku mwoyi, ùdìnyònda. Ki mêmè kwamba ne: “Ndi nkuswikulula, mu Dîná dya Yesu Kilisto.” Nénku pààkenzèkà aci, mwîshì kupatukawu cyakabidi munda mwende,

nenku yêye kudyowa cyakabidi ne kwandamukaye cyakabidi ntâlâtalâ.

⁷³ Ne pathiishe paakenzaye nanku, Dîyî adi kwambadi ne: “Mpindyewu, udi ne cya kwikala ne meeji matooke kutamba audi naawu awu, bwa kwenza cyôci eci.” Dîbâ adi cyôci kungumuka, ne mêmè mvwa mwimane mu cibambalu amu.

⁷⁴ Paanyima paa katanci kakese, mêmè kuumvwa ngonga wudila, ne mukajaanyi ukaavwa. . . munkaci mwa kujuuka ku tulu. Bânâ, nutu anu bamanye mûtubi amu, ngeela meeji, kwenu ku nzubu aku, umwe wâmba ne: “Cîngâàvwâlâ leelu ncinyi’s, maman? Mikanda yanyi yidi penyi—penyi’s? Ne cîndî mwenze ncinyi’s?” Nudi bamanye. Wêwè, anu mùdî dîkù kanâ dyônsò edi, kuyiku mwa kudyumvwa wêwè mwine paudi wela meeji to, bikole be, bu mùdîbo bônso bateeta bwa kudilongolola dyakamwe.

⁷⁵ Nenku—nenku ki mêmè kudifinda kubwela mu nzubu wa mudimu, ki mêmè kutwa binù, ne kwamba ne: “Mukalenge Yesu, ncyêna mumanye bintu ebi to. Kadi cîndî ne cya kwenza ncinyi? Ne bânâ pààbò nebambiikile bwa kabafila mu tulaasa mu katanci kakese emu. Cîndî ne cya kwenza ncinyi?” Ki mêmè kukenzakana, ne Bible wanyi uvwa muteeka mwaba awu, ki mêmè kwamba ne: “Mukalenge, bu Wêwè mwa kumfwa kwôkò luse. . .” Mêmè ncitu ngiitabuuja bya kubuulula anu Mifundu cyanaana, kadi kwangata cintu kampanda mu Bible ne kwamba aci abi to, kadi, kîtu anu misangu kampanda yîtù Nzambi mwa kukukankamikaku ne cintu cya bu nanku awu. Ki mêmè kwamba ne: “Mukalenge, mu bwalu bwa lukasalukasa ebu mpindyewu mene, kumpala kwa Nyuma Webe kungumukaYe, kadi mêmè—mêmè nciyi mumanye cya dyenza to, bânâ nebânjî kwikalapu munda mwa dîbâ dijima, kumpala kwa kwikalabo baye, Udiku mufwanyine kundeeja anyi? Piikalâbi ne cyôci aci civwa ncintu kampanda cyûdî Wêwè uteeta bwa kungambila, Taatù wa mu Dyulu, nanku ngambilâku.”

⁷⁶ Ki mêmè kwangata Bible ewu ne kumubuulula mushindu ewu, ne cyâlâ cyanyi civwa citwe pa Kolinto wa Kumpala, nshapita mwi5, mvensa wa 8, mùdî cintu kampanda cibadiibwa cintu kampanda nunku ewu ne: “Panùdî nulwa. . .” Mêmè mvwa ndilongolola bwa kwenza kujila kwa byakudya, bwa Mukalenge. Mvwa muMwambile ne mvwa mpatuka bwa kuya kenza kujila kwa byakudya. Mbambe ne: “Panùdî nulwa ku fête ewu. . .” Bwalu, kujila kwa byakudya mu mubidi ewu mfête ne Mukalenge. Tudi bamanye aci. “Pa nanku panùdî nulwa ku fête ewu, kanulu ne lwevênâ lukulukulu anyi ne lwevenya lwa budimu nansha, ne bikwabo; kadi nulwe ne dyâmpâ dîdî kadiyi dyela lwevenya dya meeji matooke ne bulelela,” anu menemene civwâYe mungambile mu cikeena-kumona aci’s. “Nulwe. . .” Nzambi m’Mulumbulwishi wanyi wa kakuyi tuseku to. “Nulwe

ne dyâmpà dîdî kadiyi dyela lwevenya dya meeji matooke ne bulelela,” dîdî Dîyi.

⁷⁷ Dîbà adi mêmè kuumvwa civwàYe muswe kwamba aci, pàvwàbi ne Yèyè, kukaadi bidimu, pângàakamònà Bible upweka, ndi naaci cifùnda mwab’ewu mene, upweka, ne cyanza kufuminaci mu Dyulu ne kufunkunaci mu Yoshuwa ne kubalaci mvensa citeema ya ntwadijilu ayi, ne kwimanyinaci mwaba awu: Mbwena kwamba ne, Yoshuwa wakalwa mu cipeela, kadi kàwvakù mwenze. . . yèyè ukaavwa mudilongolole bwa kucyenza, paakafikaye pabwîpî ne Yadènè, Nzambi wakamubiikila ne dîyi dikole, kwamba ne: “Dituku edi ndîndî Mêmè mbanga kukutumbisha kumpala kwa cisamba.” Nenku pashiishe kusabwishaye bânà baa Izaleela Yadènè, ne kubabwejaye mu buloba bulaya mùvwà. . . kubapeeshaye, kubaabanyinaye, buloba bulaya abu.

⁷⁸ Mêmè kuya mu diitu, ne kusambila, kusambila ne kujila kwa byakudya. Nenku, mpindyewu, mêmè kwalukila ku mucu kûmvwà mutuutakeene, mwaba wùvwà nshindi ayi yisanganyibwa awu, yinukaadi bumvumvwe mu Mayiisha makwabo ayi, nwamonu’s, mwaba wùvwà nshindi ayi yisanganyibwa awu. Nenku mêmè mwimane mwab’awu, tukàávwa bu pa dîbà isatu anyi inaayi wa bufuku nanku awu, paanyima paa mêmè mumane kuya ngenda ntetuka mu bisuku mwikàle ne bukênkè bûmvwàku mwa kumona naabu abu, bwa kufika ku mwine mucu awu, mulwe pa bwebwebwe bu mùmvwà mulombodiibwe bwa kukuya. Ki dîbà adi mêmè kutuutakeena Nende. Nzambi, wankwacishaku bwa mêmè kwikala ne nsòmbelu wa lulamatu!

⁷⁹ Nêngìikalè mwa kubala Mifundu yanyi mpindyewu. Ndi mwangate kubala eku mu dinda emu, kufundiibwe apa mu mwaba kampanda, kaa, ncyôci eci, Yoshuwa, mu Mukanda wa Yoshuwa, nshapita wa 10. Bwenu nwènù biikalà mwa kubala nwenda nundonda, anyi, nshapita wa 10 ku mvensa wa 12. Kadi ndi ne dîbà anu dimwepele cyanaana.

⁸⁰ Ne pashiishe, ngeela meeji, ncyèna mutwishiibwe to, kadi ndi ngeela meeji ne Billy mmwambe ne mmwabanye twarta twa disambila mu dinda emu. Mmwambe ne: “Katuvwa twàbûngî menemene to, kadi anu bamwe bantu mbàdî baswe bwa babasambidile.” Nenku bônso bàdî ne twarta twa disambila abu, elaayi byanza byenu muulu mpindyewu. Ee, abi mbîmpè. Kaa? Ee, eyo, mbilenga. Eyo.

Mpindyewu mvensa wa 12 wa nshapita wa 10 wa Yoshuwa.

⁸¹ Nenku mpindyewu, vulukaayi mpindyewu ne, mu matuku àlwalwà kumpala, mu dyalumingu dilwalwà edi ndi muswe kwakula pa *Bwena Kilistò Bùbèngangana Nè Dikuukwila Dyà Mpingù*. Nenku dîbà adi nènzwâmbilè kubangila piine apu ne, Mukalenge mmundombole bwa kuyiisha diyiiisha dya Noël, anyi

kî mmundombole. Mbimweke anu bu ne ndi ne diyiiisha pa mwoyi wanyi bwa bantu, mu Noël. Nenku dîbà adi nènshiishê kunwambila kubangila pôpò apu.

⁸² Mpindyewu tudi tubangila kubala ku mvensa wa 12 wa nshapita wa 10 wa Yoshuwa:

Pashiishe Yoshuwa wakaakula ne MUKALENGE mu dituku dîwà MUKALENGE mufile beena Amòlà mu byanza bya bânà baa Izaleela, ki kwambaye ku mèsù kwa Izaleela ne: Wèwè dîbà, imana pa Gibèònà; ne . . . Wèwè ngondo, mu cibandabanda cya Ayàlònà.

Nenku dîbà dyakiimana, ne ngondo wakashaala kaaba kamwe, too ne paakadisombwela cisamba kudî mwena lukuna waci. Eci kî ncifundiibweku mu mukanda wa Yashèlèlè anyi? Pa nanku dîbà dyakiimana munkaci mwa dyulu, ne kadyakalwijakaja bwa kuya kabwela to pabwipi ne dituku dijima.

Teelejaayaaku mpindyewu:

Nenku kakwakadiku dituku nansha dimwe bu dyôdî adi to kumpala . . . anyi paanyima pààdî, dikaarwàku MUKALENGE muteeleje dîyi dya muntu: bwalu MUKALENGE wakalwangeena Izaleela mvita.

Nenku Yoshuwa wakaalukila, ne Izaleela mujima pamwe nende, ku cituudilu ku Gilègàlè.

⁸³ Nzambi asweku asakidile mabeneshà Ende ku Dîyi Dyende. Mpindyewu ndi njinga, cyôcî ciikàlè diswa dya Mukalenge, bwa nwènù kushaalaayiku naanyi bwa ndambu wa tusunsa. Ndi muswe kwangata cyena-bwalu, cikole bwa kucyumvwa, cya pabwaci, pa kubala kwa Mufundu bu nanku. Nenku ndi dijinga ne ntema yenu ne—ne disambila dyenu munda mwa dîbà edi. Ndi muswe kwangata cyena-bwalu, cya mwaku umwe ne: *Cidikà*.

⁸⁴ Kadi, kumpala, ndi muswe pàmwäpa kuumvwija cidi cidikà ne ncinyi. Mu nkônga-myakù wa Webster, ùdi wàmba ne *cidikà* mbwena kwamba ne “cintu kampanda cya kabayiku mwa kwitabuuya to, kadi cilelela.” Ki cidikà ncyôcî aci. Cintu kampanda cidi cyàmba kwikala cyônsò anu pambelu paa ngeelelu mujaalame wa meeji, kaciyikù cifwanyine kwikala nanku to kadi pààcî ciikàlè nanku; ki cidikà ncyôcî aci. Mpindyewu ndi muswe kushaala ndambu wa tusunsa pa myaku eyi ne, *cidikà*.

⁸⁵ Mpindyewu tudi ne bintu byàbûngi bitùdî mwa kuteela ne mbidikà. Cintu cimwe cîndî muswe kuteela, cidi ne, buloba ebu bwôbù bwine’s neidikà. Mushindu wùdîbu bwimane’s neidikà.

⁸⁶ Makeelela diloolo awu mvwa nyiikilangana ne mwanaanyi wa bakaji, Rebekah, udi mu cilongelu cibândile awu. Ne mêmè mvwa munkaci mwa kulonga mu Mifundu kaaba aka, ne—ne mvwa mmwambila pa kubala kwa ewu—ewu mvensa kaaba

aka. Ki yêyè ne: “Papa, mu bushuwa bwa bwalu Yoshuwa’s wakiimanyika buloba, kî mmwômò anyi?”

Mémè ne: “Ncyèna mumanye ne cyakiimanyikaye ncinyi to. Yêyè wakiimanyika dîbà.”

⁸⁷ Yêyè ne: “Yêyè kavwa mwa kwimanyikaku dîbà to, bwalu dîbà kaditu dyenda nansha.”

⁸⁸ Mémè ne: “Nansha nanku, cimfwanyi cyàdi’s cìtu cikosolola buloba, nenku cyôcì aci’s ki cyaàkiimanyikaye.”

Yêyè ne: “Ee, nanku Nzambi wakiimanyika buloba’s.”

⁸⁹ Mémè ne: “Dîbà adi, bwa muntu udi mupange kwitaba ne Nzambi udiku, cidì cyènzekà ncinyi bu byôbì mwa kwenzeka ne buloba bwîmanè ne bûjimijè bukole bwàbù bwa dikoka dya bintu abu? S’mbufwanyine kudyela mu cibwashibwashi bu—bu mùdì mutooto, ne missiles yàbù’s mmifwanyine kupona too ne mu ntanta wa nkama ya miliyaalà ya bidimu bya bukènkè mu cibwashibwashi.”

⁹⁰ Kadi Bible mmwambe ne: “Dîbà dyakiimana, ne dyakashaala pa kaaba kààdì munda mwa dituku dijima.” Mémè ndi nciitabuuja. Mémè ndi nciitabuuja. Ncicimbè ne kaciyi cya biitabuuja to, kadi m’Bulelela.

⁹¹ Nenku ndi nnulomba nungambilaayi, lusongo lwa buloba ndwèpì, m’Pôle Nord anyi m’Pôle Sud? Nwâmanyi munyi, peenu mu cibwashibwashi? Nudi nwamba ne: “Pôle Sud ngudi kwinshi, mwinshi mwetu twètù.” Bôbò’s badi beela meeji ne Pôle Nord ngudi kwinshi, mwinshi mwabo bôbò. Nwamonu anyi?

⁹² Bwôbù mbwimane mu cibwashibwashi, mu kajengu kakese kaa kapeepa, pàdìbu bunyunguluka mu lubilu kampanda lwa kilomeeta cinunu ne nkama yisambombo ne bya mu njila ku dîbà dimwe apu. Bwalu, kùdì kilomeeta binunu makumi asatu ne mwandamukulu ne nkama yinaayi anyi binunu makumi anaayi mibunyungulukile, kadi bwikàle bunyunguluka mu mēbà makumi abidi ne anaayi, pa nanku aci cidì cyenza ne bwikalè bûya lubilu lupite pa kilomeeta cinunu ne nkama yisambombo ku dîbà dimwe, mu lwendu lwàbù lwa dinyunguluka amu. Ne bwôbù kabùtu bupangilaku to, bùdì bufika anu pa dîbà jaajaaja. Pôpò—pôpò apu ki pàdìbu busanganyiibwa pa équateur, kùdìbu bunyungulukila, kabuyi bupangilaku kasunsa nansha kamwe to; bujaalàmijìibwe anu pa dîbà jaajaaja, bwimàne mu lupeepa. Aci cyôcì kaciyi cidìkà to, mémè ngudi ncìyi mumanye ne cidìkà ncinganyi to. Mushindu wùdìbì byônsò biikàle ndongolwelu ya mu dyulu, mushindu wùdìbì anu bijaalamijìibwe pa dîbà jaajaaja, bipwangane anu menemene; mu mushindu wa ne, mu bidimu bìcìdì bilwa kumpala, bidimu makumi abidi anyi makumi asatu kuumukila ku mpindyewu, beena maalu a mamanya badi mwa kumona dilwa dya lundimbà lwa dîbà ne ngondo, bipitangana. Ne biikàle mwa kunwambila ne, mpa dîbà

kampanda pààpítanganàbi, ne mpa díbà kansanga dyàbangà lwine lundimbà alu.

⁹³ Díbà dya ku diboko ditùdì twètù naadi nansha diikàle dilenga dya bishi, dya dyàmba díbà dijaalame... Ndi naadi mwab'ewu divwàbo bampeeshe mu Swisse, bu matapishi, pâmvwàmú apu. Mushinga wàdì ngwà wìpacila ndola nkama yisatu, mu mfranga ya beena Amerike. Ndidìbo bampeeshe. Kì nkwanji kupita lumingu lùdìbi kabìyi bikengela bwa kwakajulula díbà to; mèbà ònsò a ku cimanu aa, kakwenaku cintu nansha cimwe cìdì muntu mwa kwenza cìdì cipwangane mushindu awu to. Dyòdì adi, mu bidimu bikese cyanaana, nedìikalè dikaadi disunsuke ne bwàdì butuuke. Padìdì dyenda dilala matuku, nedìikalè dyenda dibìipa díbà dyònsò. Twamu netupeewuke. Mushindu wàdì wa kwamba díbà pa dyòdì awu newùdìjikè. Kakwenaku cintu nansha cimwe cìdì mwa kusongiibwa anyi kujaalamijiibwa kùdì muntu wetu ewu, anyi kunoonyiibwa kùdì muntu, cìdì mwa kushaala cipwangane to.

⁹⁴ Kadi buloba ebu bùdì bushaala bupwangane! Ncinganyi cìdì cibukontonona? Ee, wèwè udi wamba ne: “Ncyèna mumanye ne ncinyi cìdì cibukontonona, cìdì cibulama mu kaaba kaabu to.” Ncyà bushuwa ne ncidikà. Bùdì, kwèna mwa kuumvwija mushindu wùdì Nzambi ucyenza to, kadi Yèyè's udi ucyenza. Pa nanku, cyòci aci ki cintu cìdì cya mushinga, cya ne Yèyè ngudi ucyenza. Ne twètù tudi bamanye ne ki mudìbi.

⁹⁵ Ncyà kabayi mwa kwitabuujaku to bwa mushindu wùdì wèwè mwa kunyungulula ndundu mu lupeepa, kayiku mwa kunyunguluka pa yèyè mwine kaaba kamwekamwe aku to.

⁹⁶ Mwawa mwab'ewu ngeela meeji, kukaadi ntanta, pâmvwà nsanganyiiibwa mu cipeela. Nenku kàmwè kaa ku tuntùlu tukese twa kale tùdì tutupika etu tùdìbo bakoka buludi kùdì acides yìdì mu mashi ebe ayi, kàmwè kaa ku tuntu atu kuntupikilaku. Ne kwèna mwa kukalamunaku to, bikengela bwa wèwè kwangata cintu kampanda ne kukakoona. Ne kòkò aku kadi ne tumpoopu tukese pambidi apu. Nenku nansha wèwè munoone kashingi bilenga mushindu kaayi, kashingi nekacipale ku lusongo aku; disongoloka dipwangane dya kashingi nansha dipwangane menemene mwebe mwònsò mùdìku peebe mwa kudyenza amu, nekìikalè kacipale, paudi ukàfwànyikija ne kàmwè kaa ku tuntùlu tùdì tutupika atu. Kadi pààkù's nkabeji, kòkò kiine, kiikàle kadivunge, bikole ndendende. Mmunyi mùdì bufuki bufwanyine kuvunga kabeji bikole ndendende ne kukàvwija katwe bikole, ku lusongo aku, kutamba ne mùdì mashinyi malenga mwa kukàsongoloja? Kadi, pààbi, anu ku ndekeelu menemene kwa lusongo lwine alu kùdì tumpoopu tukese twenze bu tundòbò twa diloba naatu mishipa, mushindu ewu, tumpoopu tukese bwa kukàlama kòkò aku, ne bwa kudilamaku kòkò kiine muntwamu pàdìku kenda kaya apu. Kaa, cidikà's we,

cya bushuwa's, bwa maalu a mamanya. Ncya kabayi mwa kwitabuujaku to, kadi ncilelela.

⁹⁷ Ndi muswe bwa muntu umvwijeku eci. Ncyêna mufwanyine kunwambila menemene bûngi bwa kilomeeta, anyi ntanta wa kilomeeta yidi maalu a mamanya amba ne ngondo udi usanganyiibwa kule ne buloba to. Kadi ngondo mwine awu, mûndi mufwanyine kwamba's, mmunyi mùdiye mwimanyine mu ntanta wa mìliyô ne mìliyô ya kilomeeta kule ne buloba, kadi mufwanyina kwikala ukontonona dibàndà ne dipweka dya mâyi a mbû adi? Ncinganyi cidi cicyenzeja aci? Cidi mene mwa kwenzeka mushindu kaayi? Ncidikà, kadi pèètù's tudi tutangila ne tumona ne ncyenzeke. Cidi cyenzeke. Ngondo ngutu ukontonona dibàndà ne dipweka dya mâyi a mbû. Pàdi ngondo utwa kumpala utwa paanyima mushindu ewu apu, ùya kule ne buloba, dibàndà ne dipweka dya mâyi a mbû adi didi dimulonda. Ne Nzambi mmuteeke ngondo kumutu kwa dibàndà ne dipweka dya mâyi a mbû, ne muteeke mikàlù. Ne ôwò kaenaku mwa kupita mukàlù wa mwaba wùdi Nzambi muteeke mukàlù awu to, mwambe ne: "Wèwè mbû, udi mwa kuseemena to ne *apa* nunku, kadi kwêna mwa kuya kangata cikwabo citupa aci to, bwalu Mémè ndi nkuteekela mulami kumutu kwebe."

⁹⁸ Ngondo awu, mu ntanta wa mìliyô ya kilomeeta ne buloba, ùdi ubiikila mbû awu, ne mmumuteekele mikàlù mwikàle umukontonona. Kaciyi cya biitabuujaku to! Ncinganyi cidi pa ngondo apu? Pààbi's, anu mu ntanta wa kilomeeta mikese cyanaana ne buloba, dikokiibwa dyònsò dya kùdi buloba, kapeepa kònsò, bintu bikwabo byònsò, bidi byumuka, bibwela mu cibwashibwashi mùdi kamuyi nansha kapeepa to, too ne mu ntanta wa mìliyô ne mìliyô kuvudija ku mìliyô ya kilomeeta. Kadi, nansha nanku, ùdi ubukontonona! Wamba ne: "Udi mwa kuya too ne mu ntanta kampanda, kadi kwêna mwa kuya kule kupita apu to, bwalu mémè ndi mulami muteeka kùdi Nzambi. Mémè ndi mukenkeci udi musòmbe mwab'ewu, ne wèwè kwêna mwa kupita mikàlù eyi to." Umvwijaayaaku aci tung. Aci's ncidikà, mushindu wùdi Nzambi wenza ciine aci awu, kadi pààbi's Yèyè udi ucyenza. Kabeena mwa kucyumvwijaku to.

⁹⁹ Tutu ne cikondo cya movù wa mashika, nêjè pa buloba, bukwate mashika, panshi pashàale dibwe dya mashika. Kaadimiinu kakese, ne munda mwa kiine kaadimiinu kakese aku mùdi musanganyiibwa kaamùtòlokù kakese kaa mwoyi, ne kiine kaadimiinu kakese aku nekakwate mashika kàshaalè dibwe ne nekakanguke, ne byamunda ne bipatukemu. Kadi mùtòlokù wa mwoyi awu newushaale mu lupwishi, mu mushiki wa dibwe dya mashika amu mùdi mufwanyine kushipa mwoyi kanà wònsò ewu. Mmunyi mùdiku kalamiibwe, ne pashiishe kalwa kupatuka cyakabidi mu movù wa bintu bitoloka? Katwenaku mwa kuumvwija aci to, s'mmwòmò's? Ncidikà.

¹⁰⁰ Patùdì twangata Ebelu, nshapita 11 ku mvensa mwi3, tudi tuumvwa mwab'awu ne Bible udi wamba, Pòlò ngudi wakula, ne: “Buloba bwakenjiibwa ne kubungakajiibwa ku Dîyì dya Nzambi,” cidikà, cya ne Dî—Dîyì kampanda divwà mwa kwakula ne kuumukila ku Dîyì adi kùvwa mwa—mwa kudivunga bintu bya mubidi, “mu mushindu wa ne bintu bìdì bimweneka byakenjiibwa ku bintu bìdì kabiyi bimweneka.” Bintu bitùdì tumona, bivwa n'Dîyì dyakula dya Nzambi. Buloba n'Dîyì dya Nzambi. Mici n'Dîyì dya Nzambi. Mbwà cinyi butùdì bafwanyine kuciina bwa kweyemena Ewu udi mufile Dîyì dya mushindu awu, diikàle ne Bukole bwa dikema ne bukookeshi? Mbwà cinyi butùdì bafwanyine kuciina bwa kudyangacila Dîyì adi ne kuDiteeka pa bìdì bitùtàngilà twètù biine? S'bidì bileeja ne mpenyi patùdì badishindile, mu bupidya. Dîyì, Dîyì dya Nzambi, cidikà! Cidikà anu cyetu cya bushuwa eci, Dîyì dya Nzambi.

¹⁰¹ Kabidi, ndiku njinga kuleeja lukasalukasa cidikà kampanda, ne piine apu mpààkabiikilà Nzambi Abraham ne kumwambilaYe, pakaavwaye ne bidimu lukama apu; ne Sarah ukaavwa ne bidimu makumi citeema, bidimu makumi anaayi paanyima paa cikondo cyende cya diya ku mashi cimane kupita. Nenku Abraham, mwena mwoyi wùkaavwà anu mumane kufwa awu; ne Sarah, mwine uvwa nkumba anu kwine kwònsò aku awu, ne matrice ende àkaavwà mamane kufwa awu. Kadi pààbì Nzambi uvwa mwambe Yèyè ne, ku bóbò, nkùvwà mwànà mwa kulediibwa. Aci's ncidikà. Konkaayi ngangabuka, mukaji wa bidimu lukama, nî mmufwanyineku kukolesha mwànà, kulela mwànà. Kacyena mwa kwenzeka to, kacyenaku cya biitabuujja to, kadi yèyè wakalela bwalu Nzambi wakamba ne nealele.

¹⁰² Ncintu cya kabayi mwa kwitabuujaku to, bwa kwela meeji ne Muntu uvwa mufwanyine kwikala musòmbè ne nyima Wende mwela ku ntenta, Mwenyi mwikàle ne lupwishi ku bilàmbà Byende, ne kwambila mukaji, uvwa usanganyiibwa munda mwa ntenta lwà mu ndekeelu mwamwa, bivwàye wela meeji. Cidikà, cya kabayi mwa kwitabuujaku to, kadi pààci cilelela.

¹⁰³ Cívwa cya kabayi mwa kwitabuujaku to, pààkayà Abraham ne Izaka ku lusongo lwa mukuna, mwanende umwepele mulela, kadi kubàndayè nende ku lusongo lwa mukuna aku, bwa kumulambulaye bu mulambu wa mashi. Nenku paakafikaye ku lusongo lwa mukuna aku, ne kulaadikaye Izaka pa nkunyi, yèyè mumane kudilongolola bwa kumushipa. Kadi pakaavwaye upwekesha cyanza cyende, Cintu kampanda kumukwataCi ku cyanza! Nenku kùvwa cimpanga cya mukooko cikàlàmine ku nsengu, mu cipeela, pa lusongo lwa mukuna apu. Cidikà's! Cimpanga cya mukooko aci civwa cifumine penyi? Mmunyi mùvwàci cifwanyine kwikala mu ntanta wa kilomeeta lukama ne makumi asambombo kule ne bantu kabayiku bacishipe? kùdì nyama ya ntambwe ne—ne mibwabwa, ne mbwà ya diitu ne nyama ya lwonji, ne bikwabo. Cívwa cifumine penyi? Cívwa

cikafike kwine kuntwaku bishi, kwine ku lusongo lwa mukuna kuvwà kakuyiku mâyi aku? Bwa cinyi kacivwakù pàvwàye wangula mabwe apu? Yèyè kwinyika mwaba awu dînà ne *Yehowah-yilè*, “Mukalenge wăDìpetèdì Yèyè mwine mulambu wa mashi.” Kaciyi cya biitabuujaku to kadi pààci ciikàle cilelela anu cya menemene eci, bwalu Yèyè, udi *Yehowah-yile*. Bintu bìdì kabiyiku bya biitabuuja to ku dyetu dimanya ne ku maalu a mamanya, kadi pààbì biikàle bilelela! Cidikà cinene’s!

¹⁰⁴ Cìvwa ncidikà, kabidi neciikàlè anu cidikà, pàvwà Yesu, mu Maako 11.22, anyi, 23; pààkambàYe ne: “Wèwè mwambile mukuna ewu ne: ‘Tentemuka,’ ne kuyi wela mpatà mu mwoyi webe to, kadi witabuuja ne ciwàmbi aci necyenzeke, udi mwa kupeta cyùdì mwambe aci.” Ncya kabayi mwa kwitabuujaku to, kadi’s ncilelela. Ncidikà.

¹⁰⁵ Swayi ngiimaneku mwab’ewu bwa kwamba ne, mu diitu mwamwa, musòmbe ku luseke lwa mucu awu mu dinda amu, kakùyikù nshindi mu diitu amu nansha umwe to, kadi pààkaakulà Dìyi kampanda dyamba ne: “Amba mwaba wikalayi mwa kwikala”!

¹⁰⁶ Nenku mwaba awu, ndi ngambilamu, bu mêmè mwa kufwa kumpala kwa mêmè kujikija diyiisha edi, mwikàle mfunkuna munu ku dibwè dya ngaji, dya mukòma, mêmè kwamba ne: “Neasombele anu *pààpa* naka,” ne ki yèyè awu! Kaciyi cya biitabuujaku to, kadi cilelela!

Yèyè kwamba ne: “Udi ulonda neikadilè penyi?”

¹⁰⁷ Mêmè kwamba ne: “Lwà mu bikùtùkùtù bya bilumyana byabya mwamwa,” nenku nciyiku nansha mwanji kupwekesha munu to kadi ki yèyè awu mwaba awu!

“Udi ulonda neikadilè penyi?”

¹⁰⁸ “Pa cikuuku cìdì mu budimi bwabwa cyacya.” Ne ki yèyè awu mwaba awu! S’ncya kabayiku mwa kwitabuuja’s.

¹⁰⁹ Mvwa nkonka mukajaanyi, dinda kampanda. Mêmè ne: “Munanga wanyi, mêmè ewu ndi mujimije lungenyi anyi? Ndi ngenda ndwa mupâle anyi? Cìdì kaciyi cyenda naanyi bîmpè ncinyi? Bwa cinyi ndi ngamba bintu bîndi ngamba ebi? Cîndi ngenzela bintu bîndi ngenza ebi ncinyi? Cìdì cingenzejà ncinyi?” Mêmè ntu munange bantu, kadi paanyi mwikàle anu mbavingila panshi’s. Kadi ntu ngenza kujila kwa byakudya ne nsambila bwa ncilekeleku; kadi pândi ntamba kwenza kujila kwa byakudya ne kusambila apu, kadi ki kutambabi kubiipa’s. Kaciyi cya biitabuujaku to, kadi ncilelela’s! Ncilelela.

¹¹⁰ Nyawu mfuma ku dimona muntu mukaji wela cyanza muulu anu pa dîbà adi, mundekeelu mwa citanda mwamwa, utumbisha Mukalenge. Úvwa ng’Hattie Wright, udi musòmbèle lwà mwaba wawa naka wawa. Piine apu, yèyè uvwa ne bânà baa balume babidi, bu bôbô mwa kumfwilaku luse bwa pândi ngamba

bwalu ebu, nsongaalume mipidyè diitabuuja, ya maalu a pa buloba. Mukaji mukese awu musòmbè mwaba awu dituku adi, mukaji mukamba. Ki mèmè kwamba ne: “Hattie, Mukalenge Nzambi. . . wèwè wambi cintu cijaalame. Yèyè nguvwa mufile nshindi ayi. Yèyè udi Yehowah-yile.”

111 Kwambaye ne: “Aci kî ncîngà cintu to anu Bulelela bwetu bwa Nzambi ebu!” Kaa, yèyè uvwa mwambe cintu cijaalame! Bidì bimweka bya kabayiku mwa kwitabuuja to bwa muntu wetu wa maci ne mèsù ewu mufwanyine kwamba dîyì. . .

112 Anu mwânwâmbidì Mwaneetu Booth amu. Twètù aba anu mutùdì ne manyaanu ne bakooyike emu, Yèyè udi Nganyi udi musòmbè dyamwamwa dya ngondo ne dya mitooto, ne dya cibwashibwashi cyònsò ne cikondo ne Cyendelele awu? Anu mwâcyâmbì mene Booth amu, ne mèmè ndi mubale cintu cyòci cimwecimwe aci dituku adi, mbala Irénée ne, nansha mene Banjelo badi ne manyaanu ku mèsù Kwende. Tudi banganyi’s twètù?

113 Kadi muntu mukaji wàmba cintu cijaalame cyàkalengà mwoyi wa Yehowah. . . wâkamba ne: “Mukonke cidiye muswe, ne dîbà adi wèwè umupeesheci.” Amen. Kaciyi cya biitabuujaku to, kadi cilelela! Kaaba aka mene patùdì twakulangana apa ne kumpala kwetu eku kùdi cileeji cya cimweneke ne mèsù: kulombaye bwa misuuka ya bânà bende baa balume kwikalayi beena Kilisto. Nzambi kumupeeshaYe dijinga dyende. Kaciyi cya biitabuujaku to! Aci’s cìvwa ncishima citambe ne cya dyondopa dya mubeedi’s. Aci’s ndishintulula dya nsòmbelu wa muntu, musuuka wende, mubidi, ne cyònsò cidiye. Cyakashintulula mushindu wùvwàye yèyè mwenjiibwe. Kaciyükù cya biitabuuja to, kadi cilelela! Cìvwa ncidikà. Tudi tucimona myaba yònsò.

114 Cidikà mu cikondo cya Noa. Pende, Noa awu, muntu’s, muntu anu wetu wa ciibidilu ewu, kushaalaye muprofeta, anyi ùvwa muprofeta wa Mukalenge, pâmwâpa mwikàle cidime. Nzambi kumwambilaYe ne: “Dìlongòlòlè ku mvula wíkala mwa kufumina mu dyulu,” pàvwàku kakùyikù mvula nansha wa kànà to. Kacya kakùvwakù kwanji kuloka mvula nansha wa kànà to. Kakùvwa mushindu nansha wumwe wa kupeta mvula muulu mwamwa to. Kacya kakùvwakù kwanji kuloka mvula pa buloba to. Kakùvwakù nî mmbû, kakùvwakù nî mmâyì to, kadi pààbì Nzambi wakamwambila bwa kwenzaye bwâtù bwa kusungila baa mu nzubu mwende. Ki Nzambi kulokeshaye mvula pa buloba! S’cìvwa ncidikà. Kabiya bya bipetanganaku ne maalu a mamanya to, kadi (cinyi?) cìvwa ncidikà, nansha nanku. Eyowa’s.

115 Cìvwa ncidikà pàvwà bânà baa beena Ebelu bàkangate dipangadika dya ne nebashaale ne Dîyì dya Nzambi, nansha cinyi cyenzèke, mu mushindu wa ne mfumu awu wakiibaka cikutu cya kapyà cya cyòsha misangu mwandamutekete kupita

mùvwàbo bàcìteemesha kacya kwònsò aku, ne wakakupamu bantu abu. Dìbà adi, lwonji lwa kapyà kaa—kaa cikutu cya kapyà aci lwakashipa bantu bàvwà babànde naabo too ne pa mubangubangu, too ne ku mushiku wa mbelu wa cikutu cya kapyà aci; bòbò abu kufwabo. Kadi nansha nanku bantu abu baakabwela mu cituku cya kapyà aci benda bendakanamu pàmwàpa munda mwa mēbà asatu majima a Kabamba. Bìvwa bifwanyine kwikala bya kabayi bashaalaku nansha kapwishipwishi keetu aka to, bwalu mwoyi wa buntu wùvwà munda mwabo awu nunku's mmubutuke. Pìikalàbi ne kaakafikisha mwoyi wa buntu umwe ku dibutuka, bwa diseemena pabwìpì naaku, ambaayaaku tǔng cìvwàku kafwanyine kwenzela mukwabo mwoyi wà buntu? Kadi baakabakupa muntwamu, kadi twǎnjìbì kwamba ne mmunda mwa mēbà asatu majima, s'cìvwa anu cìfwanyine kwikala mēbà ataanu.

116 Yèyè uvwa mufwanyine kwikala muye kadyaku nshima, mwalukile, ne mwambe ne: “Kangulaayi ciibi cya cikutu cya kapyà aci. Kamwakikalaku mushaale nansha kapwishipwishi kaa balumyana abu to!” Kadi mmwenze anu ukangula ciibi anyi, ki bòbò abu muntwamu, bwalu bubi nansha bumwe kabùyikù bubénzèkèlè to, benda bendakana mu mudilu amu. Kacyi cya biitabuujaku to, kadi cilelela! Bwa cinyi? Yèyè kwamba ne: “Nuvwa babèlè bàngà muntwemu?”

Bòbò ne: “S'tuvwa babèlèmu basatu.”

117 Yèyè ne: “S'nyewu mbamona banaayi.” Ki cyàkenzà cidikà ncyôci aci. “Ne Wawa naka udi ne mmwenekelu wa mwànà wa tunzambi.” Kàvwa mwànà wa tunzambi to; Yèyè uvwa Mwànà wa Nzambi! Bòbò bàvwa bampangaanu. Kaa, Nzambi mu Diyì Dyende dinene's we!

118 Kwakalwa cikondo cìvwà cilwilu cya Nzambi cishààle citulumukangane ne ciikàlè ne bwòwà bwa muntu kampanda, ne mwine awu mwimanyine ku luseke lwa kakuna. Paakenzabo ne muntu umwepele uvwa ne bule misangu yisatu kupita yònsò wa kudibo, ikalè mwimane ku luseke lwa kakuna, wàmba ne: “Mpindyewu nwènù's nudi beeyemene Nzambi mulelela kampanda, munùdì nwamba. Ee, umwe wa kunùdì aku apatuke bwa kulwangana naanyi, nenku katwakwikala—katwakwikala ne bya dyela dya mashi panshi abi to.” Mwena lukuna wa Nzambi ukaavwa mumane kucincimikila ekeleeziya wa Nzambi ku luseke lwa kakuna aku, ne bàvwa munkaci mwa kuciitaba's! Bàvwa ne bwòwà. Bàvwa bintu bitulumuke.

119 Ki mu cituudilu amu kulwamu kalumyana kaa kanyìkanyì wa mùncyòncì, kadijìngìlè ciseba cya mukooko mu cìfuka, cinkutu cya mulami wa mikooko's; muntu wa mutambe bukesè mu cilwilu cijima aci, wa bwalu kayi nansha disalaayi to. Kadi cìvwa ncidikà's, pàakangatà Nzambi muntu umwepele

awu, muntu mukese umwepele uvwa bwalu kabuyiku nansha butangile to. Bible mmwambe ne yêyê uvwa mukunzubile. Muntu mukese umwepele awu kadi kuyiishaye cilwilu cijima cya mwena lukuna aci bimpâmbâmba! Aci's civwa ncidikà. Mbyenze anu bu ne, Nzambi uvwa anu mwa kwikala mupeeshe cilwilu cinene civwà cyènda dyadyadya aci dikima dikumbane bwa kulwangana mvita. Bôbò ní bàvwà basadidi baa Nzambi, kadi mbwa cinyi kubenga kuya kalwangana mvita ya Nzambi? Awu mmwena lukuna wa Nzambi, kwataayi cintakanyi aci! Mbyenze anu bu ne Yêyê uvwa anu mufwanyine kwikala mubapeeshe dikima. Kadi Nzambi wakangata muntu-nkaaya mukese umwepele.

¹²⁰ Nénku vulukaayi, cidikà cikwabo, yêyê kaakangataku mwele wa mvita to. Shawula wakateeta kumuvwadika byende yêyê bya mvita, kuteetaye kumuteeka mwele wa mvita mu cyanza. Mukwacikwetu mukese awu kayiku ne mushindu wa kuwukwata to. Kadi yêyê wakangata ndundu wa nyuunyi, kandundu kakese anyi kaaciseba kakese, kiikàle ne tutupa tubidi twa milemu tuswikilakù. Ki yêyê kucimuna cilwilu cijima cya mwena lukuna aci, ne kubayiishaye bimpâmbâmba. Civwa ncidikà, mushindu wùvwà mwânà wa balume mukese awu mwa kwela cilwilu cyetu eci lubilu.

¹²¹ S'ncidikà. Bushuwa's. Nzambi ùtu ucyenza. Yêyê's mmùle anu naabi tente. Bushuwa, Yêyê mmùle naabi tente. Ki citùYe wenza. Ki Wende mushindu wa dibyenza. Eyowa's, mukalenge. Civwa ncidikà.

¹²² Pàvwà Ejipitu ne cilwilu buneneci mùvwàbo naaci amu, buloba bujima bùvwà bukwaciibwe ku bukookeshi. Bàvwà ne ditunga ne ditunga dyônsò mu byanza byabo bôbò. Kadi pààkangatà Nzambi dipangadika dya kubutula ciine cilwilu aci, kubutula ditunga adi, byakamweka anu bu ne Yêyê uvwa anu mufwanyine kwikala mujuule cilwilu cya beena Amòlà, anyi cilwilu kampanda cya cinene mwaba kampanda, ne mubatume muntwamu ne bya mvita bya bitambe bwîmpè; anyi mwenze nsangilu wa mangumba ônsò masanga ntete, bwa kuyamu ne kulwangana mvita, cyapamwe, bwa Wàmònakù mwa kupeta dimwela dya mu diboko mu kaabujima. Kadi, Nzambi wakakwata mudimu ne cidikà! Wàkangata muntu mukulakaji, wa bidimu makumi mwandamukulu, ne kaakateekaku mwele wa mvita mu cyanza cyende to, anu dikombo dya kale dikonyangale, dyàkatùkijà Ejipitu mwinshi mwa mbù mufwe adi. Kaciyi cya biitabuujaku to, ciine cidì Nzambi mwa kwenza aci, kadi mushindu awu ki wùdiYe ucyenza. Yêyê ùtu ukwata mudimu ne cidikà bwa kucyenza. Nwamonu's, Yêyê ùtu ùya naaci too ne ku cidikà, citupa cya mucu cikonyangale cya mulami wa mikooko pamutu paa cilwilu cya cyenda dyadyadya, bwa kucimuna di—ditunga divwà dikòokeshà buloba bujima adi.

123 Kaa, cintu cimwepele cìdi Nzambi mwindile mpindyewu's, ngeela meeji. Russie kèna ne cidiye umvwija bwa Nzambi to. Yèyè mmuswe kupeta muntu umwepele. Kabyena bikengela kwikalaYe ne malongolodi manene to. Kabyena bikengela bwa kwikalaYe ne mangumba manene to. Yèyè mmuswe kupeta muntu umwepele udiYe mwa kuvungila Nyuma Wende munda mwende! Aci necyàmbè bikwabo byàlondà, nekwikalè cikwabo cidikà; too ne paapetaYe muntu kampanda udi mudilambule yèyè yònsò, wíkala mwa kwenza cyôci aci. Mushindu awu ki wùtù Nzambi wenza Wèndè mudimu, Yèyè ùtu ukwata mudimu ne bidikà.

124 Cìvwa ncidikà pàvwà disalaayi dinene kampanda dya . . . dya Nzambi, dìnà dyende Yehoshafata, diimane mu biibi, mwikàle ne muntu mutwe cìmpìngà dìnà dyende Aakaba, ne kwambaye ne: "Kumpala kwa twètù kuya ku mvita eyi, kî ncintu cìmpè bu twètù mwa kukonkaku Mukalenge anyi?" Mpindyewu, piikalà mwoyi wa muntu awu ne nzala, ya kumanya diswa dya Nzambi, s'kùdi ne cya kwikala diswa kampanda dya Nzambi mu mwaba kampanda.

125 Kabitu misangu yònsò anu ne mu bûngì bwa mibelu mmùdi dikubiibwa to. Aakaba wakamba ne: "Mémè's ndi ne bambi baanyi bònsò. Bònsò mbaprofeta. Nèmbàbiiکیدشè kaaba aka. Kabidi udi mumanye's, mémè mupatwishe baprofeta nkama yinaayi, netupete Dìyì dya Mukalenge." Kî mmisangu yònsò yùdi anu udipeta to, kî mmisangu yònsò nansha.

126 Cyôci kaciyi ne Dìyì to, apu kaayi udisake kule naaci. Nansha bàdimù biikàle bûngì kaayi. Shaala wèwè ne Dìyì adi! Nzambi kèna mwa kunyengaku Dìyì adi to.

127 Mpindyewu, kubapatwishaye bònsò mwab'awu, ki kwambabo ciprofeta bònsò ne dìyì dimwe ne, Mukalenge uvwa naabo: "Ndaaku!"

128 Kadi nansha nanku kùvwa cintu kampanda cìvwà kaciyi cijaalame to. Nenku mulume wa Nzambi awu uvwa mumanye ne kacivwa cijaalame to. Kwambaye ne: "Kwènàku ne mukwabo anyi? Anu mukwabo cyanaana, mwaba kampanda?"

"Kaa," mwakambaye, "tudi nende's, kadi mémè ntu mumukine."

Yèyè ne: "Mfumu kambiku nanku to."

129 Nzambi uvwa musungule nsongaalume umwepele uvwa kayi mumanye mukanda to, ntomboji mukese bwa ditunga adi, mudyombola ne mubengiibwe, bwa kutwadilaye aba bàvwa ne nzala mu myoyi yabo mukenji Wende. Pamutu paa . . . mangumba ônsò pamwe àvwà akula ne dìyì dimwe awu, Nzambi kutwalaYe muntu umwepele. Cidikà's, kadi muntu awu yèyè nguvwa ne Bulelela. Ne cyakajaadikiibwa ne m'Bulelela, bwalu yèyè uvwa ne Dìyì. Cìvwa ncidikà, menemene.

¹³⁰ Mpindyewu wêwè udi wamba ne: “Udi muswe kwamba ne, udi wêwè ubengangana ne *bikampanda* byônsò ne *bikansanga*, ne *bikankenga* ebi anyi?” Byôbì kabiyi Dîyi to, mêmè ndi mbengangana naabi. Ncya bushuwa. Dîyi dya Nzambi kadyàdyàkupangilakù to.

¹³¹ Pâmvwà nyiikilangana ne nsaserdose kampanda, abidi adi panshi aa, kwambaye ne: “Mukalenge Branham, wêwè udi ukeba kwikala ukokangana pa bwalu kampanda mwimanyine pa Bible.” Yêyè ne: “Twètù tudi twitabuuja ekeleeziya, katwena bwalu ne aci to. Twètù tudi twitabuuja ekeleeziya, cidi ekeleeziya wamba aci. Nzambi udi mu ekeleeziya Wende.”

¹³² Mêmè kwamba ne: “Nzambi udi mu Dîyi Dyende. Ne Yêyè udi Dîyi.” Aci’s ncyà bushuwa, Dîyi!

¹³³ Ki bwa cinyi Miikà wakangata Dîyi. Nenku Nzambi wakakwata mudimu ne cidikà kampanda bwa kufwisha dingumba ne dingumba dyônsò bundu, ne wakenza ne Dîyi dya musadidi Wende dyenzekè; muntu umwepele, mudyombola, mubengiibwe, mukinyiibwe! Cinyi? Mukinyiibwe kùdi cisamba cyende. Mpindyewu, yêyè kàvwa communiste to, anyi kàvwa cintu kampanda cikwabo to. Twânjàayi kwamba ne yêyè uvwa mwena Mpenta, kadi cisumbu cya beena Mpenta cimukine. Kabavwaku bamunange to. Kabavwaku nende bwalu to. Kadi yêyè uvwa ne Dîyi dya Nzambi. Nzambi wakacivwija cidikà.

¹³⁴ “Bwa cinyi Yêyè, pùikalàbi ne bantu bakwabo aba bàvwa bapofeta ne bambi, ne bikwabo, bwa cinyi, mu cisumbu cyônsò buneneci eci, kayiku mwa kwangata dipangadika dya cintu kampanda cimpè kutamba cya muntu umwepele? Mbimweneke ne mbya dipanga dya lungenyi pàdì Nzambi mufwanyine kuvwija anu Dîyi dya muntu umwepele ne ki dya cya bushuwa, kutamba dya bakwabo bônsò.”

¹³⁵ Bwalu, dîyi dya muntu awu dívwa Dîyi dya Nzambi. Ki bwa cinyi Nzambi wakenza ne cintu aci cyenzekè, mbwalu muntu awu uvwa ne Dîyi dya Nzambi. Bakwabo abu bàvwa bamba biprofeta bya mashimi. Eyowa, civwa ncidikà pààkangatà Nzambi Dîyi dya muntu mukese umwepele, ne kudivwija Ye dilelela, mbwalu dívwa Dîyi Dyende. Bidi bikengela bwa Nzambi imane ku luseke lwa Dîyi Dyende, kî nku luseke lwa dîyi dya nsangilu nansha. Kadi, Dîyi dya Nzambi, ki mwena ku luseke kùdiYe wimana.

¹³⁶ Yêyè wakangata Miikà pamutu paa cilongelu cijima cya bambi balongesha bimpè, bantu baa luumu. Ncyèna mêmè naabo cilumbu to, bàvwa bantu banene. Bàvwa bantu bàvwà kabayi biitabuuje Nzambi mukwabo to, bàvwa biitabuuje Nzambi umwèumwè uvwa Miikà mwitabuuje awu. Kadi benzè maalu anu bu ne bàvwa baCiitabuuja, kadi kabayi baswe bwa kwangata Dîyi Dyende to. Bwalu, bàvwa baswe kwikala bamanyike. Bàvwa bajinga kwanyishiibwa kùdi mfumu. Nenku

bufofo bwabo bwàkabàpangisha bwa kumonabo Dîyi dilelela dya Nzambi. Mmunyi mùvwà Nzambi mwa kubenesha cìvwàYe mwele mulawu?

¹³⁷ Ne nwênù bainàbànza ne nwênù balume, bônso, kanwikadiku nwela meeji ne ndi ngenza cyôci eci bwa kwikala ne lwonji to. Ndi ncyenza bwa kwikala ne meeji matooke. Ki kabingila nkôkò aku. Mmunyi mùndiku mwa kwamba ne: “Bivwa bikengela bwa bakaji kwikalabo ne...eyo, bàkosè nsuki yabo, ne bintu bya mushindu awu; bàvwalè, bilàmbà byabo abi, aci kacyenaku ne dipetangana naaCi?” Dîyi dya Nzambi’s didi dyamba ne cidi naadi! S’mbya bundu ne dipangila dya ngàsà bwa mukaji awu pàcidiye anu ucyenza apu, kadi Nzambi mwine kaakukwataku nende mudimu to. Nansha yêye wakula mu myakulu bishi, anyi ùtùpika anyi wèla mbila, yêye, kèna ne kùdiye mwanji kufika ne Nzambi to. Aci’s ki Dîyi dya Mukalenge.

¹³⁸ Nwênù balume, nwênù bàdì kanuyi mwa kukookesha nzubu yenu, kadi nukeba bwa kwikala bambi ne balami, mmunyi mùdi mwa kukumbana kwikala muyiishi mu cyambilu, bwa kulombola Ekeleeziya wa Nzambi udi ne mwoyi, ne kubaabanyina bumpyanyi bwabo? Pàdibi ne, wèwè udi utuma ebe meeji anu kwebe kùdì udiila ne ku mulambu wùdì wùbwelà kutamba mùdi wela meeji ku Dîyi dya Nzambi, ne mwikàle umvwa bundu bwa kubyamba kumpala kwa bakaji, umvwa bwôwà ne nkwèpì kuwabenga kwikala mumanyike, Nzambi ìkalèku luse ne musuuka webe mubi awu!

¹³⁹ Ambaayi Dîyi dya Nzambi, mu Bulelela! Yone wakamba ne: “Cisuuyi nciteekiibwe ku muji wa mucì.” Ne cisuuyi n’Dîyi dya Nzambi. “Mucì wônso wùdì kawuyi wukwama mamuma a cya bushuwa awu, bàwùpùlè ne bàwélè mu mudilu.” Nzambi, tûtwadilèku cidikà cikwabo!

¹⁴⁰ Nzambi wakangata Yone Mubatiiji bwa cinyi, mungáfumu ku dicyamba, pamutu paa baakwidi Bende balongesha bìmpè baa dituku adi abu? Yêye wakangata muntu uvwa kayiku mwanji kuya mu kalaasa kacya baamulela. Pa nanku, tudi tuumvwa ne Yone wakaya mu cipeela, pàcìvwàye ne bidimu citeema, ne mushaale nkaayende ne Nzambi.

¹⁴¹ Kukaadi ndambu wa matuku, pâmvwà mbala pa bìdì bitàngilà Nsangilu wa Nicée, aci cìvwa nntanta mule paanyima paa lufu lwa mupostolo wa ndekeelu, Yone Munsantu. Pààkalwà bantu abu ku Nsangilu wa Nicée awu, bamwe baa ku bàna beetu baa kale abu baakafwisha bakwabo bônso abu bundu. Baakalwa kuntwaku, bavwàle biseba bya mikooko; mwaba wùvwà balombodi baa makalenge maalabale baa bavwàle mizabi abu, bu mùdì Constantin ne beepiskopo baa Loomo abu. Biseba bya mikooko bya kale bidijingila mu cifuka, ne bôbò bàvwa basòmbèle mu cipeela, biikàle badya bisoosa, kadi biikàle

baprofeta baa Mukalenge. Kaakeleeziya kakese aku, kaa luseke lwa cyena Ngelika aku, kaakatungunuka e kuya kumpala; wa luseke lwa cyena Loomo yêyê wakaalukila cyanyima. Kadi bìdi bileeja ne, paudi udyà cibanga, kwêna mwa kwikalaku musadidi wa Kilisto to.

¹⁴² Yone. Mu dituku adi, ekeleeziya uvwa wa ngiitabuujiilu wa ku cibangidilu anu wetu wa menemene ewu; bàvwa bôbò ne bansaserdose, bantu balongeshiibwe bîmpè. Kadi Nzambi uvwa musungule muntu uvwa kayi ne kalaasa kalonga nansha kaa kânà to, ne ùvwa ùmupàtwila mu cipeela, ne ciseba cya mukooko cidijingila mu cifuka, ne myedi mikunzubile yônsò, ne nsuki mimulebelele ku nshingu. Kayi ne cyambilu cya kuyiishilaye, kayi ne ekeleeziya udiku mwa kumubiikila to, kadi pàmwâpa ùvwa mwimanyine mu bitoci, byàmba kumufikila mu binù, ne kuyiishaye ne: “Bukalenge bwa Nzambi bukaadi pabwîpî!” Nzambi guvwa musungule muntu awu.

¹⁴³ Pààkambà Yesu ne: “Nuvwa baye kamona nganyi, muntu udi mumanye mwa kwakula mu bilongelu byônsò, muntu muvwale ne ku mênù, ne bikwabo anyi?” Yêyê wakamba ne: “Abu bàtu mu nzubu ya bamfumu.” Yêyê ne: “Cinuvwa bafwanyine kwikala baye kamona ncinyi, muprofeta anyi?” Yêyê ne: “Mutambe ne muprofeta. Ki yêyê uvwa muprofeta mwambe ne nealwe awu ne: ‘Ndi ntuma musanjeela Wanyi kumpala Kwanyi.’” Yêyê uvwa mwa—mwanjelo wa cipungidi. Ùvwa mu—mudyanjididi munene.

¹⁴⁴ Kadi, cívwa ncidikà’s, mushindu wawalwaci. Bwa cinyi kàvwakù mutuulukile ku cilongelu cinene ku Yelusalema kwaka? Bwa cinyi kaakavwilaku kùdì Kaayifa, mwakwidi munene awu? Bwa cinyi kaakalwaku kùdì bamwe bàà ku bantu banene, balongeshiibwe, bàvwa balongeshiibwe anu kacya ku bwânà abu, ne baabo baatatwábò badyànjile kulongeshiibwa kumpala kwabo, ne baabo baatatwábò kumpala kwabo, munda mwa lukongo ne lukongo ne lukongo, balongeshiibwe ne babwejiibwe mu tulaasa, balenga baa dikema, bapiluluja mu mushindu mutumbuke, bakolesha bîmpè abu? Kadi kwangata muntu wa kale mu cipeela uvwa kacya kayiku mwanji kupeta dilongeshiibwa dya kalaasa dituku nansha dimwe to kacya pende baamulela, kadi kumuteeka ku Yadènè kwaka, ne kwamba ne: “Ki—ki yêyê ewu.” Cidikà’s, cya menemene. Kaciyi cya biitabuujaku to, kadi pààci’s cívwa cilelela. Nzambi ngwákacyenza.

¹⁴⁵ Dilediibwa dya kùdì virgo dya Mukalenge wetu adi, kadiyi dya biitabuujaku to, bwa mukaji kulelaye mwânà kayiku yêyê mumanyangane ne mulume to. Nzambi ngwákacyenza. Nzambi ngwákacyenza. Nwamonu’s, ncidikà. Yêyê kwangata mukaji mukese wa kale kuntu kwaka, nsongaakaji mukese wa kale, mubangila kùdì muntu kampanda wa bidimu bitwe ku makumi anaayi ne bitaanu, wa bwalu yêyê mwine mwikàle ne bidimu

bu dikumi ne bisambombo anyi dikumi ne mwandamukulu nanku awu, kadi mubangila kùdì muntu ewu uvwa mulume wa mu lufwila, mwikàle ne bânà banaayi. Ki dîbà adi kwangataYe mukaji ewu ne kumubwikila ne mundidimbi wa Nyuma Mwîmpè, nenku yèyè kwimita munda mwenda amu mubidi wàkasòmbelà Nzambi wa Bukole bwònsò mu ntenta awu. Cidikà's!

¹⁴⁶ Mushindu mwine wùdì Dyulu kadiyi mwa kuMukumbana's! Buloba nciteekedi cya makàsà Ende, Dyulu nnkwasa Wende wa butumbi, kadi pààbì mwikàle mwa kutwala kaabujima kaa Bunzambi mu ciikadilu cya mubidi, kadi kuBubweja mu mubidi munda mwa Muntu. Kaa! Pààdìbì ne, wêwè mwa kufika ku cipidi cya nkama ya mìliyalà ya kilomeeta, ubwela ne mu mìkùngùlù mileemile ya bikondo, kadi kuyiku mwa kufika ku cipidi cya Nzambi to; kadi pààbì mwànà mukese wa mu diboko, mulaadika mu cidiilu cya nyama, wakatwala kaabujima kaa Mubidi Wende—Mubidi Wende. Yehowah! Cidikà! Nzambi munene awu, Yèyè udi musòmbè mwamwa naka awu, bwa kwikala ukontonona mèbà a muulu aa mìliyò lukama miikàle akenkesha pa mabulunga, Yèyè utu kacya kayiku ne ntwadijilu anyi ne ndekeelu awu, kadi mukumbane mwa kudibweja Yèyè mwine mu mubidi, mu cikumbi cìvwà ne tùmvi twa nyama!

¹⁴⁷ Kadi twètù dîbà adi tupatuka tuya kaja maja ne tukanwa maala, ne tutungunuka naabi, mu ditwa dya cyanga! Kí ncyanga to; ndikuukwila! Tutu tutwila Noël cyanga. Mushindu mwine wàkenzà Nzambi ciine aci's, bwa Wàmòna mwa kufwa, bwa kwangata kaaba kaa ngènzàmpèkààtù.

¹⁴⁸ Cìvwà ncidikà pàvwà nsongaalume mukese, wa nsuki mvwangala, kaamuntu kakese kaa makaaya makobame, kàvwà pàmwàpa kakayi nansha bule bwa mètre umwe ne citùpà to; kadi ùvwa ne bipya bya nsuki mwandamutekete bilembelele mu nyungulukilu wa mutu wende awu, kaacilùmaacikàjì kakese. Nenku yèyè uvwa wènda ùpweka ne njila, dîngà dituku, ùya bwa kumonangana ne mulunda wende wa bakaji, kadi nyama wa ntambwe kukungulaye ukeba kumulwisha.

¹⁴⁹ Kùdikù muntu ukààdi muumvwe mùdì nyama wa ntambwe wetu wa cya bushuwa ewu ukungula anyi? Pàmwàpa nukaadi bayùmwè, mu nsanji eyi ne bikwabo muneemu emu. Kadi ndi muswe nnwàmbilè's, yìtu dîbà adi yidila anu nyawu-nyawu wa kampuusu awu. Bìvwa bikengela nwènù kuumvwa mùdì nyama wa ntambwe wa mu cisuku ukungula mukungulu wetu wa cya bushuwa ewu. Mabwe's neakuluke ku kakuna, mu ntanta wa mètres nkama mwandamukulu; nsakalabwa neyibange kupongoloka kuulu kwa kakuna, cìdi cikankisha buloba bikole be. Kùdì diine dikungula adi difumina, ncyèna mmanya to.

¹⁵⁰ Kaa, ngákamòna umwe dîngà dituku's, ùvwa mulembeleje mutu wende awu panshi, ntambwe munene mukole wa musààlâlâ wa kalaabi kukungwilaye wa wa mufiike, bwalu, wa musààlâlâ mufiike awu, bwalu ùvwa mudyapule dipùndâ dya munyiyini. Yèyè kudilekela e kushaaladi mwab'awu, nenku bivwa anu bu mwambe ne: "Mpindyewu ùdîtàngilè ne mèsù cyanààna, nyaaya bwa kwanji kabikulaku ndambu wa mâyi." Ki kuyaye bwa kulaka mâyi. Paakaalukilaye, wa musààlâlâ mufiike ewu ùkààvwâ ùlàkâ dyôdi adi. Taatù mukole awu kwimanaye, kupwekeshaye mutu wende, kadi kushiyaye mukungulu's we, nenku, ngamba ne, mu mushindu wa ne mabwe àkapulumuka pa kakuna. Kaa, ekelekele! Yèyè's mmufwanyine kunyukusha cimenga cijima eci, bu yèyè mwa kukungula mushindu awu mwab'ewu. Mukungulu wa nyama wa ntambwe, kaa, yèyè's udi ne bukole bwa njajama!

¹⁵¹ Nenku ki mukungulu awu kupatukawu bwa kulwisha kâmpimpinyàmâ kaa nsuki mvwangala aka, mutùdiku twètù bafwanyine kukabiikila's, dîbâ adi cintu kadi kwenzeka's. Kâmpimpinyàmâ aka kuyaku tamakatamaka e kumupyaku ku mbàngâ aku, ne kuteekaku cyanza cimwe mushindu *ewu* ne cikwabo mushindu *ewu*, kabiyi bya mubindulukeku to, kadi kumupandululaye anu cyanaana e kumulaadikaye panshi mwab'awu. Aci's ncidikâ. Cìvwâ cyenze bwalu abu ncinyi? Bu nwènù mwa kumona panùdi nubala anu kumpala kwa cyôci aci aku ne: "Ne," mutwangaji awu, "Nyuma wa Mukalenge wakamwikila." Ki cyàkenzâ dishiilangana ncyôci aci. Ne yèyè wakashipa nyama wa ntambwe awu.

¹⁵² Pashiishe dituku dikwabo beena Peleshete kulwabo benda balumbatangana nende. Yèyè kàvwa ne bya mvita to. Bòbò bavwa cinunu cijima cya Kabamba. Bàvwa ne mafuma male ne ngabu minene, miine ayi myenze bu ciibi kumpala kwebe, mushindu *ewu*, miine ngabu ayi. Anji elaayibi meeji ku ngabu munene, munene wa cyamu cya kabanda mpindyewu, bakujìke nseke yònsò kumpala kwebe aku, bavwàle bifulu bya mvita bya cyamu cya kabanda, binkutu binene bya cyamu cya kabanda, ne cyampala cijima cya mikolo yabo aci ne bikwabo byònsò, anu bijìka ne cyamu cya kabanda; mafuma manene, manene male, male anu mùdi. . . akafika too ne ku dikunji didi kwaka dyadya, pàmwâpa a bule bwa mètres ataanu anyi asambombo. Nsongo minene ya cyamu cya kabanda myasaku mushindu awu, mitwe anu mùdi kapaaya amu. Nenku kupetanganabo ne kâmpimpinyàmâ kaa nsuki mvwangala aka kapweka kafumina mu Palestine, ku dikumbula dya mulunda wende kampanda wa bakaji muntwamu. Ki kwambabo ne: "Ki kalumyana aku nkòkò kaka. Tuyaayi tükàkwàtè!" Muntu umwepele uvwa mwa kwikala mukâmbwile anu ku lusongo lwa difuma aku, kukàjuula anu cyanaana kadi kukànyùkulula ndambu, ne kòkò's kàvwa mwa kupona buludi kapweka too ne ku cyanza cyende,

kwinshi kwa cikwacilu cya difuma aku. Mona's, yêyè's uvwa anu kalumyana kaa kakese menemene kaa kale aka.

¹⁵³ Bamwe bantu, bazodi's, bàtu bateeta kuzola Shimishoona mwikàle ne—ne makaaya mu mushindu wa kayiku mufwanyine kukumbana kubwela mu tabernacle emu to. Ee, aci kî ncifwanyineku kwikala bwalu bwa bùkèmesha to bwa yêyè. . . muntu wa bunene abu. Shimishoona uvwa anu kantu kakese menemene kaa kale, kadi Nyuma wa Mukalenge nguvwa munene. Nwamonu anyi? Yêyè ùtu wangata. . . Aci—aci—aci's nkupeepeja kwa Mifundu's, pa kwamba ne yêyè uvwa muntu wa bunene abu.

¹⁵⁴ Nzambi ùtu misangu yònsò wangata anu bintu bicimbè ne bya bunyonga abi bwa. . . mushindu awu, bwa kwenza naabi mudimu Wende, nudi numona's. Yêyè ùtu wanganta cintu kampanda cidi cintu cyanaana aci.

¹⁵⁵ Nenu kalumyana kakese aka kàvwa kiimane mwab'awu, dyakamwe ki beena Peleshete aba kulwa e kumujiŋgabò, bwa bóbò kumushebeya. Ki yêyè kwangata mufuba wa lubanga lwa kampundu lùvwà lùsanganyiibwà mwab'awu, kampundu kaa cisuku, lwa mpunda mukese, kubakulaye mufuba wa lubanga lwa kampundu aku. Nenu Nyuma wa Mukalenge kumwikila. Nenu kwenzekaku cidikà's, mushindu wàkatuutanganàye e kuzengejangana, ne mufuba wa lubanga lwa kampundu awu, kutubula ne bifulu bya mvita bìvwà ne mupimbu wa centimètre umwe ne ndambu pampala pàà mitu yabo abi, ne mufuba wa lubanga lwa kampundu awu! Mona's, cyakumpala, mufuba wa lubanga lwa kampundu wùvwà wùsanganyiibwà mwab'awu awu, anu dituuta dya kumpala òvwàye mufwanyine kutuuta naawu adi, s'wùvwà mwa kwikala musunsulukangane tupese cinunu, pampala pàà cimwe cya ku bifulu bya mvita abi anyi ngabu minene ayi. Piine apu, pààkamwicikidilà cinunu cijima aci pambidi, kadi kubatuutaye e kubashebeyaye bònsò. Cidikà's! Apu mpàvwà Nyuma wa Nzambi mumwikile.

¹⁵⁶ Kaa, twètù aba twìkalapù nanshà mifuba ya lubanga mu cyanza cya Nzambi's we, nunku's nkwenzeke cikwabo cidikà. Eyowa's, civwa ncyòci.

¹⁵⁷ Cìvwa ncidikà pààkangatà Yesu, Mukalenge wetu, bisukwita bitaanu ne tuumishipa tubidi, kubicibulaYe, kudiisha bantu binunu bitaanu. Ne kwangatabo bisaka byùle tente ne bìvwà bishaale, tupese tukese tìvwà bamwe baa kùdìbo kabayi. . . Bàvwa mwa kuteeka mishipa yinaayi anyi yitaanu pa aa meesa, ne milungu ya màmpà yinaayi anyi yitaanu, ne pashiishe bàya *apa* ne bàtèeka milungu ya màmpà yinaayi anyi yitaanu. Ne bamwe baa kùdìbo kabavwa nansha mwa kubidya byònsò to, bàvwa babilekela bitèeka anu mwab'awu. Ki kubyangululabo, byùle bisaka tente. Kaa! Nwamonu anyi? Yêyè wakacyenza bishi? Neya kabayi mwa kwitabuujaku to bwa Muntu wetu ewu

mufwanyine kwangata bisukwita bitaanu ne tuumishipa tukese tubidi, kadi kudiisha bantu binunu bitaanu, ne kwangata bisaka mwandamutekete byûle tente, bidîbo bashiye. Ncya kabayi mwa kwitabuujaku to, kadi's Yêyê wakacyenza. Bwa cinyi? Cîvwa n'Nzambi. Cîvwa ncidikà. Ncya kabayi mwa kwitabuujaku to, kadi Yêyê wakacyenza.

158 Cîvwa cya kabayi mwa kwitabuujaku to, kacya nî nkumpala nî mpaanyima, pa mbû mutuuta kùdi cipeepele cikole, ne mavwala mabànde muulu bikole mu mushindu wa ne cîkaavwa ciînyija ne bwâtù, pààkalwà Muntu wènda ùkòsolwela mu miine mavwala awu. Ndi mwa kumona musangu wònsò wùvwà anu— anu divwala dinene divwà ne ntutu mitooke adi dilwa pabwîpi Nende, ataayika anu cyanaana kadi kupona panshi ditàngilè mwinshi mwa mâyi, ne Yêyê mutungunuke anu ne kwenda, anu bu ne Ûvwa wendela pa mwaba mwela nshaamenda. Wendela pa mbû, mu cikondo cya cipeepele cikole! Maalu a mamanya ànjîbi kudifwanyikijila ciine aci tûng. Ncinyi cîvwà ciMulame kuulu aku aci? Ncinyi cîvwà ciMulame pa mbû awu, pàdîbi ne mbû udi ne bwondoke bwa mètres nkama mwandamukulu mijimà? Piine apu mpàvwà mavwala manene awu, bunene misangu yàbûngi kupita tabernacle ewu, asampuka, mona's, mona's, kuujuwu kaabwâtù kakese aku ne kukuujuwu ne mâyi. Kàkaavwa kabole ne mâyi munda ne paanyima, ne kàkaavwa kàdîina, makunji àvwà miimane macibuke madishinde, ne nkapi yikaavwa miye, ne ditekemena dyònsò dya kusungidiibwa dîkaavwa diye. Kadi ki Muntu kampanda ulwâlwa ewu wènda wendela pa mâyi! Cidikà, bushuwa's, kaciyi cya biitabuujaku, kaciyi cya bumvwija to, kadi Yêyê wakacyenza. Kaa, eyowa's, Yêyê wakacyenza, mulwe wènda wendela pa mâyi. Ncya kaciyi cya biitabuujaku to ne Yêyê umwèumwè ewu. . .

Éyi Nzambi, ndi ntekemena ne eci cidi cibabwelaku!

159 Kaciyi cya biitabuujaku to, cidikà cya menemene, cya ne Yêyê umwèumwè ewu, Yesu wa ku Nazaleeta ewu, mufwanyine kusungula musùmbà wa balobi baa mishipa biikàle binyonga bwa Ekeleeziya Wende, pamutu paa baakwidi balongesha bîmpè ne mangumba a mu diine dituku adi. Mushindu wùvwà Nzambi wa lungenyi lwònsò, uvwa mwa kwendela pa mâyi awu, uvwa mwa kwandamuna mâyi alwa mvinyo awu, uvwa mwa kwangata bisukwita bitaanu kudiisha bantu binunu bitaanu, ne kwangulululabo bisaka byûle tente ne bivwà bishaale abi awu! Mushindu wùvwà Yêyê umwèumwè awu, Nzambi udi musòmbèle mwamwa mu Cyendelele awu, udi ubàlakana bikole mu mushindu wa ne mèbà a muulu miine asokoka mpala yawu kumpala Kwende; dijiba diine dya lungenyi ne bukezuke, ne dyumvwa ne dimanya, Wa kumutu kwa baa kumutu awu! Kadi Yêyê mufwanyine kulwa mu mwaba wùdi bulongolodi bunene bwa maekleeziya àvwà madisangishe pamwe ne malongeshe bantu baabo bònsò, kadi Yêyê mupweke muye kangata musùmbà

wa balobi baa mishipa baa manyaanu ne banunka mpuuya mubole, bàvwà kabayiku nansha bamanye mwa kufunda dìnà dyabo diine, kadi kusungula bantu baa mushindu awu bwa kuteekabo Ekeleeziya mu bulongame bwa Mukaj'Ende musela. Cintu cya cikemesha be, kî mmwômò anyi? Mbyenze anu bu ne, bivwakù bikumbane, bwa Yêyè kwikala mwangate muntu kampanda uvwa mulongeshiibwe.

¹⁶⁰ Yêyè's ki Mulongeshanganyi mwine. Yêyè's ki Udi ucyenza. Bidi bikemesha be mùvwàYe mucyënzè. Pamutu paa kwangata bantu baa mu ekeleeziya, Yêyè kwangata balobi baa mishipa bwa kucyenzabo bôbò. Cya pawaci be, kadi mushindu awu's ki wùdìYe ucyenza. Ncya bushuwa's. S'ncidikà anu cya menemene eci.

¹⁶¹ Pàakangatà Nzambi musumbà wa binyonga apu, mutùdì bafwanyine kubabiikila leelu ewu ne, "bansantu babunguluki baa mu malaba," balanda; mu bintu bya buloba ebu, ne kubiicikijila Nyuma Mwimpè, mu cibambalu cya kuulu; pamutu paa kuMwicikijila Nsangilu wa Tubàdì twa beena Yuda, mùvwà beena teoloji bônso batuule bapuwe, mùvwà bantu bônso banene basanganyiibwa, mùvwà mfumu wa maekleeziya ônsò, mùvwà aba bàvwà balonge Mifundu, ne bajikije cilongelu cinene, balongeshiibwe bîmpè, ne bindile Maasiya uvwa ulwa, ne bamanye ne bôbò ki bàvwà mwa kwikala ewu uvwa mwa kupatuka bwa kutuutakeena Nende, ne kwamba ne: "Maasiya, Wêwè's watuuluku byenze anu bu pa mapwapwa a ndeke, Udi mwikile apa pa bibandilu bya ntempelu, twâKumònu utuuluka mu Dyulu, umukila mu tujila twa ngòlò twa mu Dyulu atu. Mpindyewu twètù bônso tukàadi balongeshiibwe ne badilongolole bwa kuya ku mudimu. Tukàadi bamane kupeta dilongeshiibwa dyetu, tukàadi ne mapolome etu a bu-Licencié, tukaadi ne mapolome etu a Ph.D., LL.D., ne *bikampanda* byônso. Tukàadi bônso balongeshiibwe. Ki twètù aba biimane, binunu dikumi bya Kabamba. Tukàadi badilongolole bwebwe Wêwè. Lwâkwaku! Nyewu tudi bindile, tubiikila ne: 'Lwâkwaku!'"

¹⁶² Kadi pamutu paa aci, Yêyè ùdi ùpweka ne wàngata musumbà wa bantu bàvwà kabayi bamanyeku ne cyanza cya dyabalume ncyèpì ne cya dyabakaji ncyèpì to. Aci's ncyà bushuwa. Kadi kubateeka mu cibambalu cya kuulu, kadi kwicikijila Nyuma Wende, Éyì Nzambi wa yààya, pa musumbà wa bantu baa nanku awu. Pamutu paa kwangataku Nsangilu wa Tubàdì twa beena Yuda, Yêyè kwangata balobi baa mishipa. Kabyenaku bikemesha mùvwàYe kayi mukwate mudimu ne malonga abo a tulaasa awu anyi? Ki mwakasankishabi Nzambi nanku.

¹⁶³ Mbimweneke ne bìdì bisankisha Nzambi bwa kuvwija Ekeleeziya Wende Yêyè mwine cidikà. Cintu cimwecimwe aci ncidìYe munkaci mwa kwenza patùdì twakulangana apa, ùvwija Ekeleeziya Wende cidikà, mwikàle ucinguluka byônso bya binene bya tuyaayi tukamone abi, ne bintakanyi byônso bìdìbo

babiikila ne ng'ekeleeziya ebi. Ne Yèyè neikalè mwa . . . muntu kanà yònsò udiYe mwa kupetakaja mu cyanza Cyende awu, aci necitabaje mèsù abo bwa kumonabo cidi Bulelela, ne kuButeeta ku Dìyì dya Nzambi mu cikondo citùdi ne mwoyi, ne kubateeka mu Mubidi. Cidikà! Nzambi ùtu usungula wa nanku. Ùdi uvwija Ekeleeziya Wende cidikà, bantu baa pabwabo, bantu baa bakemeshangana.

¹⁶⁴ Bònsò bàvwà mu cibambalu cya kuulu abu, baakapatukamu benda baakula mu mwakulu mwenyi, benda batetuka bu bantu bakwacike maala, benda batetuka ne batungunuke nanku. Bakaji, mamw'Èndè muMuledi—muMuledi ne bònso bàvwà mu cibambalu cya kuulu abu, baakapatukamu, benda bakukumina cintu kampanda mu mushindu wa muntu nansha umwe kayiku mwa kuumvwa civwàbo benza to, kuntwadijilu aku. Bàvwà ne ndimi mipanduluke milwe kusòmba pamutu pààbò apu. *Mipanduluke* mbwena kwamba ne “myabuluke.” Muntu nansha umwe kaakumvwaku civwàbo benza aci to. Bàvwà benda bakukumina mwab'awu, ne benza maalù byenze bu ne bàvwà bakwacike maala.

¹⁶⁵ Kadi ki musùmbà wa bantu bàvwà balongeshiibwe mbòbò abu bàvwà biimane mwab'awu, bamanyi baa mabàlà baa Evanjeeliyo, beena teoloji, kadi Nzambi wakasungula (Nzambi) bwa kubangata ne kubashiya basòmbè mu dipanga dyabo adi, ne meeji abo matwe ne malonga abo a tulaasa awu, ne wàkalwa apa e kwangata ewu musùmbà wa bantu bàvwà kabayi bamanye nansha ABC to, ne kubiicikijila Nyuma Wende, kubavwija cidikà. Eyowa, Nzambi ùtu wenza aci, Yèyè ùtu wenza aci mu kiipacila Kende Yèyè mwine. Yèyè udi uvwija Ekeleeziya Wende cidikà. Mémè ntu ngitabuuja bidikà. Ndi mbiitabuuja!

¹⁶⁶ Ndi ngambilamu, Nzambi, ndi ngiitabuuja Dìyì! “Dìyì dya muntu yònsò diikalè mashimi, kadi Edi diikalè Bulelela.” Cidi Dìyì edi dyàmba bwa kwenza aci, tùcyènzààyi mushindu wùdi Dìyì dyàmba bwa kucyenza awu; nansha cyôci cimweka cya lukutukutu bishi, ne nansha wèwè ushaala wa mushindu wa pabwawu, anyi cintu kanà cyònsò cya mushindu awu, wèwè shaala ne Dìyì. Bòbò bakubiikila ne udi wa cyena kale, bakuubiikila *cikampanda*, *cikansanga*, anyi *cikankenga*, cyùdi ubicyukila mene ncinyi's? Shaala wèwè ne Dìyì edi! Edi ki Dyòdi, Bulelela abu. Kwangaci cidi muntu mukwabo kampanda wamba to. Angata cidi Dìyì dyambe.

¹⁶⁷ Mwab'ewu abidi àdi panshi aa, mwambi naanyi kampanda . . . Ndi mfuma ku dyumvwa bamba cyôci eci. Ntu nciitabuuja. Mappingaja kampanda a dîbà dya luuya lukole mu Géorgie mwamwa, ùvwa muye kakumbula mwenji kampanda wa . . . wa manga a lwòndapu. Mwenji wa manga a lwòndapu awu uvwa mwaneetu mwena Kilisto wa kale wa maalù mîmpè, mùle tente ne Nyuma wa Nzambi. Nenku yèyè kwamba ne: “Bwela usombele panshi, nenku tunweku kaa—kaa'Coca Cola.”

Bàvwa basòmbe mwab'awu, munkaci mwa kunwa Coca Cola wabo awu. Yèyè kwamba ne: “Ndi muswe nkulondeleku bwalu kampanda, kadi pàmwápa kwakwitabuujaku ciine eci to.”

“Ee, twǎnjì tùcyǔmwè's, dyambedi,” mwàkambà mwambi awu.

¹⁶⁸ Awu ne: “Mémè ntu nditacisha misangu yònsò bwa kwenza ne mwanyi mwònsò bwa Nzambi.” Yèyè uvwa mulami mu ekeleeziya kampanda. Yèyè ne: “Ntu nditacisha misangu yònsò bwa kwikala ne mwoyi bwa dibiikidiibwa dyanyi, ne kwenza cidi cijaalame.” Yèyè ne: “Kacya ncitukù mwanji kwibila kùdi muntu nansha umwe to. Ntu misangu yònsò anu mfidila Mukalenge wanyi bujaadiki, myaba yònsò ne mwanyi mwònsò.” Ki yèyè ne: “Nkaadi, bwa . . . Manga aanyi a lwòndapu aa,” yèyè ne, “ntu anu muteeteteete bwa kwikala naawu a mushindu mutambe kubàndila àdi àpetekà. Kacya ncitukù mwanji kutwila muntu nansha umwe musinga mupitepite bukole to. Ntu nditacisha anu bwa kwenza kantu ne kantu kònsò kàdi kajaalame, kànkaadiku paanyi mumanye mwa kwenza aku, bwa kukwacila Mukalenge mudimu.” Yèyè ne: “Ndi muswe nkwambile cidi cyenzèke.”

¹⁶⁹ Yèyè ne: “Mwanaanyi wa balume, ùtu ùlonga bwa kushaala pende mwenji wa manga a lwòndapu awu, bwa kumfwana mémè, ùvwa usanganyiibwa kumpala kwa nzubu ewu kwaka dǐngà dituku.” Ki yèyè ne: “Mùvwa mmu cikondo cya lukota.” Yèyè ne: “Inǎbǎnzà mutekete kampanda e kubwelaye mu—mu ciibi amu,” ki yèyè ne, “mùvwa mushindu wa kumona cìvwà lutatu lwende. Ne yèyè mwine uvwa ne difu. Ne bayende, bôbò biine bònsò babidi, bavwàle mvwadilu anu wa lutatu ewu.” Yèyè ne: “Kufilabo kabeji kaa manga kùdi mwanaanyi wa balume awu,” ki yèyè ne, “bwa kukàfidilabò manga, bu mùvwàbi ne mukaji awu bìvwa bimukengela cintu kampanda cìvwàbo bamufundile kùdi ngangabuka. Ki yèyè ne, mwanaanyi kwambaye ne: ‘Eci neciikalè musinga kampanda, *cikampanda-ne-cikansanga*,’ pààkakonkà yèyè uvwa ne cya kwikala tatwènde wa kàdimùndà awu ne: ‘Neciikalè musinga kaayi?’ ‘Musinga *kampanda*.’ Yèyè ne: ‘Mukalenge, ncyakukumbajija kabeji kaa manga aku to, anyi kukàfidila manga,’ mwakambaye, ‘bwalu ncyèna ne mfranga to.’”

¹⁷⁰ Ee, yèyè ne: “Mwanaanyi wa balume kwambaye ne: ‘Ndaayi nwenda nupweka balulame ne mùsèèsù wawa, anu lwà pankaci paa mpangu yibidi apu, anyi mpangu yibidi, ne nùkobè ku dyabakaji, nenku nenumone mwaba—mwaba wùdìbo bafila bya kaa pa luse. xNenku nuye ku commune kwaka, nenku pàmwápa nebanupe mfranga ya kwikala naayi, anyi diyì dituma, bwa bôbò baamona mwa kufuta mfranga ya kabeji kaa manga aka, bwalu (kòkò kadi) bidi bikengela bwa inǎbǎnzà ewu apete bwa—bwa—bwanga ebu kakuyi dijanguluka to.’” Ki yèyè ne: “Kupatukaye mwaba awu, kwasaye lwendu.”

171 Ki kwambaye ne wàkatèèleja mwanende wa balume awu. “Nenku cintu kampana kwambaci ne: ‘Kaa, to, kwenji nanku to.’ Cyôci ne: ‘Mukaji wawa udi dijinga ne cyôci aci.’” Yêyè ne, kwenzekabi bwa afike ku dyela meeji ne: “‘Wawa mulongo wa bantu bulewu too ne kuntu kwaka wawa! Nyewu mbikole bwa muntu mulume ne mubidi tumatuma bwa kushaalaye kacya wimana mu mulongo amu, bwa maamù mu mushindu wawa katwambi to.’”

172 Yêyè ne: “Mêmè kwambila mwanaanyi wa balume awu ne: ‘Ndaaku, ubabiikile, ùbãmbilè baalukile.’” Yêyè ne: “Ki mêmè kuya lubilu ku ciibi, kwamba ne: ‘Alukilaayee! Alukilaayee!’ Ki kwalukilabo. Nenku mêmè kwambila mwanaanyi wa balume awu ne: ‘Fila manga àdi mafunda pa kabeji aku. Kakwena bya difucisha to.’”

173 Ki yêyè kwamba ne: “Mwanaanyi wa balume kumpeeshaye kabeji kaa manga aku, mêmè kuya e kufila manga àvwà mafundapu, mêmè kufila manga àvwà mafundapu ne mwanyi mwônsò mûmvwà mwa kuuja amu. Nenku mêmè kupatuka naaku bwa kukapeesha inãbànzà awu, ne bwa kumwambila ne kakuvwa bya difuta bwa cyôci eci to. Aci cìvwa cikumbane, bwalu yêyè uvwa naaci dijinga dya menemene, ne—ne mêmè mwva mufwanyine anu kwikala muyilekèle mene, nanku, mfranga miine ya cyôci aci ayi.”

174 Pa nanku yêyè kwamba ne: “Ncìvwa anu mbanga bwa kuteeka bwanga abu mu cyanza cya inãbànzà awu. Kadi, ndi mwenze anu mmuteekabu mu cyanza, mêmè kutangila cyanza aci. Cìvwa ne cibangu.” Yêyè ne: “Mêmè kwambulula mpala, kadi mûmvwà nteeka bwanga mùvwa mmu cyanza cya Yesu.” Yêyè ne: “Mêmè kuyiila dìbà adi ne, Mifundu, cìvwàci cyumvwija ne: ‘Misangu yônsò yinùdi benzele bàdi batambe bukesa baa ku bôbò aba, baa ku bânà Baanyi aba.’”

175 Kwambaye ne: “Wêwè udi witabuuja aci anyi?” mwàkangambilà muntu awu. Mona’s, bushuwa, mêmè’s ndi ngiitabuuja cyôci aci.

Cìvwa ncidikà, kaciyi cya biitabuujaku to, kadi ncilelela.

176 Kadi bishi bwa Martin Munsantu munene, wa ku Tours, mu France: Yêyè, mwikàle musalaayi, ùvwa wenda upweka ne mùsèèsù bufuku kampanda mùvwà mashika, mwikàle mîdimà, ne kùvwa. . . Mu mwine mùsèèsù mùvwà mashika ne mîdimà emu, mùvwa musanganyibwa mulalakanyi mukwabo, mulaale mu mùsèèsù amu, ùminyina ne mashika. Mashi ende akaavwa amuuminyina mu mijilu. Ki Martin, kayi nansha mwanji kwikala mwena Kilisto to. Kadi muntu kanà yônsò ukààdikù mubale maalu malonda a Bible, mmumanye Martin Munsantu. Mufundi wa maalu malonda awu dituku adi pàvwàye uteeta bwa kupeta karta kende, ki yêyè awu ùndi mêmè mwangate bwa—bwa cikondo ciisàtu cya ekeleeziya, Martin Munsantu,

bwalu yêyè uvwa ne bimanyinu bimufila. Ki Martin Munsantu kutangilaye panshi kumpala. . .yêyè uvwa musalaayi, nenku ki mukulakaji kampanda ewu mulaale panshi apu, mulaadile mu mùsèèsù, ùminyina ne mashika. Ki kutangilaye, kadi ùvwa ne cinkutu anu cimwepele; yêyè kayi ne cinkutu aci to, ùvwa mufwanyine kuuminyina ne mashika. Kwangataye keele kende e kupandululaye cinkutu aci pankaci, ne kucìjngilayè mulalakanyi awu. Kudìjngilayè pende yêyè mwine cikwabo cipese aci, kadi kutungunukaye ne diya.

¹⁷⁷ Bufuku abu, paakabwelaye mu cibambalu cyende, ne yêyè mumane kusòmbela panshi, kuumvwaye Muntu kampanda ùwela mu cibambalu amu. Kutangilaye, ki Yesu udi ulwa ewu, mujngila mu cyòci cipese cya cinkutu aci. Aci, ki cyakadi dyende dibiikidiibwa dya ku mudimu wa bwambi.

¹⁷⁸ Kulwaye munsantu. Ùvwa wakula mu myakulu. Cilongelu cyende cìvwa cilongeshiibwe. Wàkalongesha bèndè bantu anu ne Dìyì dya Nzambi. Kaakacyuka cìvwa Ekeleeziya wa Kumpala wa Loomo anyi ní nganyi ní nganyi wa kùdibo mwambe to. Yêyè wakashaala anu ne Dìyì dya Nzambi. Wàkabàlongesha; baakula mu myakulu, ne batentekela babeedi byanza. Bàvwa babiisha bafwe. Bàvwa biipata baadémons. Muntu kampanda, mulunda wende, bàvwa bamushipe, kadi yêyè kuya ne kulaadika mubidi wende pambidi paa yêyè awu, (mwanji kulomba ní ùvwaku mwa kumumona munda mwa tusunsa tukese), yêyè ne nyaanende awu kupatukabo benda benda, pamwe. Bwa cinyi? Cìvwa ncidikà. Cya bushuwa's, Nzambi ngwákacyenza.

¹⁷⁹ Mémè ntu ngiitabuujà bidikà. Eyowa's, mukalenge. Ntu ngiitabuujà. Ntu mbiitabuujà, ne mwoyi wanyi wònsò.

¹⁸⁰ Cìvwa ncidikà pàvwàbi ne, beena meeji matwe bònsò bàvwa pa buloba, kadi Nzambi kuteeka nsapi wa Bukalenge mu byanza bya ewu uvwàbò bangata bu “mupangi ne kayi mulonge kalaasa” awu. Ncya bushuwa. Umwe wa ku bantu baa batambe kwikla baa meeji matwe pa buloba, mu diine dituku adi, ùvwa n'Kaayifa, mwakwidi munene; bakwabo bàvwa mbakalenge baa mamfumu maalabale ne bamfumu, ne bantu banene baa pa buloba, bu mùdi bamfumu baa matunga ne bakwabo, bantu banene bònsò aba.

¹⁸¹ Nenku cintu cìdì citambe kwikala cya mushinga pa buloba ncinyi? Ng'Ekeleeziya wa Nzambi! Nzambi ngwákafùka buloba, Yêyè wakabufuka mu kiipacila: bwa kupatulamu Ekeleeziya kampanda, Mukaji-musela. Nenku awu ki mudimu wùdi mutambe kwikala wa mushinga pa buloba.

¹⁸² Nenku bantu bàvwa batambe kwikala baa meeji matwe bàvwaYe naabo bàvwa mbakalenge baa mamfumu maalabale ne bamfumu baa matunga, ne balombodi baa makookeshi maalabale ne bakookeshi, baakwidi banene ne beena mu ekeleeziya. Yêyè's uvwa mufwanyine kwikala mwangate umwe

wa ku bôbò abu. Kadi cìvwa ncidikà mwakabiikilaYe muntu uvwa kayi mumanye nansha mwa kufunda dìnà dyende yèyè mwine, ne wàmba ne: “Nênkupèèshè nsapi ya Bukalenge. Cyòsò cyùdi wèwè uswika pa buloba aci, Mèmè nènciswikè mu Dyulu. Cyùdi wèwè usuulula pa buloba aci, Mèmè nèncisùulùlè mu Dyulu.”

¹⁸³ Ambà tǔng, ndi mfuma ku dyela meeji ku cikeena-lumona aci cya ne: “Cyùdi wèwè uswika anyi usuulula aci.”

¹⁸⁴ “Cyùdi wèwè uswika pa buloba aci, Mèmè nènciswikè mu Dyulu. Cyùdi wèwè usuulula pa buloba aci, Mèmè nèncisùulùlè mu Dyulu.” Eyowa, Yèyè kaakapeesha aci mwakwidi munene kampana mulonge kalaasa, Kaayifa to, kadi mulobi wa mishipa mupangi. Cidikà cya bushuwa!

¹⁸⁵ Tudi tumona Pòlò, keena Yuda kaa dyùlù dikonyangale kenda kapweka ne njila, mwena dyambu, upweka uya bwa kaswika bantu bàvwà benza mutooyi awu abu, ne beela mbila, ne bikwabo; ubeela mu buloko, unyangakaja Ekeleeziya; kwasaye Stefano mabwe, mudimwene ne ende abidi, ne mulame binkutu byabo. Yèyè—yèyè uvwa mwena mifuunu mikole. Mmunyi mùdi Nzambi mufwanyineku kusungula muntu bu nanku awu?

¹⁸⁶ Kadi, tangilaayi, beepiskopo, bapostolo bònsò, kwambabo ne: “Netwènzè disungula, dya muntu udi mwa kwangata kaaba kaa Yudaase.” Kadi baakasungula nganyi? Baakasungula Maatiyà. Maatiyà, ngeela meeji ne ki mùdìbo babiikila dìnà adi. Maatiyà, eyowa. Maatiyà, baakamusungula ku dyela dya nshòbò, kadi kacya yèyè kaakenzaku kantu nansha kamwe to. Ùvwa umweka muntu mwakane. Kadi Nzambi wakasungula ewu uvwa mutambe kwikala wa cilunji cibànde awu, muntu uvwa mutambe kwikala wa lwonji mu ditunga amu, bwa kwangataye kaaba kende. Cidikà! Ki cìtù Nzambi wenza ncyòci aci. Cidikà!

¹⁸⁷ Cìvwa ncidikà pàvwà mwena Yuda uvwa kàyì uneemeka Nzambi ewu, wa mutu mwela muulu, wa cilunji cibànde, wa lwonji, wa bàpeetula ùvwa mu njila wènda ùya, dituku kampana, mutangile ku cimenga kampana, bwa kuya kaswika beena Kilisto ne kubeela mu buloko, ki dìbà adi, dyakamwe, kwediibwaye panshi. Kadi paakabandulukaye, ki Dikunji dya Kapyà adi diimane pààpa, ne Dìyì dilwa, dyamba ne: “Shawula, Shawula, udi uNkengesha bwa cinyi?” Cìvwa ncidikà pàvwàye yèyè mwa kuDimona, kadi bakwabo abu kabayiku mwa kuDimona to. Nwamonu anyi?

¹⁸⁸ Muntu kampana ùvwa wàmba ne: “Kaa, kacya mèmè ncitukù mmona Cyòci aci to. Kakùtukù cintu cya bu nanku kuntwaku to; eyowa, s’mmwòmò. Mbya mafi.” Pa cyòci ciine eci leelu ewu, badi bamba nunku ewu: “Mèmè ncyèna ngiitabuuja bya nanku to.” To, ncyà bushuwa ne kwèna witabuuja to. Cya bushuwa’s. Kadi, kùdi aba bàdi bàDimòna kwòkò aku. Bushuwa,

pawikalà wêwè kuyi mwa kumona to, udi mpofu, kwèna mwa kuDimona to.

¹⁸⁹ Muntu mmungambile, kukaadi cikondo kampana, kukaadi bidimu mulongolongo, wamba ne: “Mpindyewu, mèmè mwikalè mu webe njila awu. . .” Yèyè ne: “Mpindyewu, Pòlò’s wakavwija muntu kampana mpofu.” Yèyè ne: “Piikalàbi ne mèmè ndi wa dyabulu,” yèyè ne, “mvwijaaku mpofu tũng.”

¹⁹⁰ Mèmè kwamba ne: “Kabyena bikengela anu bwa aci nanku kwenjiibwaci to. Wêwè’s ukàadi mumane kwikala mpofu. Wamonu’s, wêwè’s ukàadi mumane kwikala mpofu. Wêwè’s udi ne bufofo bwa mushindu wa mutambe kwikala mubi, wamonu’s.” Mèmè ne: “Anà, mu ntempelu, ùvwa mwa kumona kule kutamba paudi wêwè mwa kumona apu. Kadi yèyè uvwa mpofu, mu mubidi.” Yèyè muntu awu uvwa mpofu, mu nyuma. Bushuwa. Cìvwa ncidikà.

¹⁹¹ Cìvwa ncidikà pàakavwija Nzambi cìvwa bwa babiikila ne ngiitabuujilu udi upambwishangana aci. . . Mitooyi yònsò eyi, ne mbila, ne ditumbisha dya Nzambi, ne dyakula dya mu myakulu, ne bantu bàdi bapeetudiibwe ne babengiibwe, ne babiikidiibwe ne mbatatakane ne baabuludyanganyi; ncidikà pàvwa Nzambi, Taatù wa bònsò, Taatù wa Mukalenge wetu Yesu Kilisto, Yèyè wakasungula musumbà wa “baabuludyanganyi” bwa kutwadila Ekeleeziya Wende lupandu, pamutu paa ndongolwelu mulongesha bimpè, wa ntendelelu. S’ncidikà.

¹⁹² Anu abidi adi panshi aa mvwa nsanganyibwa mu cimenga kampana mu Washington, anyi, ngeela meeji ne mùvwa mmu Oregon. Nanku kulwaku kà—kàmònakàmba, baakàmònakàmba babidi baa batekete, biikalè ne mici ya mfwanka ku byanza. Kubwelabo. Bàvwa baswe bwa kufunda maalù antangila mèmè, nanku, bushuwa, anu bya menemene, nudi bamanye’s. Nanku bàvwa batungunuka, bamba cintu *kampana* ne cintu *kansanga*. Ki yèyè ne: “Nanku—nanku wêwè udi munsantu mubunguluki wa mu malaba anyi?”

¹⁹³ Mèmè ne: “To.” Mèmè ne: “Kacya mèmè ncitukù mwanji kubunguluka mu malaba to. Kadi,” mèmè ne, “ndi—ndi ngeela meeji ne bu Yèyè mwa kungambila bwa kubunguluka mu malaba, ndi mufwanyine kubunguluka.”

¹⁹⁴ Ki mèmè kutungunuka ne kuyiikila mushindu awu, nudi bamanye’s. Nanku yèyè nsongaakaji awu kutungunuka, ki yèyè kwamba ne: “Tss, tss, tss, tss,” kaa, mutungunuke’s. Mèmè kwamba ne: “Anji itabaku nkwanbibile bwalu kampana, nsongaakaji wetu, funda wêwè anu cyònsò cyùdi muswe kufunda aci. Wêwè’s udi mwena Katolike.”

¹⁹⁵ Yèyè ne: “Aci ncyà bushuwa.” Yèyè ne: “Wáfiki ku dimanya ne ndi mwena Katolike bishi?”

196 Mêmè ne: “Ee, anu mushindu wumwewumwe wûmwà mumanye makwabo maalu pa cibumba cya ku cyambu awu awu, wamonu’s.” Mêmè ne: “Wêwè udi mwena Katolike. Kadi tungunuka wêwè anu ne kubifunda, kadi nyawu nkudimwija mpindyewu mene; mu matuku makumi asatu kuumukila ku mpindyewu, funda bwalu abu, wêwè newikalè ukàadi mullaale kumpenga kwa njila, mwikàle ne muminu webe awu mukosa kùdi lumwenu lutuuke ku kashinyi keebe wêwè mwine, wela mbila mikole ulomba luse, ne neutume meeji kùndi misangu yàbûngi.”

Yêyè kwamba ne: “Wêwè kwèna mwena Irlande anyi?”

“Eyo.”

“Beena famiye webe bàvwa beena Katolike anyi?”

Mêmè ne: “Pàmwăpa kumpala kwanyu mêmè’s.”

197 Yêyè ne: “Mamwêbè mmufwanyineku kwela meeji kaayi bwa cyôci aci, bwa mushindu wûdi wêwè. . .”

198 Mêmè ne: “Ntu mumubatiize mu Dînà dya Yesu Kilisto. Ne yêyè wakapeta Nyuma Mwîmpè. Uh-huh. Eyowa.”

199 Ki mêmè kwamba ne: “Mpindyewu, wêwè muswe kuya mu mushindu awu, nanku mêmè nêngàngate dînà dyebe ne wêwè peebe wangate dînà dyanyi. Pashiishe byôbî kabiyi nanku dîbà adi to, paanyima paa matuku makumi asatu, ufunde bwalu abu mu cibejibeji cyebe amu ne mêmè ndi muprofa wa mashimi. Mpindyewu tungunuka wêwè anu ne kufunda bwalu abu.”

200 Yêyè ne: “Ee, ndi mufwanyine kuumvwa bingenza bibi bwa kwela meeji ne, pângààyà mu Dyulu, musumbà wa binyonga, bu mùdi bàdi mu disangisha adi abu, ne bôbò mbààkòkeshà mu Dyulu’s.”

201 Mêmè kwamba ne: “Kwakupeta lutatu lwàbûngi to,” mêmè ne, “kwediku meeji awu to. Wêwè udi wamba ne: ‘Ncyèna. . .’ Ee, wêwè, kuyi mushintulule meeji ebe ne mushindu webe wa dyenza maalu awu to, kwakwikalaMu to, nansha bya bishi, wamonu’s.” Mêmè ne: “Bwalu, bôbò abu nebîikalèMu. Nzambi ngudi musungule aci.”

202 Ncidikà’s, mùdi Nzambi mwangate bikutakane, nwamonu’s, bintu abi. Yêyè, Nzambi, wakasungula bwa kutwadila baa pa buloba lupandu ku musumbà wa mushindu ewu, cidikà, bashilangane anu menemene ne bamanyi baabo baa mabàla balongeshiibwe mu mushindu mutumbuke ne baa kapelu abu, ne beena teoloji abu ne bikwabo. Nzambi ùtu anu ucinguluka aci, wàngata kaacinyonga kampanda kadi kukàbàndisha, ne kuteeka Mukenji Wende munda mwako, anu mwakateekaYe munda mwa Yone, bamwe baa ku bôbò abu, Peetelo ne bakwabo, kubatuma bwa kuyabo kayiisha Evanjeeliyo, ne kubweja Ekeleeziya Wende; ne kubasungila, ne kubaaluja pa buloba, ne ki cyônsò cidiku pa bwalu abu ncyôci aci, nwamonu’s.

Kadi kulekela anu bintu byônsò binene bya kapelu ebi byùmukè. Kaa, ekelekele, s'ncyà bushuwa ne ncintu kampanda! Mémè ndi mufwanyine . . .

²⁰³ Nzambi, pààkasungulà Nzambi bapangi ne bàvwà kabayi balonge kalaasa, pamutu paa dimanya dya mukanda ne dilonga dya tulaasa, bwa Mukaj'Ende-musela! Nudiku mwa kudifwanyikijila muntu wetu ewu, ùsungula mukajende wa kusela, mufwanyine kwangata . . . muntu wetu ewu mwikàle ne makookeshi a matambidile ne matumbuke.

²⁰⁴ Ndi ne kaacintu kakese mwab'ewu kâmvwà muswe kwamba, kadi ncyakwikala ne dîbà dya kukàmba to, pa bìdì bitangilà kaalusumwinu kakese kâmvwà mumone musangu kampanda. Kadi ncyakupeta mushindu wa kukàmba to. Mvwa mukâfunde mwab'ewu, kadi ncyèna ne dîbà dya kukàmba to.

²⁰⁵ Kadi, Nzambi mmusungule Mukaj'Ende-musela mu musumbà wa bantu baa mushindu awu. Mpindyewu, ewu yônsò udi wamba ne kabyena nanku awu, nanku wèwè kwèna witabuuja Bible webe to. Aci's ncyà bushuwa menemene. Ikàla ubala Bible webe, ki cyôci aci menemene.

²⁰⁶ Cìvwa neidìkà cyetu cya bushuwa eci pààkasungulà Nzambi dikutakana dya nyiishilu musonsola pamutu paa teoloji wa mutumbuke ne wa kapelu. Muntu udi kayi mumanye, kayi mumanye menemene to, wàmba yèyè bintu bya wenù ngaakwilu bya “hit, hain't, tote, fetch, carry” abi, myaku yônsò ya mushindu awu ayi, ne—ne wàmba bintu bya—bya mishindu yônsò bya wèndè mwakulu, biine abi kabiyi bilongolola bilondeshile mùdì mwakulu to, ne bikwabo byônsò mushindu awu. Ki Nzambi kusungula aci pamutu paa kwangata bamanyi banene baa mabàlà baa kapelu abu, bàdì cya bushuwa mwa kushindumuna myaku ne kuyamba anu mùdiyi menemene. Kadi byakasankisha Nzambi bwa kwangata dikutakana dya nyiishilu musonsola, nsongaalume kampanda mukese wa kale wa ùdima ne ditempu dya nkasu kayi mumanye ABC to, kadi kwangata mwine muntu awu ne kupetela misuuka ku yèyè. Pàdìbi ne, baseeswishanganyi, bônsò baa kapelu, biikàle anu balombola, bampofu balombola bampofu naabo. Cidìkà anu cyetu cya bushuwa eci's!

²⁰⁷ Kaa, Dìyi's ndyûle tente ne byôbi abi. Myaba yàbûngì mwab'ewu, anyi mifundu, yìdì yìkèngelà bwa mémè ku—kutupika.

²⁰⁸ Ncyà bushuwa ne ekeleeziya ya minene yidi yikenka ne yibàlakana ne teoloji wa kapelu awu, pàdì Bukalenge bwikàle bwèla nsèsà ne didipwekesha, bapele ne bàdì badìpwekèshe. Evanjeeliyo kàtu ùkenka to, Yèyè ùtu wela nsèsà. Ngòlò wa mukutakane ùtu yèyè ùkenka; ngòlò mulelela ùtu wela nsèsà. Kùdì dishiilangana pankaci paa dyela dya nsèsà ne dikenka. Aci tudi bamanye. Pàdì ekeleeziya munene ùbàlakana ne ùkenka ne

bamanyi baa mabàlà batumbuke ne baa kapelu apu, ne bibasa bilenga, ne tunkuruse tulamika ku cimanu cijima, ne nzubu ne bitanda bitambe kubàndila ne bitambe bulenga, ne bintu binene bya tuleyi, byònsò mushindu awu, Bukalenge bukese abu, mu kajila kakese kampanda, bu mùdì apa, mwaba kampanda, bùdi munkaci mwa kwela nsèsà ne Butumbi bwa Nzambi, bùle tente ne bàdì badìpwekèshe mu myoyi, nwamonu's, Nzambi ukwata mudimu munda mwabo, wondopa babeedi, ujuula bafwe, ne wipata baademons, ne bikwabo mushindu awu; mwikàle anu ubashiya bàpìcila ku luseke.

²⁰⁹ Kùvwa kwenzeke cisangilu cinene cya bambi. Kanupu eci mwoyi to. Kùvwa kwenzeke cisangilu cinene cya bambi muneemu emu kwènjì cikondo kampanda, mu cimenga kampanda, mùvwà bantu baa mwaba ewu basanganyibwa mu ciine cisangilu aci. Nenku bàvwa ne muntu kampanda uvwa ne cya . . . Kaa, yêyè's uvwa mwena teoloji, “ùvwa ne mukenji wa dituku, bwa bantu.” Nenku ùvwa mulonge munda mwa mbingu yibidi anyi yisatu pa cyôci aci. Aci cìvwa anu cìmpè. Kadi mwenze anu ùbànda mu cyambilu anyi, kayiku ne kaamufudì nansha kamwe ku byende bilàmbà to, ekelekele, muvwale bintu bilenga bya kacya, nudi bamanye's, kubàndayè kuntwaku ne kutadikaye cyàdì ne kwadijaye bya—bya mudimu byende byònsò mwab'awu bwa mukenji wende awu. Ki kuyiishaye cya bushuwa mukenji wa dìbà dijima wùvwà kawuyi wà bàtùlaku kalema to, bwa mamanya a mu mutu. Kaa, mushindu mwine wakatadikaye cyàdì's we, ne kwangata dìnà dya LL. Docteur *Kampanda*, wa ku cilongelu cinene kampanda, uvwa wa kapelu kaa katumbuke menemene ne mumanyi wa dibàla, mu mushindu wa ne yêyè kutwadila bantu bà bintu bya dilonga dya nsòmbelu ne bikwabo mudimu mwowela byanza wa dikema, kwambabo ne: “Bivwa bilenga bya kacya.”

²¹⁰ Kadi beena Kilsto basòmbè mwab'awu, menemene anu bu ku Nsangilu wa Nicée, cyôci kadi kubungamijaci Nyuma eyo. Kaa, s'cìvwa mmudimu mwowela byanza, cya bushuwa. Eyowa's, mukalenge. Cìvwa ne kapelu kònsò pambidi apu, kàvwaku mwa kwikala aku. Kadi bantu bàvwà bùlelela bùle tente ne Nyuma abu, kwambabo anu ne: “Huh?” Kacìvwa cikumbanangana menemene ne . . . Kakuvwaku Nyuma mwab'awu bwa kucitwa nyama ku mikolo to.

²¹¹ Pa nanku paakatuulukaye kuntwaku, ùkaavwa ne mutu mwinyika panshi, mumone ne kacyakapitakana bìmpè to. Yêyè uvwa wa mu cilongelu cikwabo; kadi ùvwa ne beena mpenta. Nenku paakatuulukaye pa cibumba cya ku cyambilu, ùkaavwa masala malembeleja. Kubangaye wenda upicila munkaci amu, ne bintu byende byònsò abi bipayika mu dyâpà, nunku *ewu*, wenda upicila munkaci mwa disangisha amu.

²¹² Kùvwa munsantu kampanda wa kale musòmbè lwà ku dyabalume aku, kwobokelaye kùvwà muntu mukwabo, e

kwambaye ne: “Bu wikalakù nanshà mubànde mushindu wùdiye mutuuluke ewu, nunku’s mmutuuluke mushindu wùvwàye mubànde awu.” S’ki mùdìci nanku. Yèyè wikalakù nanshà mubànde mudipwekeshe, pàmwäpa nunku mmutuuluke mùle tente ne Butumbi. Yèyè wikalakù nanshà mubànde mushindu wùvwàye mutuuluke ewu, nunku’s mmutuuluke mushindu wùvwàye mubànde awu. Ncya bushuwa. Cidikà!

²¹³ Teelejaayi, bwa kujikija mpindyewu, anu bwa katanci, kumpala kwa mulongo wa babeedi. Mvwa muswe kwambaku dikwabo dīyì, matwe ku abidi, pa bìdì bitàngilà cidikà.

²¹⁴ Bikeena-kumona bya baprofeta baa kale bitu anu cidikà. Bitu kabiya bya bànàyila to. Nganyi udi mwa kwambaku ne, muntu wa kukaadi bidimu binunu binaayi, ùvwa mwa kwamba bwa matempu a enda kaayi ne tubalu enda afwilakanangana mu njila myalabale, edi ne edi. Baprofeta baa kale baa Dipungila Dikulukulu, mushindu wùvwàbo mwa kudyanjila kumona maalu ne kudyanjila kuàmba, batùntumuna kùdì Bukole bwa Nzambi, bàvwa bààmwèna kule mu bidimu bicivwà bilwa, ne kudyanjila kuàmba anu jaajaaja ne bupwangane bwònsò. Cyùmvwijaayaaku tǔng! S’ncidikà. Kaa!

²¹⁵ Cikwabo, ndi muswe kunupeesha kàà kakese, kàà kakayi ne mushinga to. Kadi dikudimuna dyanyi dya mucima s’divwà ncidikà. Ndi ngamba bwalu ebun ne dinanga ne kaneemu. Baledi baanyi bakaadi bamane kufwa. Beena famiye wa ku baa mààmù bàvwa bònsò anu bangènzàmpèkààtù, beedi baa mateyi, baabilembi, ne bantu baa ku mikuna. Beena famiye wa ku baa tààtù bàvwa bònsò anu bakwaciki baa maala, basumbishi baa mu musokoko baa maala a kapyä, banayi baa twarta twa mfranga, baashanganyi baa bingoma, bashipangana muntu ne mukwende, pamwe ne bònsò mbafwe ne bisabaata ku makàsà. Kakuvwaku kantendeleelu nansha kakese, kaa mushindu kampana, kutùdi to. Kadi mmunyi mùvwà Nzambi. . . civwa ncinyi Aci cyàkabwelà mu kazùbù kakese kaa mici kaka kuntu kwaka mu dinda amu, cinùdì numona bakwate fòtò ku cimanu kwaka cyacya? Cinyi? S’ncishiilangane anu menemene.

²¹⁶ Wèwè mwele ditete dya blé mu buloba, nedikwame ditete dya blé. Wèwè mwele ditala mu buloba, nedikwame ditala. Wèwè mwele mpoopu mu buloba, neakwame mpoopu.

²¹⁷ Kadi eci ncidikà! Muntu ne muntu wa kunùdì udi mwa kwamba cintu cimwecimwe aci bwende yèyè mwine. Twètù bònsò tudi mwa kuvuluka cidikà citù cyenzèke.

²¹⁸ Cidikà cikwabo ncyòci eci. Mmunyi mùndì mèmè ewu, paanyima paa mèmè mumane kuyiisha bidimu bitwe ku makumi asatu, mufwanyine anu kwikala ne bwòwà bwa kuya Dyamwamwa? Mbifwanyine kwenzeka munyi? Paanyima paa mèmè muyiishe kacya pàncivwà mwànà mutekete apu, ne leelu ùnkaadi muntu wa bidimu makumi ataanu ne bibidi

ewu, kadi pashiishe kucinka bwa diikala ne bwôwà. . . Mêmè—mêmè ncivwa. . . Mvwa mumanye ne mvwa musungidiibwe. Kadi, mvwa anu ne bwôwà pa kwela meji. . . Kadi dinanga dya Nzambi, dinda kampanda, dyakapweka mu cibambalu cyanyi, kuntuntumunadi, ne kumbwejadi mu Mwaba wùvwà bapikula basanganyiibwa. S'ncidikà bushuwa!

²¹⁹ Ndi muswe nnukonkeku cintu kampanda. Ndi mufwanyine kukosela bwalu ebu kaaba aka mpindyewu. Ndi muswe nnukonkeku cintu kampanda. [Katupa kaa mukaba wa mÿèi munda mutupu—Muf.] Ncinyi cidì mu fôtò wawa Cyacya? N'Cifumine penyi? Cidi apa bwa cinyi? Maalu a mamanya kaenaku mwa kuCivila to. Ncinyi ciine Cidì mu disangisha, ciimane mwaba wawa ciikàle cikenketa munda mwa bantu mwônsò, ne cibambila ne: “Kale wawa, ciwakenza. Wèwè ewu udi kaaba aka mmu kiipacila *kampanda*. Udi kaaba aka mmu kiipacila *kansanga*”? S'ncyà kabayiku mwa kwitabuuja kùdì meeji a beena maalu a mamanya to.

²²⁰ Mpindyewu, tutu bamanye lubuku. Lubuku lùtu, kwamba cintu kampanda, byenze bu wèwè wamba cintu kampanda ne mêmè paanyi mwa kwamba cintu cimwecimwe aci, nwamonu's, anyi, ndi mbala mu meeji ebe, pààci cyenzeka pa dîbà adi mene. Kadi panùdì nuCimona cyàmba maalu ìkalà mwa kulwa kwenzeka kule kumpala mu matuku àcìvwavwà, aci's ncishiye lubuku ku luseke.

²²¹ Ncyà kabayi mwa kwitabuujuke to bwa Nzambi, mu matuku a ndekeelu aa, mwakalayaYe ne Yèyè neénzè, mufwanyine kwenza cintu bu nanku awu. Kadi's ncilelela, s'ncidikà! Nzambi umwèumwè ukààdi mwenzenze bidikà ne mubileejeleeje awu, Yèyè's n'Nzambi umwèumwè awu leelu ewu, bwalu Yèyè udi ushaala mulamate ku Dìyì Dyende. Maalu a mamanya kaenaku mwa kuCivila to, s'ki Cyôci cyacya mu cyamu cya fôtò cidì cyenza ne byamu. S'ncidikà's, Nzambi!

²²² Ncinyi Aci? Mu—mu Ekesoode, nshapita wa 13, tudi tubala ne Nzambi wakapeesha bânà baa Izaleela, bàvwà cimfwanyi cya Ekeleeziya leelu ewu abu; mùvwàbo mu lwendu lwa mu mubidi ewu amu, twètù tudi mu lwendu lwa mu Nyuma. Mu dyalumingu dilwalwà edi netwangate cyôci aci, mpindyewu. Vulukaayi ne, byônsò mpa cyôci aci, nwamonu's. Mpindyewu, mushindu wùdibi ne—ne mwaba wùdibo, wùvwàbo benda benda pa buloba, mu mubidi ewu, mushindu *ewu*, ne Nzambi uvwa naabo; Ekeleeziya mmusòmbe ne Kilsto, mu Myaba ya mu Dyulu, ya bipaapu bya nyuma, twenda tuya biikàle ne makookeshi ônsò mwinshi mwa makàsà etu. Aleluuyah! Eyowa's, mukalenge. Ne bôbò bàvwà ne Dikunji dya Kapyà, Bukênkè bùvwàbo benda balonda. Kwônsò kùvwà Bukênkè ebu buya aku, bôbò bàvwà benda balonda Bukênkè abu. Binunu bya bidimu byápici, nkama ne nkama ya bidimu bikaadi biye, kadi Dyôdì dicidì anu ne mwoyi. Cidikà's! Dyôdì dimwedimwe adi makeelela. . . Diikàle

dyuja Mifundu, Dìdi mwab'ewu bu bujaadiki; kabiyi bwetu twètù to, kadi mbwalu Nzambi wakaCilaya ne, Yesu Kilisto udi umwèumwè awu makeelela, leelu, too ne kashidi. Dìvwa n'Dyòdì adi divwà Mòsà ubala bu mabanji, a Kilisto, anyi bu bundu bwa Kilisto bwikàle mabanji manene kutamba bibucilu bya Ejipitu. Kadi Kilisto uvwa wenda kumpala kwende awu uvwa ncinyi? Bukênkè, Dikunji dya Kapyà.

223 Yèyè wakamba ne: “Ndi mufume ku Nzambi ne Ndi ngaalukila ku Nzambi.” Yèyè wakaalukila. “Katanci kakese aka baa pa buloba kabaakuMmona kabidi to, kadi nwènù nenuMmone; bwalu Nèngiikalè neenu, munda mwenu mene, too ne kunshiikidilu kwa buloba.” Too ne kunshiikidilu kwa buloba menemene, Yèyè, neikalè kabidi kaaba aka. S'ki twètù bàkaadiku aba!

224 Paanyima paa lufu, dijiikiibwa, ne dibiika Dyende dya ku lufu, Pòlò Munsantu wakatuutakeena Nende mu njila wa ku Damaseke, Yèyè ukaavwa mwalukile ku Dikunji dya Kapyà adi.

225 Bidimu bitwe ku binunu bibidi bikaadi bipite kubangila piine apu, kadi's n'Yèyè ewu! Kayi munkaci mwa mangumba to, kayi munkaci mwa bamanyi baa mabàlà baa kapelu baa dituku edi to, kadi munkaci mwa musùmbà wa bantu balanda ne badipwekèshe. Cidikà! Cidikà! Bwa bàdì baMunangè, baMwitàbùùje, bàdì baMwitàbùùje binunu ne binunu pa buloba bujjima abu, mbwa kuuja mulayi Wende ne wa Dipungila Dipyadipya ne wa Dikulukulu. Neyôcì aci. Kadi ncidikà's.

226 Cìvwa ncidikà pàakalayà Nzambi bwa kupeesha kasumbu kakese kaa mikooko Bukalenge, pamutu paa ekeleeziya munene mulongolola. “Kanuciinyi to, nwènù kasumbu kakese kaa mikooko, ndiswa dya Taatù wenu bwa kunupeesha nwènù Bukalenge.” Neciikalè—Ncidikà. Ncidikà.

227 Neciikalè cidikà cya menemene, dimwe dya ku matuku àdì panshi aa, pààlwà Yesu; ne bafwe mu Kilisto nebabiike. Cya cifwaka eci necivwale dibenga-kufwa, ne dyambwibwa dya Ekeleeziya nedilwe.

228 Mu bikondo bya Noël ebi, pàtù bantu bàsùmba bintu mu makajiinyi, ne baja maja, ne banwa maala, ne batwa cyanga cya cintu kampana cidibo bóbò kabayi bamanye apu, byenze bu mùvwàbò bàtwa cyanga dituku dya mufikilu wa dilediibwa dya Washington anyi dya Lincoln amu, kadi kabayi bakuukwila ewu. . . Bàcidi bóbò anu ne Nzambi mu cidiilu cya nyama.

229 Pààbì, Nzambi kèna mu cidiilu cya nyama to. Yèyè ukaadi mubiike ku bafwe, ne mwikàle ne mwoyi bwa kashidi, mwikàle ne mwoyi munkaci mwetu, udijaadika Yèyè mwine, bu Nzambi umwèumwè uvwa baataatù baa Nicée bambule awu, ne utu mulwe munda mwa bikondo kuumukila ku Dituku dya Mpenta awu. Nzambi umwèumwè wàkatuutakeena ne Pòlò mu njila wa ku Damaseke awu; yèyè uvwa mpandanjila bwa baa Bisamba

bya bende, ne musanjeela mutuma kùdi Nzambi, mutumina baa Bisamba bya bende. Mukenji wa baa Bisamba bya bende wakabanga ne dimwenekelangana dya Dikunji dya Kapyà, ne wùdi wùjika mu mushindu wumwewumwe awu.

²³⁰ Bukalenge bwa baa Bisamba bya bende bwakabanga, bukalenge bwa pa buloba, aci mbuloba, bwakabanga ne ditandisha dya mu mwakulu wa mu Dyulu, mu matuku a Mfumu Nebukandeneesa; bùdi bùjika ne cintu cimwecimwe aci, pàdì Nyuma Mwímpè wicikijibwa pa ekeleeziya wa baa Bisamba bya bende, wa ku matuku a ndekeelu, bwa kutandisha cyakabidi matunga a Bisamba bya bende ne mufundu ku cimanu. Mufundu ku cimanu awu, bwa ne, Nzambi walongololu Ekeleeziya Wende, Yèyè walongololu cisamba Cyende, Walongololu mwaba Wende, ne bóbò mbindile bwa kulwaYe.

²³¹ Nenu Dyambwibwa adi! “Pààdilà mpungi wa Nzambi awu, ne pààbiikà bafwe mu Kilisto, twètù bàdì ne mwoyi ne biikalà bashààle katwakupangisha bàdì balààle to. Bwalu mpungi wa Nzambi neadile, ne bafwe mu Kilisto nebabiike; nenku netwangaciibwe muulu pamwe naabo, bwa kutuutakeena ne Mukalenge mu mpeepele.” Cidikà, dimwe dya ku maadinda aa, pààbuululukà nkita ne pààpàtukà bafwe benda benda; pààshintulukà bàdì ne mwoyi, mu katanci, kaa mubunyi wa dísù, nenku nebabande mu mpeepele bwa katuutakeena Nende.

²³² Cintu cyònsò mu kaabujima ncidikà, Nzambi ukwata mudimu munkaci mwa bantu Bende. Nudi nwitabuuja aci anyi? Twinyikaayaaku mitu yetu bwa dîyì dya disambila.

²³³ Nzambi, mpindyewu bwa mukùngùlù mupite pa dîbà dijima, bu dîbà dijima ne tusunsa dikumi nanku awu, tuvwa biimane mwab'ewu twakula pa bìdì bitàngilà maalù àvwà mapitakane kale ne àdì àpitakanà mpindyewu, mushindu wùdi Nyuma Mwímpè muábànye, Mukalenge, mùtù Dîyì dya Nzambi dibyènzè ne ngàsà yònsò; biikàle bileeja ne Nzambi mene wa mu Dyulu, Yèyè uvwa ne mwoyi mu matuku a kale, mu mmwenekelu wumwèwumwè ne mu mushindu wumwewumwe awu, ùdi ne mwoyi leelu ewu. Maalu a kukema amweamwe awu, Bukole bumwebumwe bùvwà pambidi paa baprofeta baa kale abu, bìvwà pambidi paa Ekeleeziya dya Mpenta abi, bìvwà pambidi paa, Anà; ne paa Agàbò abi, baprofeta baa Dipungila Dipyadipya mu diine dituku adi, bóbò bààkalongololà too ne Munsantu Pòlò. Ne Munsantu Pòlò kupetaye lutatu bu mùvwàye mubenge kuteejeja Agàbò, bwalu Agàbò. . . Nansha mùvwàye mupostolo amu, Pòlò awu, kadi Agàbò uvwa ne Dîyì dya Mukalenge, nenku kumudimwijaye bwa kàbàndi kuntwaku to. Kadi Pòlò yèyè ukaavwa mukange anu mwoyi bwa kuyaye, ki dîbà adi kupetaye lutatu. Nenu, Taatù, misangu yònsò tutu anu tupeta lutatu twètù babenge kutumikila Dîyì dya Nzambi.

²³⁴ Tudi tumona ne Nzambi mwine uvwa ne bânà beetu abu kwaka awu, ùdi Nzambi umwèumwè awu leelu ewu. Tudi tuMumona mu dimweneshiibwa dyônsò. Nenku cìdi ncidikà, Mukalenge. Baa pa buloba badi batangila, ne badi bàkùpa mitu, bamba ne: “KaCyèna ne bwa nsongo to.” Mwena kwitabuujja udi uCiitaba ne uCyupukila, ne umanya ne Cìdi Nzambi udi ne mwoyi.

²³⁵ Éyi Taatù, nyewu tulomba mu dinda emu ne, kwòkò kufwanyine kwikala muntu kampana munkaci mwetu emu udi kayi mwanji kwikala mwena kwitabuujja to, edi diikalèku dîbà diitabuujaye. Éyi Nzambi, enzaku nanku anu mpindyewu mene mu mwoyi wa muntu ne muntu udi kaaba aka, udi kayi mumanye Kilisto bu Musungidi wende awu ne, edi diikalèku dîbà dyènzekàku cidikà kumpala kwende; bwa ngènzàmpèkààtù mubiipe mukwate ne bya luse (ngènzàmpèkààtù ku ngiikadilu, mulela pa buloba apa mu mpekaatu, mufwimba mu bubu, mulwe pa buloba wàmba mashimi, ku bukooya) wàpetakù mwa kushintuludiiibwa ne kuvwijiiibwa mu bwakane bwa Mwânà wa Nzambi. Enzaku, Mukalenge, bwa—bwa cidikà cinene aci cyènzekèku mu myoyi ya bônso bàdi kaaba aka mu dinda emu bàdi kabayi baKumanye bu Musungidi wabo ne bu Mfumu wabo ulwâlwa, biikàle badilongolole bwa kutuutakeena Neebe ku mpungi wa ndekeelu awu bu yèyè mwa kudila leelu ewu.

²³⁶ Pashiishe tudi baswe kulomba kabidi, Mukalenge, bwa Wèwè kuvulukaku bàdi babeedi ne bàdi mu ntatu kaaba aka. Éyi Nzambi, leelu ewu nyewu tulomba bwa Wèwè kwondopaku mubeedi yônsò ne mwena lutatu yônsò. Bàmanyèku ne Nzambi ùcitu anu wenzela muntu kanà yônsò bidikà wàswa bwa kwenza ne Dìyi Dyende dyenzekè awu.

²³⁷ Tudi bamanye ne Dìyi Dyende ncidikà. PàdiDi dilaya cintu kampana ciikàle menemene kaciyi cya bushuwa to, bwa baa pa buloba, cintu kampana cya kabayiku mwa kwitaba to, cya—cya cipicila ne dyabo dimanya ne—ne dyabo dyumvwa. Kadi pàdi mwoyi mupwekele wangata Dìyi adi ne uDipwekesha mu ndondo ya buumuntu bwende, dîbà adi Dìyi adi didi dipatula byenzedi bidì ne mwoyi bya wòwò mulayi awu.

²³⁸ Kaa, mushindu mwine wutùdi tuKwela twasakidila bwa ciine eci, bwa ne kùdi bantu bapwekele bàdi biitabuujà Mukenji ewu. Twètù katwena bindile bukalenge mwikalà bikondo bya bombes ya mushinda ayi mwa kukookesha nansha, kadi tudi bindile Bukalenge mwikalà Kilisto mwa kukookesha ku bukole ne ngiikadilu wa ukemesha, ditalala ne butumbi pa buloba; kamuyi mwa ne netushindikile makàsà etu pa makàsà a dyendesha naawu mashinyi, makàsà a gaz, anyi kubuuka mu mpeepele ne ndeke ya jet to; kadi mutwikalà basòmbe banyungulukile Nkwasa wa butumbi wa Nzambi udi ne mwoyi, kaa, ne biikàle tuMubandila, ne tumona Ewu Uvwa mutapiibwe mputa bwa kushipa kwetu kwa mikenji ne muzaaza bwa bubu

bwetu awu, dinyooka bwa ditalala dyetu dimatè pambidi Pende, ne Mwena mibundabunda kutwakwondopiibwa. Dijinga dya myoyi yetu, Mukalenge, kacya anu cidikà cinene aci cyalwa kutùdì, ndya ne twâfikakù too ne pàdìYe ne twasòmbakù Nende mu dituku adi. Enzaku nanku, Mukalenge. Tudi tulomba nunku mu Dìnà dya Yesu.

²³⁹ Nenu patùcidì ne mitu yetu miinyika apa. Ndi ndikonka, mu bateeleji emu mu dinda emu, ní kùdikù muntu muswe bwa bamuvuluke mu disambila, àmbèku ne: “Mukalenge Nzambi, nyewu mbàndisha cyanza cyanyi Kùdì”? “Nenu, Mwaneetu Branham, watàngilakù ne wamònakù cyanza cyanyi, ne wànsambidilakù, bwa cidikà cinene cyamonaku mwa kwenzeka munda mwa mwoyi wanyi, pângààtuutakeenà ne Kilisto mu dibatiiza dya Nyuma ne mu bukole Bwende bwa dibiika dya ku bafwe.” Nzambi anubeneshe, yònsò wa kunùdì, muntu ne muntu. Abi mbilenga. “Bwa ngàtuutakeenakù ne Nzambi.” Nenu Nzambi ikalè neenu. “Nèntuutakeenè Nende, ne cidikà cinene necyenzeke mu nsòmbelu wanyi, nenu nèngùùjiibwè tente ne bukole Bwende ne butumbi Bwende, ne bwímpè ne luse bya Ewu udi ne mwoyi kashidi ne kashidi. Ne dîngà dituku nèngiikalè mu ciine cidikà cilwalwà aci. Cintu kampanda cya ne piikalà. . .”

²⁴⁰ Lupwishi lwa baprofeta abu lùdi lùsanganyibwa mwamwa mu buloba. Pàvwà lupwishi lwa baakafwila diitabuuja baakadyabo kùdì nyama ya ntambwe, ne tùmvi twine twa nyama ya ntambwe atu bàvwa bàtùtangalaja mu lupwishi, ne pa buloba pònsò apu, kadi nansha nanku Kilisto neajuule mubidi awu cyakabidi. Bìdi bileeja ne Yèyè udi dibiika dya ku lufu.

²⁴¹ PaakangataYe tuubitoci tukese ku byanza Byende ne kutùlaaba pa mèsù a muntu uvwa kacya kayiku ne mèsù etu aa to, s’byakaleeja ne muntu ùtu mwenjiibwe ne lupwishi lwa buloba, ne yèyè wakaalukila mwikàle ne tumonyi twa mèsù ne mwikàle mwa kumona Mufuki uvwa mumwenze awu.

²⁴² Nzambi Yèyè kayi ne meeji a kubiisha bafwe to, kadi bwa cinyi Wàkalwa mubidi mufwanangane neetu, kadi kwalukila ku lupwishi, ne kudijuula Yèyè mwine cyakabidi? Bwa cinyi Yèyè wakaDijuula cyakabidi piikalàku kakuyi dibiika dya ku bafwe? Kaa, katwikadiku bânà batekete to, kadi twikalaaayi balume ne bakaji bakulumpe mu Nyuma, twitabuujaayi Nzambi ne mwoyi wetu wònsò.

²⁴³ Nkufwanyineku kwikala mukwabo mpindyewu anyi, kumpala kwa twètù kubanga kusambila? Nzambi akubeneshe, ne wèwè, mwaneetu wa balume, ne wèwè. Eyowa.

²⁴⁴ Taatù wetu wa mu Dyulu, mpindyewu nyewu tuKutwadila bàdì beele byanza muulu aba. Mu mushindu kampanda anyi kansanga, Nyuma Mwímpè mmuDisebeele njila too ne mu myoyi

yabo, ubambilamu ne: “Kanwena panwapa anu bwa kudya ne kunwa, ne—ne kulaala, ne kujuuka kwenza mudimu nkaayaaku to; ne pashiishe kwalukila, kudya ne kunwa ne kulaala cyakabidi tulu. Nudi panwapa mbwà kwikala bânà baa balume ne baa bakaji baa Nzambi. Nudi panwapa mbwà kwangata kaaba keenu mu Kilisto. Ne mêmè ndi mwab’ewu mu dinda emu mbwà kunubiikila,” mùdi Nyuma Mwîmpè mufwanyine kwambila mwoyi wabo.

²⁴⁵ Taatù, ku disambila, cingoma cimwepele cîndîku paanyi mumanye aci, nyewu mbafila Kûdi. Ne ndi—ndi ngeela mwena lukuna udi mufwanyine kubapangisha bwa kulwa Kûdi awu kadyombo. Ndi teeka, ku diitabuujà, Mashi a Yesu Kilisto pankaci paa mwena lukuna ne bôbò, yêyè awu udi mufwanyine kubapangisha dilabula edi dya butumbi dya cidikà cinene eci, cya dipeta dya Nyuma Mwîmpè ne dipeta dya Mwoyi wa Cyendeleele. Bwalu tudi tufika ku dyumvwa ne cyôci aci ki cintu cimwepele—cimwepele cîdîku, dyandamuna dimwepele ditùdi bapeeshiibwe, bwa Mwoyi wa Cyendeleele, nkupeta Mwoyi wa Nzambi munda mwetu, dîbà adi m’Mwoyi wa Cyendeleele munda mwetu. Enzaku nanku, Mukalenge, bwa cyamonaku mwa kwenzekela muntu ne muntu udi mwele cyanza muulu awu. Ne pâmwâpa aba bàdi kabayi bapete bukutu bwa kwela byanza byabo muulu abu, ubênzèlèci pààbò. Mpindyewu, Taatù, mbeebe Wèwè. Ndi mbafila Kûdi, mu Dîna dya Yesu Kilisto.

²⁴⁶ Nenu mpindyewu bu mùdîbi bikengela bwa mulongo wa babeedi kwenjiibwawu, Taatù, ncyèna mumanye ne nganyi wabànda kuneeku to. Kadi tûpèeshèku cikwabo cidikà mu dinda emu, Mukalenge. Swaku bwa Bukole kampanda bwa Nzambi bùdi kabuyi buumvwika bùtuulukè ne bwènzèku cintu kampanda mushindu wùtù Wèwè mulaye awu. Nenu eci necîikalè musangu wanyi wa kumpala, Mukalenge, wa kacya anu ngâtuutakeena Neebe dituku adi. Ndi ndomba mpindyewu bwa Wèwè kufila malomba a bantu aba, mu Dîna dya Yesu. Amen.

²⁴⁷ Mpindyewu, ndi njinga ne muntu ne muntu ìkalèku anu musòmbèle panshi, panwîkalà ne mushindu, bwa katanci kakese cyanaana.

²⁴⁸ Mpindyewu, ewu yònsò udi ne karta kaa disambila. Billy uvwa mulwe mu dinda emu, bu mùvwàye mulaye ne nealwe, ne mmwabanyine ndambu wa bantu twarta twa disambila mwaba ewu. Úvwa wamba ne kabàvwakù bààbùngì menemene to. Nudiku mwa kwela byanza muulu anyi? nwènù bàdi ne twarta twa disambila abu. Eyo. Ndi ndikonka ní nudiku bafwanyine kukwata myaba yenu ne kwimana anu balonde eku, nwènù bàdi ne twarta twa disambila abu. Mpenyi, Billy, mpenyi paudi? Kaa, eyo. Imanaayi anu balonde eku.

²⁴⁹ Mpindyewu, bantu bònsò mu disambila mpindyewu. Tudi tulwa kumpala kwa Mukalenge Nzambi wetu. Mpindyewu

twĩmbààyi musambu awu pamwe ne mujiki, bu nwênù mwa kuswa, pàdì Mwaneetu wa bakaji Arnold wimba cisanji kwaka apu. Bònsò cyapamwe mpindyewu, anu bituulubituulu.

Itabuuja naka, itabuuja naka,
Byònsò bìdi mwa kwenzeka, itabuuja naka;
Itabuuja naka, itabuuja naka,
Byònsò bìdi mwa kwenzeka, itabuuja naka.

[Mwaneetu Branham wabangi kwimbila mu matama
Itàbùùjà Nàka—Muf.]

Byònsò bìdi mwa kwenzeka, itabuuja naka;
Itabuuja naka, itabuuja naka,
Byònsò bìdi mwa kwenzeka, itabuuja naka.

²⁵⁰ [Mwaneetu Branham wabangi kwimbila mu matama
Itàbùùjà Nàka, ne pashiishe ùdi ùbala Maako 11.21-24—Muf.]

*... Peetelo umuvulwija e kumwambilaye ne:
Mulongeshi, tangila, mucu wa mfigi wúvwà mwele
mulawu awu ngwawu mufubidile.*

*... Yesu wakandamuna e kumwambilaye ne: Ikalaayi
ne diitabuuja kùdì Nzambi.*

*Bwalu bulelela ndi nwwambila ne: Ewu yònsò wâmbila
mukuna ewu ne: Tentemuka, ne ediibwa mu mbù, ne
kayi wela mpatà munda mwa mwoyi wende to, kadi
witabuuja ne bintu byâmbiye abi nebyenzeke, yèyè
neapete cyònsò cìdìye mwambe aci.*

*Ki bwa cinyi ndi nwwambila, ne: Bintu binùdì nujinga
nansha biikàle binganyi, panùdì nusambila, itabuujaayi
ne nudi nubipeta, nenku nwênù nenubipete.*

²⁵¹ Yesu wakamba, musangu kampana, pàvwàbo kabayi mwa kuumvwa ne Yèyè uvwa Yèyè uvwaYè awu to, kwambaYe ne: “Nwênù kanuyi mwa kungiitabuuja Mèmè to, itabuujaayi byenzedi bìNdì ngenza. Ne Mèmè nciyi ngenza byenzedi bya Taatù Wanyi to, dībà adi kanuNgiitabuuji to. Kadi Mèmè ngenza byenzedi bya Taatù Wanyi, dībà adi itabuujaayi byenzedi.”

²⁵² Nyewu mfuma ku dijikija, mu dinda emu, ditwala dya Diyishi dya—dya *Cidikà*. Cidikà ncintu kampana cidi, ncicimbè, kadi bushuwa ncyà—ncyà kaciyi cya biitabuujaku to, mùdì Webster wamba, kadi cìikalè cilelela. Cintu kampana cya kabayi mwa kwitabuujaku to, cìikalè ne, kwêna mwa kucyumvwaku to, cidi cyòcì anu bwalu busokoka.

²⁵³ Yesu uvwa wenza byenzedi bya Tatw’Èndè bwalu Taatù uvwa munda Mwende. Ki bwa cinyi byenzedi bivwa byenzeka, bwalu Taatù uvwa munda mwa Mwânà. Nudi nwtabuuja nanku anyi? Bwa ne, munda Mwende amu, Yèyè uvwa Nzambi mwandamuke mubidi. Nudi nwtabuuja nanku anyi? Bwa ne, Nzambi Taatù, udi Taatù wa Yesu Kilisto awu, Nyuma Munene awu uvwa musòmbèle (mu kaabujima kaa Bukole Bwende) munda mwa

Yesu Kilisto, uvwa Ntenta wa Nzambi, muvwijiibwe mubidi ne musòmbèle pa buloba, ùleeja Dìyi. Yesu uvwa Dìyi. Ki cìdi Bible mwambe, Yone Munsantu, nshapita 1. Ne Dìyi òvwa kadiyi dimweneka to. Mpindyewu teejeaayi ne ntema. Dìyi òvwa kadiyi dimweneka to too ne paakavwijiibwaDi mubidi apu, ki dîbà adi Dìyi kwikaladi dya dimweneka.

²⁵⁴ Nenku ku lufu Lwende lwa didilambula ku Kalvariyo, ne ku dibiishiibwa Dyende dya ku lufu, kuteekaYe Ekeleeziya Wende pa kaaba mu cipaapu aci, bwa Nzambi umwèumwè udi kayi umweneka awu kubwelaYe mu muntu-nkaaya awu ne kuvwija Dìyi dilwa dimweneke. Kaa, ekelekele! Ntu—ntu ngâjìngakù bwa ekeleeziya wanyi umvwa cyòci aci. Bu nwènu kù mwa kumona, balunda baanyi, Nzambi udi kayi umweneka awu muvwijiibwe wa umweneka!

Mpindyewu teejeaayi. Tucilongaayi cyakabidi mpindyewu.

²⁵⁵ Ntu anu misangu yàbùngì mujingenge kubwelaku mu ekeleeziya kampanda, ntu mujingenge kucimona bikole be, ngeela meeji, mûndì mwa kubwelela ku ciibi cya kumfundu, ku ciibi cya kumpala, kwònsò kwine kùdìbi mwa kwikala aku, kutuma mèsù àànyì pa bateeleji ne kumona ekeleeziya mupwangane, yònsò mwikàle mu bulongame. Mpekaatu kî mmufwanyineku kushaalamu to; to, Nyuma udi umwela patooke, nudi numona's. Kî mmufwanyineku kushaala to. Bu Ananiya ne Saafila, kwènàku wèwè—wèwè mwa kucyenza to. Kamwakwikalaku mpekaatu nansha umwe mu aku—aku kasumbu to. To, mukalenge. Nwamonu's, Nyuma udi umwela patooke ne lukasa lwònsò mushindu *awu*. Nansha mwikàle wa bishi, nansha mwikàle mukese wa bishi, ùvwa wediibwa anu patooke. Kumona bakaji ne balume basòmbè mwab'awu mwinsi mwa Bukole bwa Nyuma Mwîmpè, Nyuma wa Nzambi ukwata mudimu mu bupwangane bwònsò, usaka cyòci eci. Muntu kampanda uvwa mwenze bwalu kampanda bubi mu disangisha amu, kayiku mufwanyine, kayiku mufwanyine kwikala. . . Kavwaku mufwanyine, cìvwa cifwanyine. . . Bàvwa bàlwa lukasa, kucitonda kumpala kwabo. Nyuma kucyangata, bwa kucitondabo, bònsò babidi. Bàvwa bàlwa, bàcyàmba, bwalu mbamanye dîbà adi mene ne necyediibwe patooke. Aci's ncyà bushuwa. Ki Ekeleeziya wa Nzambi udi ne mwoyi nyawu. Mushindu mwine wùdì mwoyi wanyi mukulakaji, wa mukulakaji mukwate ne bya luse ewu, patùdì twakulangana apa wùkaadi wènda wùkùlakaja, mushindu mwine wùnkadìku mèmè ewu mujingenge kwimana ne kumona ekeleeziya mu mushindu awu's we. Ncìdi anu ne mushindu's. Ndi ntekemena nanku. Byenzedi bipwangane bya Nzambi, kakùyi mpekaatu, mpindyewu, mmbafwanyine kuumvwa.

²⁵⁶ Mpindyewu ki kasumbu kaa bantu nkòkò aka biimane bwa kubasambidila. Mpindyewu, tudi tufika ku dyumvwa ne, pìikalàbi ne Mufundu ewu mmulelela. . . Ne Nzambi wa mu

Dyulu, Yèyè uvwa mwa kufuka nshindi awu, uvwa mwa kufuka cimpanga cya mukooko awu, uvwa mwa kwimanyika dibà dya muulu munda mwa dituku dijima, mèbà makumi abidi ne anaayi awu, uvwa mwa kupangisha mudilu bwa kwoshawu bantu mu cikutu cya kapyà munda mwa mèbà asatu majima awu, Yèyè uvwa mwa kukanga mukana mwa nyama ya ntambwe, uvwa mwa kubiisha bafwe awu, uvwa mwa kwendela pa màyi awu, uvwa mwa kwangata bisukwita kudiisha bantu binunu bitaanu awu, awu's n'Nzambi. Aci's n'Díyi divwijibwe mubidi munda mwa bantu. Mpindiyewu bantu bônso badi bumvwa aci anyi? Mpindiyewu Nzambi umwèumwè ewu wàkalaya ne mu matuku a ndekeelu bintu ebi nebyenzeke cyakabidi, kadi Yèyè kèna mwa kucyenza pàdiku kakuyi muntu kampanda udiYe mwa kwenza nende, ne kwenzela pa yèyè to. Nudi bumvwe cindi muswe kwamba aci anyi? Mpindiyewu twitabuuyaaci aci, ne dishindika dyónso, ne mwoyi wetu wónso ne, nebyenzeke mushindu awu.

²⁵⁷ Mpindiyewu ki kasumbu kaa bantu nkòkò aka biimane, ndi mumanye bààbungi baa kùdibo. Ngeela meeji ne. . . Ncyèna—ncyèna—ncyèna ngeela meeji ne, mukaji wa kumpala udi mwab'ewu kumpala kwa mulongo ewu, nsongaakaji ewu, ncyèna ngeela meeji ne ndi mumumanye to. Ndi mumanye Mwaneetu Way; ne mwaneetu wa bakaji, udi ulonda wawa, mukaji wa Mwaneetu Roberson. . . anyi wa Mwaneetu Borders. Kadi ncyèna mumanye muntu mulume udi ulonda wawa to. Bivwa bikengela bwa mèmè kwikala mumanye mukaji udi ulonda wawa; ncyèna mumanye to, ncyèna ngeela meeji ne ndi mumumanye to. Eyowa, ndi mumumanye. Ne udi ulonda wawa, muntu mulume udi mwimane wawa, mèmè nciyi mutupakane to, mmwànà wa balume wa Mwaneetu Daulton. Ne mu mulongo mwamwa, ndi mumanye pabwipi ne bônso badi mwómò baba.

²⁵⁸ Ncyèna ne cingenyinyeni nansha cikese cya ne nganyi udi. . . ne bantu abu mbanganyi, ne mbafumine penyi to. Kadi mpindiyewu, cidiibo naaci dijinga bwa mpindiyewu ndisambila. Bamwe baa kùdibo, mu bushuwa bwa bwalu, badi bôbò dyamwamwa's, kabeena mwa kuumvwaku ne bwalu menemene bùdi cinyi to.

²⁵⁹ Mpindiyewu, ndi muswe bwa muntu ne muntu wa kunùdi ìkalè mutangile mu nunku bwa katanci kakese, muntu ne muntu wa kunùdi mu mulongo wa babeedi amu. Bu ne mvwa mwa kunwambulwisha, mvwa mwa kucyenza. Nwamonu anyi? Kadi ndi mwab'ewu mbwà kunwambulwisha. Kadi mushindu wumwepele wungikalàku mwa kucyenza, bwa kwalujulula cidi Sataana munwènzèle aci, ngwà nwènù kungiitabuujja mèmè. Bu nwènù anu mwa kungiitabuujaku, ne mwoyi wenu wónso, necyenjiibwe.

²⁶⁰ Mpindiyewu bivwa pa ciibidilu ne, mu mudimu wanyi wa bwambi, bivwa mwa kufila bikeena-kumona. Bikeena-kumona bivwa mwa kubwayika, ne mvwa mwa kwambila bantu civwàbo

bavwile. Nenku, nwênù, mbanganyi bakaadiku bamone cyôci aci cyenzêke? Kaa, s'nnwênù bônso, nwamonu's. Ncya bushuwa. Eyowa, ncìcidi anu mwa kucyenza. Kaa, cìcidi anu mwa kwenzeka. Bushuwa. Eyowa. Ncya bushuwa.

261 Kadi tukàadi twenda tuya ku cintu kampana cinene kutamba aci mpindyewu. Tukàadi twenda tubànda kuulu kwa aci nanku. Nwamonu anyi? Tukàadi twenda tuya ku Dìyì dyakula adi. Kadi Sataana neikalè ne cya kucyenza. Necimuswikile mu disoka; bu mêmèku anu mwa kunufikisha ku diCiitabuuja cyanaana. Kanwediku mpatà to.

262 Monaayi, nwênù baswe kumanya ne ndi nkwambila bulelela, piikalàbi ne Nyuma Mwîmpè udi kaaba aka. Ndi mumanye cidi, nsongaakaji wawa, cidi cîmutacishà, nsongaakaji wawa. Ncitu mumumanye to, kadi ndi mumanye cidi citacishà. [Mwaneetu wa bakaji kampana udi wamba ne: "Cya bushuwa. Mukwaciibwe kùdi démon. Dikwaciibwa dya kùdi démon."—Muf.] Ncya bushuwa menemene. Kadi mulwishi yèyè udi anu munkaci mwa kundwisha ne mwèndè mwônso, kadi neikalè ne cya kucilekela. Wèwè cîtàbùùjè anu cyanaana. Kùcyèdiku wèwè mpatà to, mwaneetu wa bakaji. ["Eyowa's, Mukalenge. Kùcyèdiku mpatà to."] Kùcyèdiku mpatà to. Mbîmpè, mwaneetu wa bakaji. Wèwè, newikalè mwa kuumvwa. . . Nebiikalè mwa kwenda bîmpè.

263 Ki muntu wa bafiike nyèyè ewu muntangile, mwimane mwaba wawa mu mulongo. Ncyèna mukumanye to, kadi Nzambi mmukumanye. Bu mêmè mwa kukwambila lutatu lûdi naalu, newitabuuje ne ndi muprofa Wende anyi? Newitabuuje anyi? Kwèna mulwe kaaba aka bwebe wèwè mwine to. Mwànà udi mu lupitaadi awu neûmvwè bîmpè bu wèwè mwa kuciitabuuja. Udi witabuuja aci ne mwoyi webe wônso anyi? Nanku asa lwendu ndaaku, alùkilàku ku mwaba webe. Ndi ngamba ne Bukole bwa Nzambi bwikalè pa mwànà awu ne dyabulu amulekelele.

264 Daulton mwànà nyawu muntangile, wèwè udi kaaba aka mbwà mwine mwànà wa mu diboko awu. Mwànà wa mu diboko awu udi ne cintu kampana cîmutacisha mu mûfù wende amu. Kî mmwòmò anyi? Alukila ku mwaba webe, ne ùcîtàbùùjè, nenku yèyè neûmvwè anu bîmpè.

265 Ndi kabidi munkaci mwa kutangila mukaji mukwabo musòmbe mwab'awu, m'Mandamu Stricker. Mandamu Stricker, ncyèna mwakuleku neebe to kukaadi ndambu wa ngondo. Ncyènakù ne cingenyinyeni cya bwalu bùdi muvwile kaaba aka to. Udi witabuuja ne Nzambi udi mwa kungambila cidi lutatu lwebe anyi? Ncifwanyine kufikisha bônso. . .? . . .baa kunùdi ku diitabuuja anyi? Udi mulwe mwab'ewu mbwà mwànà awu udi ne cintu kampana cîmutacisha ku mukolo. Pashiishe, wèwè udi munkaci mwa kusambidila mulunda webe kampana mu Afrike. Ncya bushuwa menemene. Aci ng'EMU MMUDI

MUKALENGE WAMBA. Mpindyewu, piikalàci cya bushuwa, Mandamu Stricker, ela cyanza cyebe muulu. Nwamonu anyi?

²⁶⁶ Yèyè udi kaaba aka, nwamonu's. Kadi mudimu wa bwambi awu—awu newikalè anuku misangu yònsò, kadi ki mukwabo wùlwalwà ewu. Itabuujaayi mpindyewu! Kanwediku mpatà to. Muntu nansha umwe wa kunùdi keediku mpatà to. Pàngàànütentekelà byanza, ne ndomba bwa cyôci eci kwenzekaci, s'neciikalè mwa kwenzeka. Cintu cimwepele, cidi anu bu mùdi kwangata kwa Dìyi dya Nzambi cyanaana. Cintu cimwepele cidi ne, wêwè kuyi muCitàbùùje to, kacyakwenzeka to. Wêwè muCitàbùùje anu menemene, cidi ne cya kwenzeka. Bwalu, cintu kampanda cyakenzeka diloolo kampanda kuntu kwaka, ne mèmè ndi mumanye ne Nzambi mwine uvwa mwa kufùka awu mmufwanyine kucyenza. Eyo.

²⁶⁷ Ndi muswe bantu bònsò bwa nwinyikaayi mitu yenu. Bantu bònsò biikalè mu disambila. [Mwaneetu Branham udi umuka ku cyambilu, bwa kuya kasambidila bàdi mu mulongo wa babeedi abu—Muf.] Mpindyewu, mwaneetu wa bakaji munanga, démon awu kèna ufika ku dyumvwa ne . . . ? . . .

Wêwè démon udi muswike Sharon, mwànà mutekete wa bakaji mulenga ewu!

²⁶⁸ Nzambi mwine, Yèyè uvwa mumpeeshe cikeena-kumona diloolo kampanda adi, cya dyabulu muswikiibwe awu, uvwa mwambe ne: “Mu meeji matooke, mmùdi mwa kumuswika.” Nenku ne meeji matooke mu mwoyi wanyi bwa mwànà ewu, nyewu ndwa, Mukalenge, bwa kulomba luse ne dyanyishiibwa Kùdi, bwa bwalu bwende.

²⁶⁹ Sataana, ndi nkuswika. Mu Dìnà dya Yesu Kilisto, shiya mwànà ewu. Meeji ende ne dilukakaja dyende dya lungenyi nebimwalukidile, anu mwàbi ne kale. Pa nanku Dìyi dyamanyi kwambiibwa, pa nanku necyenzeke mu Dìnà dya Yesu Kilisto.

²⁷⁰ Mukalenge Nzambi, bwa Mwaneetu wa balume Way, swaku bwa Bukole bwa Yesu Kilisto bùswikè bukole bwa dyabulu bùdi buswike mwaneetu wa balume ebu. Nenku bùmusuùlùlè, mu Dìnà dya Yesu Kilisto.

²⁷¹ Nzambi, mukaji mutekete udi mukwate ne bya luse ewu neikalè bu wa kumpala awu mwab'ewu, mu mbingu mikese, cintu kampanda cyôci kaciyi cyenzeke bwende yèyè. Yèyè mmukaji wa mwaneetu wa balume, Mwaneetu Roy. Mukalenge Yesu, mpèèshèku makanda mpindyewu. Wêwè Uvwa mufile cikeena-kumona aci awu, kacya Kùtukù mwanji kupangila to. Kacya kaCìtukù cyanji kupangila to.

²⁷² Wêwè nyuma wa dyabulu, udi muswike mwaneetu wa bakaji ewu, ndi nkuswika. Mu Dìnà dya Yesu Kilisto, mushiye. Cyamanyi kwambiibwa, nenku cyenzekè! Cya bushuwa.

273 Mu Dîna dya Mukalenge Yesu, sungilaku mwaneetu wa bakaji ku ntatu yende. Mu Dîna dya Kilisto Wâkalaya, ne wâkafila mulayi ne: “Nwênù bambile mukuna ewu” awu. Cyènzekèku, Mukalenge.

274 Pambidi paa mukaji ewu, mwikalè ngumvwa dilaabiibwa dya Nyuma Mwimpè mu cibambalu emu, ndi ntentekapu byanza byanyi, mu Dîna dya Yesu Kilisto, bwa dyondopiibwa dyende. Mu . . . Swaku cyènzekè, bwalu cyamanyi kwambiibwa. Amen.

275 Pambidi paa mwânà wa bakaji mutekete ewu, JoAnn, Wèwè udi muteeke mu meeji àànyì cileejilu cya mwânà wa bakaji mutekete mwena Kilisto. Ndi mmusungila mu dinda emu, ku cintu cibi eci. Mu Dîna dya Yesu Kilisto, swaku bwa dilomba dyende difidiibwe.

276 Mukalenge Nzambi, pambidi paa ewu, nyaanende wa mwaneetu wa balume munanga, Mwaneetu wa bakaji Thoms, ndi ntentekapu cyanza. Mubi awu udi muswe kumuswika awu, swaku bwa aswikiibwe yèyè. Mu Dîna dya Yesu Kilisto, swaku bwa ashaale mudishikamine.

277 Pambidi paa mwaneetu wa bakaji, ndi ntentekapu cyanza cyanyi. Mu Dîna dya Yesu Kilisto, Mwânà wa Nzambi, swaku bwa bukole bwa mwena lukuna bùswikiibwè. Nenku, mwaneetu wa bakaji, bwa ashaale mudishikamine, kubangila ku dituku edi.

278 Pambidi paa mwaneetu wa balume, ndi ntentekapu byanza byanyi, bilondeshile Dîyì dya Nzambi. Swaku bwa démon udi muswe kumwenzela bibi ne kumupangisha ewu, amushiye. Mu Dîna dya Yesu Kilisto. Amen.

279 Bwa dilomba dya mwaneetu wa bakaji, ndi ndomba bwa Wèwè kumukumbajilaci, Mukalenge. Pândi mumutenteketele byanza apa, mu Dîna dya Yesu Kilisto, cyènzekèku. Amen.

280 Bwa mwaneetu wa bakaji, Taatù, pândi mumutenteketele byanza apa. Mu Dîna dya Yesu Kilisto, dilomba dyende difidiibwe. Amen.

281 Ku diitabuuja dipwekele, Mukalenge, nansha mùdìbi—mùdìbi ne ncidikà, mutenteketele bânà beetu baa balume byanza. Mu Dîna dya Mukalenge Yesu, dilomba dyende difidiibwe.

282 Pambidi paa Mwaneetu wa bakaji Way ewu, yèyè utu mudileejeleeje mwena luse kùdì bàtù dijinga ne luse awu. Ne byakafundiibwa ne: “Nebapete luse.” Swaku bwa luse lwônsò lùdìye ulomba alu, mu dinda emu, lumwenzekele, mu Dîna dya Yesu Kilisto. Amen.

283 Mukalenge, maamù mutekete ewu, ne mwoyi mucibuluke, bu mùndi mumanye dilomba dyende, Éyì Nzambi wa Cyendeleele, cimwenzèkèlèku leelu ewu. Mu Dîna dya Yesu Kilisto. Amen.

284 Taatù Nzambi, mwaneetu wa bakaji ewu, nyewu mmutentekela byanza, bu mùndi mutumiibwe ne mudimu kùdì

Nyuma Mwîmpè, ne ku cikeena-kumona cya diloolo dyadya. Swaku bwa dilomba dyende difidiibwe, mu Dîna dya Yesu Kilisto. Amen.

285 Taatù wa mu Dyulu, pâdi mwaneetu wa bakaji ewu ùbànda kuneeku bwa kwangata kaaba kende, bwa kumutentekela byanza. Mupèèshèku dilomba dyende, Éyi Nzambi. Mu Dîna dya Yesu Kilisto, swaku bwa cyenjiibwe.

286 Taatù wa mu Dyulu, pândi nkвата cyanza eci apa, cya mwaneetu wa bakaji, swaku bwa Bukole bwa Yesu Kilisto bufile dilomba dyende. Amen.

287 Mukalenge Yesu, pândi nkвата cyanza cya mwaneetu wa bakaji ewu apa, ne mushwala wùdiye mukwate ewu, swaku bwa dilomba dyende difidiibwe. Mu Dîna dya Yesu Kilisto, difilèku, Mukalenge. Amen.

288 Taatù Nzambi, mu Dîna dya Mukalenge Yesu, swaku bwa dilomba dya mwaneetu wa bakaji difidiibwe kùdiye. Cidiye ulomba aci, swaku acipete. Mu Dîna dya Yesu Kilisto.

Itabuuja naka, itabuuja naka,
Byònsò bìdi mwa kwenzeka, itabuuja naka;
Itabuuja anu naka, itabuuja naka,
Byònsò bìdi mwa kwenzeka, itabuuja naka.

289 Mpindyewu kumpala menemene kwa ditangalajangana, swayi ngangateku anu kasunsa kakwabo kamwe, anyi tubidi, twa dibà dyenu. Cidikà, Nzambi ngudi mwenze cyòci aci. Mu bwikadi bwetu mene emu, cidikà's ncyenzeke. Bwalu pâncivwà anu mbanga bwa kuya ku mulongo wa babeedi awu, Cintu kampanda ncintuntumune anu naka, anu menemene mùvwàYe mwambe ne ki mùvwàci mwa kwenza amu. Nwamonu's, cidikà! Nwamonu anyi?

290 Nénku pâvwà Nyuma mwikàle pambidi paanyi mushindu awu, mvwa mwa kutangila mu mulongo awu ne kumona bintu bìvwà bantu abu bajinga, nwamonu's. Pa nanku, byòbì bikese bìvwà bisatu anyi binaayi, anyi cintu kampanda, bwa kwikalaci dishindikà, bujaadiki, bwa ne Nzambi kàtukù unyenga dipà didi diikàle dipà dilelela to. Yèyè udi anu usakidilaku, mwikàle utungunuka anu ne kwibaka wenda ubànda anu kubànda.

291 Mpindyewu mèmè, ndi ngiitabuuja ne mwoyi wanyi wònsò ne, nudi bondopiibwe. Amen. Ndi nciitabuuja ne byònsò bìdi munda mwanyi. Ndi—ndi nciitabuuja.

292 Mpindyewu, Yesu uvwa munubiikile bwa nwènù kulwa ku lupandu. Bu nwènù mwa kulwa, nuvwa mwa kuCipeta, bwalu Yèyè ngudi mucilaye. Yèyè ngudi mucilaye, mpindyewu katùcyédiku mpatà to. Kadi tùcitàbùujaayi ne mwoyi wetu wònsò. Mpindyewu, kanulwanganyi naaci mvita to, manyaayi anu ne cidi ne cya kwenzeka. Cidi ne cya kwenzeka. Yesu

mmwambe ne: “Amba Dìyì edi. Kwediku wêwè mpatà to.” Nwamonu anyi? Ne Yèyè ki uvwa mwine Mwena bwalu.

²⁹³ Ne biine bikeena-kumona abi, bwa ku dyanyi dimanya, ne mwoyi wanyi wònsò, kacya musangu nansha wumwe kabitu byanji kupangilaku to, musangu nansha wumwe. Nenku Yèyè kwamba, diloolo dikwabo adi, mu byòbì abi . . . cikeena-kumona cingànùlondèdè aci, kumpala kwa Nzambi Kùndì ngiimana, ncilelela, nwamonu’s. Yèyè wakamona nyoka awu muswikiibwe. Yèyè kwamba ne: “Nebikengele bwa utambe kwikala ne meeji matooke.”

²⁹⁴ Ki cìndì nditacisha bwa kwenza, mbwà kutamba kwikala ne meeji matooke. Nenku muntu ne muntu udi ulwa mu dinda emu, mwewa nteeta bwa kwela meeji ne: “Bu ne ùvwa mmamwányi mêmè (bwa bakaji abu), bu ne ùvwa mmwaneetu wa bakaji musòmbe paanyima pààpa, bu ne ùvwa mmukajaanyi musòmbe paanyima pààpa, anyi umwe wa ku bânà baanyi musòmbe paanyima pààpa, kadi amba tũng bu ne bàvwa mbòbò abu?” Mwikàle nditacisha bwa kuditeeka mêmè mwine pa kaaba kaabo, bwa kwikala ne meeji matooke. Bu nwènù bamone, mwine . . .

²⁹⁵ Ndi anu . . . mbyenzeke anu ne ncìvùlùkè. Dikwabo dituku dyadya, pâmvwà nsanganyiibwa mu Californie, ne mvwa mwimane kuulu mu didya dya Beena Kantu-ku-byanza. Ngeela meeji ne ndi naaci mwab’ewu. Ndi mutwishiibwe anu bya menemene. Mvwa munkaci mwa kucitangila kukaadi katanci, ciprofeta cìvwà cìfidiibwe aci. S’ki cyòcì eci, mwab’ewu mene. Eci cyakafidiibwa, paanyima paa mêmè mumane kwimana nyiisha diyiisha dya dikole. Ne bantu nyewu badi kaaba aka mu dinda emu; Mwaneetu Roy Borders, ngumwe, uvwapù, ngeela meeji, Roy ní ùdi penyi, yèyè ùvwa, eyowa, mmusòmbe mwab’ewu; ùvwapù pàvwà cyòcì eci cyenzèke, ne bakwabo bààbùngì bàvwàpu. Pàvwà nsongaalume kampanda, uvwa wa ba-Baptistes awu, ùvwa mmwànà wa tatwèndè mukwabo wa Jane Russell, mukajaana udi mwende luumu wa mu sèndèmâ awu; muntu yònsò udi muswe kulwa mu didya adi udi mwa kulwa. Nenku ndi mwenze anu njikija kuyiisha anyi, nsongaalume awu kulwaye tamakatamaka ne kungeelaye maboko kunshingu, ne kucyambaye.

²⁹⁶ Ndi mwenze anu ntuuluka ku cibumba cya ku cyambilu cya kumpala, ntuuluka, bwa mêmè kubànda pa cikwabo, bwa kwakula ne disangisha, piine apu, mbantu nkama ne nkama bàvwà mwab’awu. Nenku mvwa ngaakwila ku—ku tudyomba biikàle biya mu ditunga dijima pa dībà citeema dya diloolo divwà dilondà. Bìvwa munkaci mwa kukwaciibwa pa mikaba ya mēyì, piine apu. Kadi pàvwà cyòcì eci . . . Mêmè kutuulukila mu cisasa cìvwà cìlondà eci, bwa kwakula kabidi, ne bantu aba *mwab’ewu*. Nenku dimwe dya ku mangumba a matambe bunene divwa ne umwe wa ku bantu baabo banene, uvwa mwimane

mwaba awu, kadi mwikàle ùmvwa Mukenji wumutacisha ku mwoyi, nwamonu's, ku dyamba dya ne. . .

297 Mvwa ndonda mûmvwà nsanganyiibwa mu Phoenix, ndambu wa matuku kumpala kwa cyôci aci, ne mûmvwà mumone bimuma byàbûngi bishiilangane bikwame ku mucu umwepele. Mvwa mumone ku mucu wa orange, kwikàle bimuma bya mbômà, madimà a mpusu, ne ngeela meeji ne tundeleenyi, ne oranges ya mitwile mbidi, ne bintu byônsò bishiilangane abi bikwameku, bwalu mmuci wa didimà. Kadi mêmè kwamba ne: “Ku cidimu ne ku cidimu cyônsò wôwò wùdi wûsampila ne wûkwama bimuma bipyabipya. Kadi kùdi anu matamba a ku cibangidilu awu; pàdi dyôdi adi dikwam- . . . pàdi mucu mulelela wôwò mwine wupatula ditamba dikwabo, didi dikwama bimuma bya mushindu wumwewumwe bìdi mu mucu munene awu. Kadi mici mikwabo eyi yidi yikwama bimuma byayi yôyi, nansha mùdiyi ne mwoyi ku—ku mwoyi wa mwine mucu ewu amu.” Mêmè kwamba ne: “Aci cidi mùdi malongolodi àdi masomeka mu Mwonji wa mvinyo awu. Yesu wakamba ne: ‘Mêmè ndi Mwonji wa mvinyo.’ Nenku misangu yônsò yidi Mwonji wa mvinyo awu wupatula ditamba, nediiikalè difwanangane anu menemene ne Mwonji wa mvinyo awu. Nwamonu's, nedikwame bimuma anu bimwebimwe abi.”

298 Ee, mwambi munene wa mu bulongolodi butambe bunene bwa beena Mpenta butùdi naabu ebu awu, ùvwa mwimane mwaba awu, ne kuumvwaye Cicutacishe ku mwoyi, nwamonu's, ki kwambaye ne ncivwa muswe kucyamba mushindu awu to.

299 Kadi mêmè kwalukila e kwamba ne: “Ncya bushuwa ne mushindu awu ngùndi muswe kucyamba, nwamonu's. Menemene anu mûngâmbi amu! Ncyèna nguumusha kantu nansha kamwe to.”

300 Dituku dikwabo pâmvwà ngaakula bwa byoshelu abi, nciyi mumanye to, nciyiku mubimone mu maalu malonda to. Kacya ncitukù mwanji kwamba cintu nansha cimwe pa cibumba cya ku cyambilu eku, mu disonsodiibwa, cìvwà cikengelaku bwa mêmè kuumusha to. Mpindiyewu nudi mwa kubiikila aci, *Dimiinu Dyà Nyôka* adi, anyi cyônsò cinùdi baswe kujinga kubiikila aci, cyônsò cìvwà Mayiisha awu aci, anyi, *Ndumba Munène*, àdibo bàtamba kutwa miseba awu. Lwâku anu cyanaana, ne. . . Bwa cinyi kuyiku ulwa kùndi ne Mifundu, pa cyôci aci? Nwamonu anyi? Bwa umone ní ncya bushuwa.

301 Muntu awu kulwaye kùndi mwab'awu, kungeelaye maboko kunshingu, ne ùkaavwa anu ne àmbè. . . Kwambaye ne: “Mwaneetu Branham, kabiyi bwa kunyangakaja kwa cijila to, kadi aci's ncifwanyine kwikala cyenze nshapita wa 23 wa Bwakabuulwibwa. Nudi bamanye's, Mukanda mukwabo musakidila's. Mu bushuwa bwa bwalu,” mwakambaye, “aci kî ncifwanyine kwikala cya bushuwa to, mu bushuwa bwa

bwalu, katwena ne cya kusakidilaKu kantu nansha kamwe to.” Kadi mmwenze anu ne àmbè cyòci aci, kubangaye kwakula mu myakulu. Kadi pende nsongaalume awu kàvwa mumanye ne kwakula kwa mu myakulu kwine mbwena kwamba cinyi to.

³⁰² Kadi mmwenze anu wenza nanku, anu kumpala kwanyi menemene aku kùvwa kusanganyibwa mukaji wa beena France, wa mu Louisiane, kwambaye ne: “Aci kacivwa cikengela dyandamuna nansha. Cìvwa m’Français anu yetu ya menemene eyi.”

Nenku muntu kampanda lwà mwab’ewu kukàtamukaye e kwambaye ne: “Ncya bushuwa.”

³⁰³ Ne paanyima lwà mundekeelu mwamwa mùvwa mwandamunyi wa O.N.U., kufilaye dìnà dyende, uvwa kayiku mwanji kulwa mwab’awu kwònsò aku to. Yèyè kwamba ne: “Menemene. Ncya bushuwa.”

³⁰⁴ Kadi monaayi cyakapetabo bònsò pamwe. Ne muntu ne muntu wa kùdibo ùvwa ne cintu anu cimwecimwe aci paakatwilanganabo, muntu ne muntu wa ku bàvwà bàfila dyandamuna abu, anu mu dyòdi menemene.

³⁰⁵ Nenku muntu mulume mwena France ewu, mwibìdi wa apa ewu, ùvwa mucifunde, bwalu yèyè ùvwa ufunda milubu ya disangisha adi. Cyakafundaye ncyòci eci: “Mémè, Victor Le Doux, ndi mwena France, mukùna ku dikàsà, mwena Kilisto mulediibwe cyakabidi, mùle tente ne Nyuma Mwimpè. Ntu musòmbèle mu mùsèsù wa North King Road ku nomba 809, Los Angeles 46, ntu ntendeleela mu Bethel Temple, Arnie Vick ki mpaasata wetu;” mwambi wa beena Mpenta, wa mu ekeleeziya wa mutambe bunene wa beena Mpenta mu Los Angeles amu. “Dyandamuna dya ciprofeta cyenza pa Mwaneetu Branham, cifila kùdi Danny Henry mu Français, mu matuku 11 a ngondo mwibìdi, cidimu cya 1961, ku didya dya Beena Kantu-ku-byanza baa Evanjeeliyo mu Kaabujima; dikudimuna dilelela dya ciprofeta aci.” Bònsò basatu abu bàakamba ne eci ki cyòci.

Bwalu udi musungule kajila kabumbakane . . .

³⁰⁶ Nwamonu’s, bibengangane anu menemene’s, bìvwa bikengela bwa mémè kwenda nkaayaanyi, nwamonu’s. Mémè ndi mwa kuumvwa aci. Byakakengela ne, Mòsà ènzè pende dyende disungula. Nwamonu anyi? Kàvwa mwenzejiibwe bwa kucyenzaye to, kadi wàkacyènza. Nwamonu anyi? “Njila mutambe kwikala mukole; wèwè . . .” Nwamonu anyi?

Bwalu udi musungule kajila kabumbakane, njila mutambe kwikala mukole; udi mwenze . . . udi mwendelemu, ku disungula dyebe wèwè mwine.

³⁰⁷ Mu ngaakwilu mukwabo, ncìvwa mwenzejiibwe bwa kucyenza to. Ndi mwa kutwa ku cyabo, ne kwenda naabo bu

mémè mwa kuswa nanku. Kadi mémè ndi mushaale ne . . . ndi muswe kushaala ne Diyì.

Udi mwangate dipangadika dijaalame ne diikàle mu dyòdi, ne dyòdi adi ki NJILA WANYI.

³⁰⁸ Bu nwènù mwa kumona bîmpè, cìdi ne bimanyinu bya mu difunda ne basuminyinepu. Bu nwènù mwa kumona bîmpè, ncifundiibwe mu Français, cyôci eci; cyakula mu Français, mwaku wa pa mwanda kumpala kwa mwambikila, nwamonu's.

Bwa dipangadika edi dya mushinga mukole, citupa cinenaanaale cya dyulu ncikwindile.

³⁰⁹ Mpindyewu, pa cyôci aci ki pâmvwà ndyela lukonko ne: “Pângàâfwà, nebyenzeke ne . . . ?” Pashiiše kwenzekabi ne mbange kudyambidila mundamunda ne: “Dyulu kadiyi ne nditukôsowela mu bitupa bishiileshiilangane muulu mwamwa; Dyulu pââdi's m'Bukalenge bwa mu Dyulu bùdi munda mwetu emu, bùdi muntu mwindile.” Nwamonu anyi? Mpindyewu tangilaayaaku:

Dipangadika kaayi dya butumbi dyùdi mwangate's we!

Eci mu cyôci ciine ki cyafila ne cyafikisha ku dyenzeka bucimunyi bulenga bwa dikema mu dinanga dya Nzambi.

³¹⁰ Hmm. Nwamonu's, twètù tudi bafwanyine kucyamba ne: “Mu bucimunyi bulenga bwa dikema mu dya Nzambi dinanga,” kadi mu Français ncifwanyine kwikala ne “dinanga dya Nzambi.” Anu bu mùdibi mu Allemand anyi mu mwakulu mukwabo kanà wònsò ewu's, nwamonu's, bàtu bàngata . . . bàtu bàtèeka mwaku wa pa mwanda kumpala kwa mwambikila.

³¹¹ Mpindyewu nudi numona cìdi kupweka kwa ku Yadènè kuumvwija anyi? Tukàâdi kwinshi eku mpindyewu. Tusabukaayaaku mpindyewu. Tulekelaayi kunaya. Tusabukaayi tuye dyamwamwa mpindyewu, bwalu cyònsò aci ncyetu twètù. Cyònsò ncyetu twètù. Bikeena-kumona abi kacya kabitukù bipangile to. Kabyenaku mwa kupangila to, bwalu bìdi bifumina kùdi Nzambi. Mémè ndi nciitabuuja ne byònsò bìdi munda mwanyì. Twètù katwena beena mudimu baa difutu, biikalà mwa kunyeema kwalukila mu cipeela to. Netusabuke Yadènè, ditapuluka. Nzambi atukoseleku Bitampi bìdi paanyima paa Mukanda abi! Tubwelaayi mu mwaba munene ewu mpindyewu, bwalu Yohuwa wakaabanyina bantu bumpyanyi bwabo bùvwà Nzambi mubashiile.

³¹² Bu nwènù mwa kumona bîmpè, baamaamù baa beena Ebelu abu, pàvwàbo mu kudinyenga kwa pa kulela ne pàvwàbo bàlela bankambwa abu. . . (Nêmfikè pa cyôci aci, dimwe dya ku matuku àdi panshi aa, bu Mukalenge mwa kwanyisha.) . . . ne pàvwàbo bàlela bankambwa abu; pàvwà maamù wamba ménà abo, dibà

dya kudinyenga kwa pa kulela adi, ùwva kabidi ubateeka pa kaaba kaabo mu myaba mu bukalenge. Kaa, ekelekele!

³¹³ Disonsodiibwa dùtu—dùtu ncidikà. Nwamonu's, kwèna—kwèna anu mwa kucyumvaku to. Kadi ncionsola, ne Nzambi udi ucibweja buludi mu mwaba wàcì, anu—anu pa dîbà dyùdi wèwè kuyiku welela meeji to.

³¹⁴ Mpindyewu, pìikalà kuulu kakuyi kwa nêjè menemene to, ne twètù ne mushindu, bu Mukalenge mwa kwanyisha, mu dyalumingu dilwalwà edi ndi muswe kwakula pa cyenabwalu cya *Bwena Kilistò Bùbèngangana Nè Dikuukwila Dya Bampàngaanù*. Nenku wèwè ne mushindu, ulwe ne kabeji keebe, cyònsò cyùdi muswe aci, bwa Diyiisha adi. Mayiisha nèikalèku kabidi diloolo edi, mwaneetu. . . bamwe baa ku bânà beetu baa balume mwab'ewu, ngeela meeji, nebayishe. Mvwa nkeba kushaala, kadi ndi mumanye ne bààbùngì baa ku bantu mbafwanyine kushaala, ne bàkaadi badyanjile kumanyisha cyakabidi bwa nêjè mu mapingaja emu, bwa ne neabwikile njila yònsò, kuumukila anu ku Géorgie ne myaba mishiileshiilangane. Pa nanku mèmè. . . Bu Mukalenge mwa kwanyisha, ncifwanyine kwikala mu dyalumingu dilwalwà edi, mvwa ne cya kuyiisha Diyiisha dimwedimwe adi diloolo edi, kadi nënditentèmùnè too ne ku dyalumingu dilwalwà. Nenku dîbà adi, Nzambi ìkalè neenu.

³¹⁵ Ndi ngiitabuujja ne Yesu Kilisto udi Mwânà wa Nzambi udi ne mwoyi, mulela kùdi virgo, mwimita, Nzambi mu difu dya mukaji, ntenta uvwaYe mwa kusòmbèlamu. Ndi ngiitabuujja ne, munda mwa Kilisto, mmùdiYe Nzambi mwandamuke mubidi. Yèyè n'Nzambi muvwijiiibwe mubidi. Pààkabwelà Taatù Nzambi munda mwa Yesu Kilisto, Yèyè uvwa kaabujima kaa Bunzambi mu ciikadilu cya mubidi, munda Mwende ki mùdi kaabujima kònsò nkòng kasòmbèle. Nzambi Taatù nguvwa wakula Méyì awu. Yesu wakamba ne: “Kî m'Mèmè udi wakula to, kadi n'Taatù Wanyi udi musòmbèle munda Mwanyi, Yèyè ngudi wakula.” Ki bwa cinyi mwimanyine pa cyòcì aci, Yèyè mmuvwijiiibwe mubidi bwa Wàmòna mwa kufwa, Nzambi mwikàle ufuta cibawu bwa bukwabantu, bwa kupikula ne kwaluja, ne—ne kulwa, kusangisha pamwe bintu bìvwà bufuki Bwende Yèyè mwine bujimije mu cibula abi, Yèyè kubipikula e kubyaluja ne mwoyi Wende Yèyè mwine.


³¹⁶ Dîbà adi, mu kupikula kwa bantu aba, bwa Evanjeeliyo Wende wamona mwa kuya kule menemene ne: “Byenzedi bìndì Mèmè ngenza, nenùbyènzè peenu. Nenwènzè byàbùngì bipite ebi, bwalu Ndi nya ku Taatù. Katanci kakese aka, baa pa buloba kabaakuMmona kabidi to; kadi nwènù nenuMmone: bwalu Nèngìikalè neenu, munda mwenu mene, too ne kunshiikidilu kwa buloba.” Mpindyewu tukàadi ku cikondo cya nshiikidilu. Kilisto mmwalukile mu mmwenekelu Wende wa Nyuma Mwimpè, mu kaabujima kaa Bukole Bwende, mubwele mu

Ekeleeziya, bwa kudimwenesha Yēyè mwine. Mbipeepele. Mbantu bapwekele.

³¹⁷ Bu kwòkò mwa kwikala muntu kampana kaaba aka udi mufwanyineku kwikala ne dyakalenga dikumbane bwa kwikala ne dilonga dîmpè dya kalaasa, ne pàmwäpa uyaku ku ekeleeziya wa munene, bupwekele bwa bantu baa cipidi cishaadile eci kabukulendwishiku to. Nwamonu anyi? Kí, kí ng’aci to. “Bantu baa patupu bàvwa baMuteeleja ne disanka.” Nwamonu’s, mbantu anu beetu baa patupu aba.

³¹⁸ Mpindyewu kùdì—kùdì bitupa bya bantu. Kùdì bamwe bàdì kabayi anu bacyukaku to, biikàle ne nsòmbelu anu wa mushindu wònsò naka, bàdì pambelu mu mìsèèsù, ne bikwabo. Kí mbòbò abu bàvwa bàMutèèleja to. Ne baa mushindu wa wùkòka ntema abu, kí mbòbò abu bàvwa bàMuteeleja to. Bàvwa ng’aba baa—baa citupa cya pa nkacinkaci aci, bantu beetu baa patupu aba, aba bàdì bapele kadi biikàle baswe kwikala ne nsòmbelu mukezuke ne wa kaneemu, ne baswe kwikala ne mwoyi bwa Nzambi, bòbò abu ki bàdì bàMutèèleja.

³¹⁹ Pa nanku, swayiku bwa nwènù ne mèmè twikalè bantu biikalà mwa kuMuteeleja mu dituku edi, bwalu mèmè ndi bushuwa ngiitabuuja ne cimwe cya ku bintu bìdì bitambe bunene bikaadiku bibwayike pa buloba ncìdì munkaci mwa kubwayika mpindyewu eci. Amen. Nzambi anubeneshe.

Mpindyewu nêngààlujè bulombodi bwa disangisha kùdì Mwaneetu Neville. 

CIDIKÀ LUA61-1210

(Paradox)

Diyiisha edi dya Mwaneetu William Marrion Branham, dyakayiishabo musangu wa kumpala mu Anglais mu dyalumingu mu dinda, mu matuku 10 a ngondo wa dikumi ne mwibidi, cidimu cya 1961, mu Branham Tabernacle mu Jeffersonville, Indiana, U.S.A., ndyumusha pa mukaba wa mēyì ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org